

MARA EVANGELICAL CHURCH

APAHRANA CHHITHANA BU
SEPTEMBER 2022

ARAOPA TAOPATHINA

CHÂROTUHPA: REV. DR. SI KHAW

Copy Right @ 2022 by
Mara Evangelical Church

Design
St. Vabiethai
MEC, Hqrs., Lailenpi

Author
Rev. Dr. Si Khaw

Copy
700

Published by
Mara Evangelical Church
Headquarters: Lailenpi/ Sabawngpi
Matupi Township, Chin State
Myanmar

ACHHÔH BIELUH TLUANA

Bieluh	Châhna Tho
1) Hnolâ Kua Aw Mapi	1
2) Thlachhâna ta Âpadua	4
3) Bie phapa tawhta Pahniena Byhnâ	7
4) Chanôzy Chakaopa Mission	11
5) Kyhpachâna tawhta Taopathina lâta	15
6) Adopa ta Zuah, Abyuhpa deita Chaleina	20
7) Hmotaopazy Mohôh teh	24
8) Hrosopazy Bie liata Taopathina	28
9) Pôhpa nata Thlahpa Pasana Dopa	31
10) Niedo Thlalôhna Raihria: Khazohpa Raihria	36
11) Khazohpa Bie ta Abohna	40
12) Khazohpa Achhyna Daihti	44
13) Daihti Hmâpha Ma Y	48
14) Ochhôh tawhta Taopathina	51
15) Paru Khâ!	55
16) Siana Pasô La, Na Laiseih Aw	59
17) Raihria Pasô teh: Khazohpa na Chakaona	63
18) Sôh Tluana tawhta ABeipa Chakaona	66
19) Avyuhna Vyuhpa ta Kyhpachana Kupazawhna	69
20) Biehneina Parina tawhta Puana	73
21) Ngiapâna ta eima Pahnie	78
22) Chhôhkha Pathaona Dopa	81
23) Patlapasaona Hrozie	85
24) Reingiahna tawhta Hrona Byhnâ	88
25) Kuphei-pathyuna (Violence) Chalihsapa	91
26) Eima Hnohta Tlô Ma Y (Thâtihpha Tlô Noh)	95
27) Zawpi phana châta Loh Papuana	99
28) Paritheipa Sahma Adyuhna	102
29) Hriapakaohna ta Paduana	105
30) Azaona nata Azona: Thlahpa Hrozie	108
31) Aparyhna ta Tlao Châ Se	112

KHOKHEINA BIE

Atakô 2022 Apahrana châbu he Rev. Dr. Si Khaw ta “Mission chakaona cha arao hawpazy taopathina raihria a châ” (Isaih 58:12) hmâpa ta a vaw patopatiapa a châ. A chhoh bie eima mo tita, atahma hla rân raona nata riarina daihti liata awnanopazy ta ama pahno cheingei awpa bie liamari sai a châ. Chhâ nata daihti ahmie kawpa hawhta pahno nata Khazohpa ta byhnâ maniah a piepa miakha hawhta pachâ nata eina palysa kaw. Chavâta local to nata vaih to ta he Apahrana Bu he program pha kawpa ta taopa ta nâmâ vaw hmâ thei awpa ta khokheina cha hnei kheh hmeiseih ei nata, Khazohpa ta atakô eima rân riarina daihti liata awnanopa Mission chakaona kyh liata châ se, awnanopa thlapalôhna kyh liata châ se, he châbu chyhpa hmâpa byhnâ a pie hmeiseih aw tahpa chhao ei ngiapâ hmeiseih. He châbu chyhpa ta hleikhôpa ta eima peimawh viapa achu awpa chhao hnei mah thlyu mapi tahpa ei pachâ. Chavâta he châbu heta eima rân he patlâh sala, byhnâ pie via rili mawh sy!



Rev. Dr. Zôdau
ES, Education

BIEHMIAPA

Chyhsapa he parao theina nata Khazohpa bie nata ahmiepa ta taopathi theina a hnei. He Apahrana Châbu liata Thâtihpâ a ngiapâna tawhta taopathia tahpa kyh rei eima chhua. Khizaw nata a chhoh liata a ypazy he chyhsa ta a paraopa hluhpi a y. Khazohpa ta paraona ku he taopathina ku ta hmâ a khoh hawpa vâta "**Araopa Taopathina**," tahpa bieluh hmâpa ta takô (2022) pahrana cha eima chhitha aw. Chyhsapa ta a vaih parao ta, ano sasyh chhao â parao. Chyhsapa lilaw ta, lyrâhpa (ti nata tlah) zy parao ta, hmohrohneipa zy a paraona a lai ngâsâ. Khazohpa he paraotuhpa châ leipa ta, taotuhpa nata araopa a taopathituhpa a châpa vâta Khazohpa sawzy he paraona ku pachyusa ei sala, taopathina ku tha eima patlô awpa ta maniah â hnaw. Satâ ku cha hmo parao tyh ta Khazohpa ku deikua padua tyh ta, a taopathi tyh.

Pahrana châbu bieluh he eima sie haipa daihti nata âhmiena a y. Eima râh raona vâta hro a raopazy y ta, taopathi byuhpa hluhpi a y. Palôh chhâna vyuhpa ta Khazohpa liata hnabeiseihpa ta hro thai dâhzy eima palâsa. Khazohpa bie nata âhmiepa ta â dopa ta taona ta taopathina a y thei tahpa eima rei papua chai. Chahleikho ta chahraochatôna ta râh chyhsa nata awnanopa zy parao ta, kaoto liata chahraochatôna chy via lymâ sala, âdopa nata asiapa pasô thaipa eima pasyu hra. Ngiachhiena hneipa ta, chyhsapa nata hmotaopazy chakaona ta a padua pathipa chhao eima pasyu. Khazohpa thatlôna liata ngâna pahniepa ta taopathina raihria liata tha a patlô suh vy.

2022 September pahrana châbu chypa ta roh thei awpa ta tha na patlôtuhpa Khazohpa nata eima Assembly chô liata eily kaw. He tovyu ei hnei thei nawpa ta eima Mission department nata mission committee he reikheituhpazy châ ei ta ama chô liata Zisu Krista moh ta alyna bie ei reih.



Rev. Dr. Si Khaw
Associate General Secretary

July 18, 2022

September 1
HNÔHLÂ KUA AW MAPI

Izarel pathla pôpakhypha sahlao zydua hnohna chata, "Moparu awpa ta eima chahryhpa râh cha, râh pha ngaitapa châ ta. Eima chô liata ABeipa âly khiahta la cha râh liana chata maniah a chhi aw ta, maniah a pie aw, sâhpiti nata kheiti lona râh châ (Malureina 14:7-8)

Khazohpa ta rietheina a siepahlie theipa ngiapâna cha a chyhsazy hnohta pie ta, rietheina khô liata thlatlôhna a y tahpa ngianazy chhao a pie tyh. Khazohpa ta âtlypa Izarelsawzy cha ano ta chhitha ta, rietheina nata hnabeidyna nata palôhchhâna zy siepahliepa chhao a pasaih. Chavâta chi hropa, pho hropa nata râh hropa liata riethei chhih kawpa seichâna zy ama siepahlie hra. ABeipa tawhta thlalôhna, alyna, aoveihna.. hpz tona daihti chhao a y. Hro rietheina, palôhchhâna zy eima siepahlieh haino ta ngiapâna ta bie reipa ta hmialâ sie lymâna he byhnâ a hnei via aw.

Ngiapâna ta Pahniena

Zawsua nata Kaleba cha ngiapâna ta râh taihpa ama ngia. Izarel sawzy cha riethei chhih kawpa para râpathohzy (desert) siepahliepa ta, hnabeidy chhihpa hmozy deita ama hmia liata y hrasala, Khazohpa lâ mopa ta ngiapâna ta ama sie. Ngiapâna ta bie a reihpa Nuna sawchapawpa Zawsua nata Zephune sawchapawpa

Kaleba zy vâta Izarel sawzy cha Kana râh ama ngia haw. Moparutuhpa mo pahrawhleino hry liata mo pahrawh cha rietheina daihti liata ngiapâna bie rei vyuhpa ta, hnabeidyna bie reina ta zawpi phao amâ pahri. Zawsua nata Kaleba deikuala ABeipa bietaihpâ liata a duapa ta ngiapâna ta bie amâ reih. Amo taotheina liata a phnie khaoleipa ta ABeipa hmotaotheina liata ama pahnieh hawpa vâta ama sahlao cha râh taihpâ tlô khe ei ta, amo chhao sâhpiti nata kheiti lona râh ama ngia haw hrâ. Daihti rupa zy siepahlie hai nota ngiapâna ta hnabeiseihna a hneipa biezy phuana he byhnâ ahnei kaw. Â chhiena kyh (hnabeidyna) deita rei ngâna he thachhâna nata leidiana tlaa a tlô khe aw.

Biehra i liata chyhsa rônahpazy châ ABeipa liata ngiapâpa ta bie cha reih ei ta, hnabeiseih chhihpâ bie he zawpi hnohta ama rei tyh. Zawpi chhao ta ABeipa bie liata ama ngiapâna pahnieh ei ta reingiana liata ama sie hra. He hawhta taozie he Khazohpa sawzy siena lâpi châ ta, achhâna liata thlalôhna, alyna byhnâ chhao a vaw zi ei.

Hnabeiseihna ta Paduana

Eima râh liata hmo a tlô haipa eima sai tita lâ, ryureina riari ta, adyuhna, thina, sipasana kyhzy media (tv, phone, online) hluhpi ta a reih. Media tawhta bie â dopa nata â do leipa hluhpizy eima thei nata eima pahlâwpa a hluk kaw. ABeipa liata ngiapâna hneina chôta hnabeiseih a chhihpâ biezy zawpi lâta patlâ (phu) awpa he Khazohpa sawzy taozie a châ. Zawpi cha, Bamar pheisai chhithana he tlaichhai leipa pi ta, a pha lei zie he eima hrona ta a pahnopasia kaw ba. He hawhta duasu chhihpâ tawhta puana daihti a vaw tlô aw tahpa ABeipa

liata hnabeiseihpa a pha. Ngiapâna ta hmialâ a tôh lymâpa Zawsua nata Izarel sawzy cha ama saduthliepa râh amâ tlô haw hra. Hnabeiseihna biezy, thapâwhna biezy nata kyhpachâna biezy ta a chakao rairi ei suh u.

Ahaona biezy, pachhiparyna biezy, pachhiepahrana biezy he hmo phapa tao theina hnei hlei aw vei. Kyh a pachana biezy, a daoraina biezy ta hro rietheinazy a papai via aw. Abeipa liata ngiapâna chôta bie rei, eima reipa hawhta chakao hualuana zy ta *zawpi huhiehna a pie thei viapa chhâ thiehpa* miakha (a new era) liata maniah a pangiasa thei aw. Kao to tawhta râh phana châta a hria haipazy chhao ABeipa khohta khâpa ma achâ tahpa pahnona chôta hria ei sala, ABeipa tawhta râh taopathina nata tlâhna chhao amâ mokhâh awpa eima pasyu hra. Myanmar nata Mara zawpizy he ABeipa ta maniah my vei, râh phapa maniah a padua kheina daihti eima tlô aw. Ngiapâna nata hnabeiseihna ta hmo to he sai ei sila, Khazohpa khihnarâh nata a hmiepa râh pha viapa padua a chhuahta ta hmia lâ tôh lymâ suh vy. Cha cha Khazohpa ta maniah a khohkheipa chhao a châ cheingei aw.

Reipahmaona

1. ABeipa liata hnabeiseihpa ta Thathyuna bie reipa ta, nama reipa hawhta hriapazihna nama hnei thei tyh ma?
2. Zawpi hlüh via ta âpypa maih âdo tahpa ta nâ pyh tyh ma? Zawsua nata Kaleba cha, mo pano deita châ ei ta, ama viasa mo pahraw ama châ. He kyh liata mo pano, a chyh viapa bie ma a do, mo pahrawpa zy bie ma a do via reipahmao teh.

September 2

THLACHHÂNA TA ÂPADUA

*Na siena to rai liata cha hrôbieh awpa ta
nâma kyh liata la vâlyuchâpazy châ bie pie
tlôh aw ta (Hlâzy 91:11)*

Khazohpa ta a chyhsazy abohna lâpi atao tyh. Nâma deita ta a ypa châ va chi; Khazohpa ta a vâlyuchâpazy bie pie ta, acha vaih thlâh. Vâlyuchâpazy ta acha vaih ei tahpa cha, vârah pheisaih zy ta ama cha vaih tahpa hi. Eima pahrâna khizaw liata eima pôhpa, hrona, thlahpa nata eima chakaona raihria zy a parao theipa hluhpi y ta keimo ta eima vai thei leina liata la Khazohpa ta â vâlyuchâpa zy ta maniah amâ vaih thlâh.

Thlachhâna ta eima Vaih

Missionary Rev. R. A. Lorrain â duana miano a y. Ngiapâna ta a duah pi ta, thlachhâna ta eima padua a tah. He bie he tahmâhla awnanopazy châta pachâ peimawh kawpa hawhta ei pahno. Bamar râh ryureina cha February 1, 2022 tawhta riari haw heih ta, pheisaih ryureina liata zawpi angia heih pita; meithe i ta adyuhna cha râh chhoh su hluhpi liata a vaw y lymâ. Râh chhoh liata a pahrâpa zawpi hluhpi cha eima nô a po hmeiseih. Râh khôtho lâ, thlalôhna su liata a ypazy deikuala eima thâti he online siepahliepa ta maniah achu ei ta, line liata maniah mo ei ta, thlachhâ maniah a baopazy ama y hra. Thina zy, nodinazy, raona zy, pasataona zy tawhta khôkhâh nawpa ta eima tao thai chhohpa liata ABeipa lâta thlachhâpa ta baona eima hia lymâ.

He hawhta daihti ru kawpa eima tlô hawpa vâta Mara awnanopa ta tao cheingei awpa ta a hneipa miakha cha râh châta thlachhâ lymâna he a châ. Nie leipa ta râh châta thlachhâna, Local Church to ta, my nata zâ thlachhâ awpa ta eima awnanopa Assembly ta tlâh'awna a hnei. Eima awnanopa ta Myanmar râh chhôn adyuna pai patoh sala, zawpi kho viapa ryureina hneipa ta noh hluhpi thlâh a chhâ. Râh ryureina raopa he thlachhâna nata hmophataona ta patlâhpa ta awnanopa chhao a hriapasa kaw. ABeipa lâta eima thlachhâna heta abohna maniah a pie tahpa rei awpa chhao eima hnei.

Thlachhâna ta Hmo A Tao

"Chyhsa siapa thlachhâna ta hmo hluhpi a tao (Zami 5:16)," a tahpa Khazohpa bie he Mara râh chhôn liata â vaw ki tyh hra. He he Khazohpa ngiachhiena vâ deita ta a châ. Testimony miakha ei vaw palâsa; June 14-23, 2022 liata Mara râh Lialaipi khihpi nata a chhôn liata a pahrâpa khihsawzy cha pheisai nata meitheï a chabapa thyutlia zy ta ama chadô. Meitheï a hneileipa zawpi deikuala eima nôpo ngâsâ ta, ABeipa lâta a thythlupa ta my, nochhôn nata zâ tahpa ta nohkha ei thôn tlai a chhyna o liata mothlih chhao ta *thina a y lei nawpa ta* thlah eima chhâ. ***ABeipa y! vârah pheisai, vâlyuchâpazy maniah tuapa lâ, maniah pachhâ ma y..*** tahpa thlachhâna ao ta khihpi he â khu. Eima hropa chhao ta ABeipa eih châ pi ta, eima thipa chhao ta ABeipa eih eima châ tahpa zawpi palôh liata thlalôhna byhnâ vaw y pathao ta, pakha chhao khihpi puasai leipa ta, thina y leipa ta thla eima chhâ pazao. ABeipa ta eima thlachhâna a vaw chy ei.

ABeipa ta Meitheï-charihzy tawhta abohna lâpi maniah taopa ta â bohpa ta eima y. Lialaipi khihpi a pahrâpazy nata a chheipâh a pahrâpazy châta la June 23, 2022 he charih (bullet) nata bom zy ta maniah â zawpakhôpa he ABeipa ta maniah a bao vâta a châ. Izarel sawzy ta zawpakhô ku ama hmâ tyhpa hawhta, ABeipa vâlyuchâpazy ta maniah vaih ei ta raona, thina zy cha eima zawpakhô haw. ABeipa Zisu ta thlihipa a chalihsapa maniah a patheisa kaw hra. Eima chôta a vaw tlô thei awpa thina nata raona thlihipa a chalihsapa vâta Khazohpa maniah baotuhpa chô liata eima ly kaw. Kypachâna ta thlachhâ maniah a baopa zy eima ly kaw. Abohna nata râh phana châta ABeipa Khazohpa la thlachhâ lymâ suh u.

Reipahmaona

1. Zisu hro liata ngia tlâh kawpa cha thlachhâna châ ta, thlachhâna ta adyuhna papai awta, adyhna avaw tlôkhei aw tahpa ngiapâna namâ hnei thei ma?
2. Hawti nawhzy thlalôhpa ta school ama kia thei nawpa nata amâ boh thei nawpa ta thlachhâna program phapa nama hnei thei ma?

 September 3

BIE PHAPA TAWHTA PAHNIENA BYHNÂ

Palei hmotaotheina liana chata hrona nata thina y ta, a pasôtuhpazy chata cha liata a patheipa cha ama nie aw (Bisohzy 18:21)

“Bie phapa” cha thei phapa a pathei. Abei Ahasuara ta Zu chipathla zy pahleipadia awpa ta bie a phuahna daihti liata Esthy cha Ahasura hnohta bie phapa ta ahawna tao ta, thie awpa biephuana cha paraopa achâ haw (Esthy 7:1-8). Bie phapa he hrona nata alyna thei a pathei. Chyhsapa ta ama bie reipa theilâpa ama nie tahpa Khazohpa Bie he âdo kaw. Biehraï liata biereina kyh pachuna a y hôlôpa liata mopathaihpaw Pawla pachuna miakha, alychhihpaw bie reina kyh a reipa eima palâsa aw.

Aly Chhih awpa ta Bie Reina

Mopathaihpaw Pawla ta bierei kyh he hawhta a pachu, “kyh to liata alyna biereipa a pachu (Kaolaosa 1:12).” Pawla bie ta achhuahpa hluhpi a ypa chhaota zawpi lâta alychhihpaw bie nata hlâ zy puakhei teh u tahna yzie a hnei pachai. Ano reizie ta cha alyna bie reina he hrona châta hmo a taothei a tah. Alyna bie reina ta Khazohpa nata chyhsapa palôhtlahna tao ta, azaona phapa pahneisa ta, pakha nata pakha kyh a pacha viana zy a tao. Pawla pachuna liata ahaona biezy rei hlüh awpa y vei. Zami chhaota a reipachhiena zy tao leipa maniah a pasyu hra (Zami 4:11).

Thachhie a chhihpa biezy, pachhiena biezy, ahaona biezy hlâta kyhpachâna ahlaopa ta palysana bie reina he pha ta hrona châta mâ ahnei via. Kaokha lâta eima rei khiah a pachhiena bie kawh sâhkha reipa hlâta, alyna bie kawhkha reipa he hmotaotheina hnei via ta hmo phapa chhao a papua thei via aw. Chavâta o chhoh liata alyna bie reipa ta ngiaryh chhihpa ta tao suh u.

Nôpaw liata Alyna Bie Reina

Khazohpa he alyna bie hlâ tlahpa châ ta, eima hnia chaipa eima nôpaw he alyna bie hlâ tlah amâ châ hra. Nôpawzy ta saw nawh tawhta ama hnabeiseih chaipa miakha cha, sawzy ta nôpaw chô liata aly thaina he a châ. Eima lyna he bie ta, reika phapa ta nôpawzy hnohta palâsapa he nôpawzy palôh alyna, thatlôna nata hnatlahna chhao a pie aw. Nôpaw hnohta alyna bie reipa he a do ta a pha. Pawla ta Philipi mozy hnohta alyna bie rei a pachu ei, ABeipa liata lâ kha alypa a pachu ei (Philipi 4:4).

Biedo ngaitapa rei theipa ta arâpasuapa âbyuh (Eph. 4:15) hra. Pawla ta Kyhpachana ta bie dopa reipa he laiseihna phapa nata alyna a pie a tah hra. Biedopa thei cha laiseihna dopa thei a pathei aw. Eima nôpawzy liata biedopa reina he a pha via heih. Nôpaw he dôveipa châ tiarâh vei ei. Nôpaw chô liata alyna bie nata biedopa reina ta chhohkha akaoraohna a tao papua. ABeipa Zisu bie reipa hawhta, chhohkha liata alyna bie, bie hmeiseihpazy reina ta khotalaina a tao aw a tah. Alyna bie, bie dopa, bie hmeiseihpa zy he chyhsa châta laiseihna, khotalaina byhnâ a vaw tlô khei. Aly chhihpa bie nata â dopa ta reina he Abeipa aly aw ta, nôpaw nata uta nawhta zydua chhao amâ ly aw. Abeipa liata lyna he thatlôna a châ aw.

Bie Âdopa ta Reina Hrona

Bie â dopa ta reina ta chyhsa phao a pahua, alyna chhao a pie. Bie hmeiseihpa (bie dopa) nata â dopa ta biereina cha chyhsazy hnohta Khotalaina a pie hra. Awnanopa he bie â dopa ta a rei awpa a châ. Bie dopa thei cha khotalaina a châ. Zisu ta bie hmeiseihpa ta khotalaina a pie tahpa ta maniah a pachu haw. Bie dopa pasô sila, biedopa rei suh u.

Haipa/ bie do leipa deikua thina atlô kheî. Anania nata Saphira (Hmotaopazy 5:1-11) cha ohmo mâ kyh liata haipa bie rei ei ta apôstôlzy hmiakô liata ama thi thlâh haw. He nôvah penawh he alei su ama zuana mâ â dopa ta rei leipa ei ta, ama phih haw. Alei zuana mâ alaibahpa rakha he apôstôlzy phei thabypa lâ chei ei ta, ama haipa vâta ama thi haw. Ado leipa ta reina he thina atlôkheî he zaw tahpa maniah a pachu hra. Bie â dopa ta reihna cha haihina châta su pie bei vei. Cha liata khotalaina a y. Bie do leipa reina deikua phaohrina, palôhphasana nata raona chihluhpi a tlo kheî.

Bie do leipa reina ta raona chi hluhpi a tlokheî. Chahraochatôpa bieheituhpazy (dictators) ta bieheina to amâ khoHPa vâta bie do leipa tlai he rei chanei lymâ ei ta, bie do leipa cha bie dopa hawhta zawpi pahmôsa amâ chhuah. He hawhta bie reina he Myanmar ryureituhpazy liata ahluhpi eima hmô tyh. He hawhta taona vâta râh zawpi châta byhnâ y hlei vei, zawpi cha tiao ama phao â hri. Bie do leipa pôh via, hmô pha leipa maniah tlô thlu via a tah thlâh haw. Bie do leipa thei cha atunazy, a thienazy tiao a châ thlâh. Chavâta â dopa pasô ta, bie dopa reipa ta adyhna theizy a vaw pathei aw.

Nôpaw chôta, vaitlâh chôta alyna bie reina, alychhihpa bie reina he thatlôna maniah pie ta, bie â dopa ta reina, pasôna ta hrona, khotalaina maniah a pie thei aw. Bie â dopa ta reih sila, aly tlah a châpa zydua hnohta alyna bie reih chyuh vy. Cha cha eima thatlôna nata eimâ taopathina châta a pha aw.

Reipahmaona

1. Nôpawzy chô liata kheh ta e alyna bie reina nama hnei tyh? Ahyzy chô liata e alyna bie na rei thah via tyh?
2. Pachhiena bie, pachhiparyna bie zy na rei hlüh vâta na ly viana a y bei ma?

 September 4

CHANÔZY CHAKAOPA MISSION

Pityh cha thyu ta, ama hnohta sie ha hra ta. Chatawh cha a tlôpa ta nahta chhôhpadahpa chôchaipa lâta a chhi ei ta. Nôhmei zydua cha akiapâh ta aduapa ta, Dawkasi ama hnohta a y notum a viamakao taopazy, a chysia taopazy pamosana chô ta cha ei ta (Hmotaopazy 9:39).

Baotuh hneileipazy a ngiahna "pabie" kheipa ta Thlahpa Pathaihpa ta ngiapâtuha chanô chapaw pathlua leipa ta chakaona raihria maniah a pie. Eima pahrâna khizaw liata tlahleipa, akichai leipa, hârapa, nôhmeipa, phahla baihlapa, riapaipa tahpazy ama ypa hawhta Thâtihpha nodi dâhphipa hluhpi ama y hra. He hawhta bao angiapazy hnohta ama ngiahna pabie kheina he awnanopa hmiatuapazy chakaona lâpi achhihna miakha chhao a châ. Angiana pabiepa chakaona he khihpi nata thotlah khihsana liata eima peimawh kaw. Angiahpa pabiepa ta chakaona liata hmopiena nata Thâtihpha phuahna â hlaopa a châ.

Phahlapazy Chakaona: Thlahpa Pathaihpa Raihria

Thlahpa Pathaihpa ta phahlâpazy chakaopa ta ngiapâtuhpazy a hmâ. Zisu azituhpazy châ Thlahpa Pathaihpa to ei ta, cha Thlah Pathaihpa ta ama chakaona raihria châta lâpi hluhpi a pahy. Nie ahneileipa, abu ahneileipa, o ahneileipa zy lâta ku pawzawna he chakaona

miakha ta ama vaw hria. Chakaona chi hluhpi hry liata Thlahpa Pathaihpa ta Dawkasi hnohta nôhmei nata hâra zy chakaona raihria a pavaosa tahpa hmotaopazy châbu tawhta eima chu. Dawkasi chakaona he Khazohpa khihnarâh raihria peimawh kawpa, Thlahpa Pathaihpa chhithana ahlaopa châ ta, keimo awnanopazy chakaona châta âhmie kaw hra. He chakaona he cha nôhmei, hâra, nie ahneileipazy, o ahneileipazy lâta kyhpachana ku pazawpa ta chakaona raihria châ ta Thâtihpha ta thlahpalôhna chhao â hlao. Eima râh nata chheipâh liata hmopiena nata hnabeiseihna Thâtihpha pahlaopa ta chakaona ochhi a vaw pahy via lymâ.

Chanôzy Kyhpacha Chakaona (Love and Action)

Thâtihpha chakaona he bie deita chhona ta a daih vei tahpa eima pahno chy. Chyhsa phahlana liata hmopiena pahlaopa ta chakaona he byhnâ a hnei kaw. Awnano hmiatuapazy chakaona liata kyhpachâ hmopie chakaona â hlao tyh; Zopa khih liata chanô pakha, Dawkasi chakaona liata â lâ via pachai. Dawkasi chakaona mission cha chyhsazy ama phahlana liata ama byuhpa (need) pabiethluna mission a châ. Abu-asai aphahlâpazy abu-asai piena ta Khazohpa kyhpachâna amâ palâsa. Chanô hluhpi chhao Dawkasi chakaona liata ama pahlaop. Apôhkha kawpa ta ngiapâtuha chanôzy châ âbyuhna ahnei kawpazy lâta hmopiena ta ama chakao. He chakaona he Thlahpa Pathaihpa ta a chyhsazy hmâpa ta Khazohpa raihria apalâsana a châ. Thlahpa Pathaihpa ta chanô hriatuh hluhpizy hmâpa ta rai a hria hai. Dawkasi chakaona mission hawhpa liata chanô hluhpi a pahlaopa ta Khazohpa chakaona eima peimawh via lymâ.

Chakaona Ochhi Pahyna

ABeipa Zisu ta a reih, "sahria awpa hluhpi a y," a tah. ABeipa ta chanô hriatuhpa hluhpi chhao a hrua lymâ. Pakah ta Thâtihipha bie a phua awpa chanô hluhpi nata hmopie chakaona ta Thâtihipha a phua theipa chanô zy Thlahpa Pathaihpata ta a tlua lymâ. Khazohpa raihria liata chanôzy ama hlao hlulh via nawpa ta Thlapa Pathaihpata ochhi kawh ngâsâpa a pahy. Awnanopa ta Thlahpa Pathaihpata rei a ngiah sala, chanôzy he kao to tawhta Thâtihipha chakaona tovyuh a pie lymâpa a pha. Chanô zy pastor, evangelist, Bierhai pachutuhpa chakaona tovyuh ama hnei nawpa ta awnanopa ta ochhi a pahy viapa abyuh kaw.

Khazohpa ta chanôzy hmâpa ta hara rietheipa, a tlah leipazy thlâh palôh ta rai a hria haipa hmô chy pi ta, Thâtihipha phuahna ta a hria via heih aw. Krizyhpata nôzy hmâpa ta harapa mohôhna, chiehleipa vaina, mâchhiesapazy thlapalôhna, pawhmeipazy tho nata ti piena, awnanopa liata khichhaizy mohôhna hleikhô ta Khazohpa bie chhona ta chanôzy ama chakao awpa he Thlahpa Pathaihpata ochhi khaw hlei vei. Dawkasi mission chakaona he chanôzy ta ngiachhi chakaona raihria ama taopa châ ta, cha liata Thâtihipha phuana chhao â hlao hra. He hawhta chakaona liata Thlahpa Pathaihpata pahlao lymâ. Khazohpa ta ngiachhie chakaona raihria liata Mara chanôzy he kô hluhpi vaw hmâ haw ta, tahmâ cha Thâtihipha phuana liata hmâ a khoh kaw ba.

Marasaw ngiapâtuhpata chanô nata chapaw hluhpi cha chhôhkha, vaitlâh liata hmotaopa nata Thâtihipha chhopa ta angiahna ahneipa nata phahlapazy cha thlah

amâ palôh tyh. He he chhâthieh Dawkasi mission chakaona hawhta a py theipa châ ta, eima phahnai khei kaw. Krizypha nôzy he ama reipa hawhta tao hualuana ta chakaona rai hria ei ta, Thâtihipha ama chho pakawh awpa chhao Abeipa ta â hnaw ei. ABeipa ta hriatuhpa hluhi â aw haipa liata chanôzy chhao amâ hlao tahpa mypa pha vei.

Eima awnanopa liata biepathlupa a hriapazi thai chaipa châ, Krizypha Nô sahlaozy ama châpa ta ei pahno. Chavâta ngiapâtuhipa Mara Krizypha chanôzy he awnanopa nata vaihtlah liata chakaona su pie via lymâpa nata Thâtihipha bie rei chakaona tovyuh chhao ama hnei via thei nawpa ta ochhi pahy viapa a pha kaw. Ngiapâtuhipa chanôzy he hmopha taonazy hleikho ta, Thâtihipha reina kyh, adyhryhna kyh reinazy liata ama vaw luah via lymâpa a pha. Cha hawhta Thâtihipha o chhi kaw via ta pahypa châsala, awnanopa nata vaihtlah liata bie ta eima reipazy kha taohriana lâta a tlô via awpa chhao hnabeiseih â chhih kaw.

Reipahmaona

1. Thlahpa Pathaihipa ta chanôzy he hmâpata vaihtlah liata padyhparyhna bierei tlahtlanazy, Thâtihipa reina tovyuhzy a pie tahpa nama ngiapâ ma? Eima awnanopa liata chanô biechhôtuhpa, pastor, evangelist zy papôh viapa â ryh nama tah ma?
2. A ngiahna pabiena mission cha ngiachhie chakaona châ ta, nama khih liata chakao a ngiahpazy khei ta e nama chakao tyh?

September 5

KYHPACHÂNA TAWHTA TAOPATHINA LÂTA

Biepiepa thiehpa ei cha pie ei hih, kyh a pachâ rairi ula; kei ta nama kyh ei cha pachâpa hawhna heta, nâmo chhao kyh a pachâ rairi teh u (Zawhana 13:34)

Unawhzy kyhpachâna kyh liana chata kyhpachâ ngaitapa ta tha a pasa rairi teh u; palyupalihna kyh liana chata a khokhei rairi ula (Rawma 12:10).

Pachhiparyna ta taopathi a chhuahna he Myanmar liata hluk kaw ta, châhrasala pachhiparyna ta râh nata chyhsa he taopathi tu hlei vei. Taopathi nawpata raihria dâh pathlaipa âbyuhzi eima palâsa aw.

Kyhpachâna ta Taopathina

Kyhpachana ta hrona, alyna, thlalôhna byhnâ a vaw tlokhhei. Biehrai he kyhpachâna kyh a hluphi reih ta, cha cha bie hmeiseihpa a châ. He bie hmeiseihpa he taopathina châta hmotaotheina a hnei. Kyhpachâna bu châ Biehrai he châ ta, byhnâ hnawh hawhta ngia theipa a châ. Zisu biepiepa, "Kyh a pacha rairipa ula," tahpa Biehrai thiehpa liata maniah a pachu. Kyh a pachâ rairina ta chyhsa hrozie chhao a taopathi thei. Kyhpachâna cha byhnâ tona châta, Khazohpa kyhpachâna ta chyhsa taopathi thei ta, vaih nata hmotaopazy chhao huhiehna a pie.

Kyhpachâna: Taopathina Thohna

Kyh pachâ tlah leipazy cha kyhpachâna ama dao khiah ama hro â taopathi thlâh. Zisu pachuna liata sawchapaw leidiapa nata a paw kyh reih ta, hro a pathlai theipa “kyhpachana” thâti h maniah a pahnosa. Sawchapaw pakhapa cha o chhôn liata a paw chhithanazi hawhta y leipa ta, o tawhta a pua. Ano he nôpaw chhoreina nata Khazohpa biepiepa zy papeisa vei. Apaw o tawhta tovyu a hneipa zydua a la khai ta, ano palôh khona hawhta khitlyna lâ a sie. A paw tawhta a vaw puakheipa sôh nata hmodâh zy cha a khozi hawhta hmâ ta, chahrasala daihti reipi a daih vei. A hneina he hmo phapa taona lâta hmâ thlyu vei. A sôh hneipazy â dopa ta a hmâ leipa vâta a viasa hluhpi chhao a parao thlyu aw. Sawchapaw leidiapa cha tlalana liata a lâpi chhâ hrasala, a paw “kyhpachâna,” châ a vâ kaw. A paw o lâ vaw kua ta, pachhiparyna, thlarâna vyuhpa ta kyhpachâna ta ama hlâdy vâta he chyhsa he a hro â thlai haw.

Chyhsapa ta ama vâ chaipa he kyhpachâna a châ thlyu aw. Kyhpachâna a vâpa cha Khazohpa a vâ tahna a châ; Khazohpa cha kyhpachâna a châ vâta. Tlâh a châkhaoleipa sawchapaw leidiapa cha kyhpachâna vâta a paw ta a pyh pathi ta, ano cha chyhsa thiehpa ta taopathipa a châ haw. Moleina ta chyhsapa he parao hrasala, “kyhpachâna” ta chyhsapa he taopathi ta, a padua pathi tyh.

Araopa taopathina châta kyhpachâna pathaihpâ â byuh. Bie kao hropa lâ ta eima rei khiah, kyhpachâna a hlao leipa ta cha taopathina hmeiseihpa y thei bei vei. Kyhpachâna he a palôh pasi ta a to hnabei a seih thei hra.

Châvâta Myanmar râh liata chyhsa hro arao hawpa chhao he kyhpachâna ta a taopathi thei thlâh aw. Pachhiparynazy, chahraochatonazy, kuphei pathyunazy (force) hmâpa ta Myanmar chyhsa hro raopa he a taopathi thei thlyu vei; zawpi nata râh chô liata kyhpachâna pathaihpa, ngiathaina palôh hmeiseihpa hneina ta taopathina phapa a y thei thlâh aw. Taopathina dâh miathôh eima palâsa via aw;

1. Chyhsa Zydua Thyuna Miakha, Chhôhkha

Eima rei a nanopazy, eima hmisa ananopazy, eima pahrana su a nanopazy vâta a nano hlei mapi chyhsahpa châ pi ta, thyuna miakhapa, Khazohpa tawhta eima vaw pua chyu. Thyuna miakhapa eima châpa vâta kyh a pachâ rairipa he eima taovyuh dopa a châ. Myanmar liata a pahrâpa rei nanopa, hmisa nanopazy he chyhsapa châ pi ta, châhrasala chhôhkha eima châ thlâh. Chhôhkha eima cha vâta chhôhkha kyhpachâna biezy ta a chhy sila, kyhpachâna nakhaoh ta eima nahthlie awpa a pha chai thlyu aw. Ahaona nakhaoh ta eima nahthlie khiah rao via lymâ aw pi ta, ngiachhiena nata ngiathaina nakhaoh ta eima nahthlie khiah adyuhna a pai via aw ta, adyuhna nata thlalôhna cha maniah a hlâ aw vei.

2. Chahraochatôhna Vyuha ta Ngiachhiena

Ngiachhiena a hlaopa ta, bie reina, hmotaona, a chhithana zy ta chyhsa chhitha thei ta, hiehahpa ta thachahrana hmâpa ta chahraochatôhna deikua raona deita atlô khe. Chahraochatôhpa bieheina nata ryureina zy ta chyhsa a parao ngâsâ; ryureina zy riari khai ta, achhithana zy arao hleikho ta chyhsa hluhpi thina lâ a chhitha.

Ngiachiena a hneipa ta a chhithana, ryureina zy ta abohna, thlalôhna zy tao thei ta, araopa chhao ataopathi thei aw. Pamosana miakha eima rei aw; Bamar pheisai cha hiehahna nata chahraochatôhpa ta bieheina nata ryureina tao ta, Myanmar râh ârao haw tahpa a pahno thai ba thlyu aw tahpa ei pangiasa. Pheisai chahraochatôhna a daoh awpata palôh tlâhleina palâsapa ta lâpi achhihanna, raihria leipa ta palôh tlâhleina palâsana (CDM), meithe chabapa ta pheisai adyuhna zy cha râh chhoh zydua liata a kalikaloh thlah haw. Tahmâ taihta cha eima rao via nga chyh. Kyhpachâna nakhaoh ta zawpi ao nathlie ta thachahra ta adyuhna basai chyupa he tao dâh do chaipa a châ thlyu aw. Kyh a pachâ rairina nata a ngiathai rairina a pathao tuapazy he ta zawpi phana nata thlalôhna ama vaw tlô khe i aw.

3. Ngiathaina ta Patlâhna

Kyhpachâna theilâpa liata ngiathaina â hlao. Ngiathaina he Zisu bie hnôhchaipa a châ, "Ei Paw y, ama taopa pahno vei ei, a ngiathai ma y," a tah. Zisu ta ngiathaina he ano a khakhaipazy chôta a hmâ. Ngiathaina he khakhaipa, dyutuhpazy chôta hmâpa chi a châ tahpa maniah a pachu hrâ. Chahraochatôh a khohpazy châta lâ eima Beipa Zisu hmotaopa nata bie reipa; ngiathaina he yzie hnei ngyu vei. Châhrasala ngiathaina he hmotaotheina a hnei kaw tahpa Kraws tawhta â vaw lâ haw. Bishop Desmond Tutu cha he hawhta a reih, "ngiathaina leipa ta lâ hmialâ sie via thei aw mapi," a tah. Thachahra ta chahraochatona ta la eima rao khai dâh dei aw tahpa yzie a hnei. Ngiathaina he riahchhiena châ leipa ta, raonazy â chalih thei nawpata, palôh keichheihpa nata

mothli chhao ta hmotaopa tlao a châ. Ngiathaina cha hmo do leipa ama tao hawpa kha a ngiathaipata, â dopa tao ba ma y tahpa mothlih chhao ta chhoreina tlao a châ.

Chahraochatôhpazy, bie chhiepa ta achhupa hlâta, ngiathaina ta ama hmotao do leipazy pahnosa ta, ngiathaina ta akaona lâpi thiehpa eima tluah khiah hmialâ siena lâpi a vaw pahy via thlyu aw. He he cha ABeipa Zisu eima ngiapâna thabyhpa pheihnie eima chhih vâta raona maniah tlôkhei hrao aw vei. Ano ta maniah ypâ aw ta, ano lâpi a châpa, "kyh a pachâ rairina lâpi," eima chhih vâta zawpi phana, râh adyhna nata thlalôhna chhao maniah â vaw hnia lymâ thlâh aw.

Reipahmaona

1. Araopa taopathina châta kyhpachâna he thohna pha chaipa châ ta, "kyhpachâna" hmâpa ta Bamar pheisei hro taopathina dâhzy a y thai ma tahpa reipahmao teh.
2. Ngiathaina he hmâ a ru ma? Nâ ngiathai thei leipa hmo/ chyhsa ama y ma? Na ngiathai leipa he phana a cha pie ma reipahmao teh.

September 6

**A DOPA TA ZUAH, ABYUHPA DEITA
CHALEINA**

*Seina hnei leipa ta, hmo dopa a taopa, a
palôhrupa liata bie hmeiseihpa a reituhpa
cha ... khati no hmahta a chalyu bei aw vei
(Hlazy 15:2-5)*

Abyuhpa nata â dopa ta taona he ta chyhsa hmasiena a pie. Â dopa ta taona hluphi hry liata â dopa ta chaleina nata zuana kyh eima palâsa chhi aw. Hmo chaleina nata zuana kyh liata â byuhpa deita chalei ta, â dopa ta hmo zuahna ta chyhsa phao a pahua. Eima hry liata nocharei ta hmo zuana nata chaleina a y tyh. Kihipi liata lâ chaleina, zuana ahluh kaw. Hmo chaleina nata zuana kyh liata â byuhpa deita chalei thei a chhuah ta, hmo zuatuhpa ta â dopa ta a zuapa he Abeipa chhao a palôh a tlah aw. Hmo a zuatuhpa cha kyhpachâna pahlaopa ta zua sala, a chaleituhpa chhao leibâ hneileipa ta â byuhpa deita chalei sala a pha chai aw.

Paliepachhina & Chaleina Khizaw

Tahmâhlâ chyhsazy ta hmo chalei theina he amâ cha dai kaw. A chaleituhpa ama hluh thei nawpa ta hmo a zuapazy ta sydiena (advertisement) phapa ama tao. He vâta chyhsa liata hmo chalei khohna a hra via lymâ ta, â byuh hmeiseih leipa chhao taih chalei khia ei maw ei tah. A chaleituhpazy cha chalei via ei, chalei byuhpa pahno via ei ama tah. Chi pho hropazy hawhta Mara sawzy chhao hmo chalei khohna eima hnei laih via lymâ hra. Buakha

chhôn liata chhâ a pathlai ta, takâ sôh tluana rairupa he pachâ hmâ leipa ei ta, thotlah Marasawzy chhao cha ama khohpa he a leibâh ta ama chalei thlâh. TV, phone mâ rupazy, chysia thiehpa a mâ rupazy, computer, bike, motor, ochhôn chhaichhi hpz chaleipa ta ama hra kaw. Hmo thiehpany hnei theipa he hmasiena miakha châ taraw ta, anodeikua sôh hmô rairuna pachâ hmâ leipa ta palôh khohpa maih chalei a chhuahpa ta leibâh ta hmo chaleipa he hmasiena phapa tao hlei vei. Anodeikua lâ alei theileipa ta a châpa deita chaleina he ta hmasiena do viapa tao aw ta, chyhsa phao a pahua via syulyu aw.

Hmo zuapa nata chaleipa he moleileipa ta, â do leipa ta hmo zuana nata khohpa maih chalei chakhyna deikua Khazohpa khozi nata â hmie vei. Eima takâ hmôtheina nata a hmieleipa ta khohpa maih chaleina ta takâ leibâh maniah pahneisa thei ta, eima leibâh â hri tita deikua lâ, moleina a châpa - avyuhnazy, hainazy, parunazy lâta maniah a tlô khe thei. Eima châna nata âhmiepa rakha ta, chhôhkha châta âbyuh hmeiseihpa chalei thaina he chhôhkha patipatai thaina (good management) châ ta, leibâh hnei chyh aw ta, a leibâh chhao pahnie thei aw ta, avyuhna, paruna moleina tawhta khotalaina a hnei aw. Hmo a chaleipa ta â dopa ta a taopa hawhta a zuatuhpa chhao â do leipa hmo zuana dâh a heisaipa a pha aw.

Ngiapâna Hrozie Palâsana

Chyhsa a ngiahna pabie awpa nata raihriana mâ hmô awpa ta hmo zuapa he kyhpachâna a hlao ta, a pathaih hra. Thâtihpha bie nata a hmie lei kawpa hmo zuana dâh a y hra. Cha cha ngiapâtuhpazy tao leipa ta

eima pasyu. Zawpi a ngiahna a lai via nata hmo mâ pasâh lei, a no ualua hawhta zuana he ngiapaâtuhpazy hrozie nata lâpi a châ. He hawhta ngiachhiena a hlaopa hmotaona cha chyhsa phao pahua ta, he hawhta â dopa ta taona ta riethei sipasapazy a deichhy ei. Buakha liata a thôhna ama hmô thei thlâh awpa tlai chhao cha kynu ta a rao ei ta, kyhpachâna hmia pasapa ta a chaleituhpazy a ngiahna pabie awpa he amâ râpasua. A zuatuhpa nata a chaleituhpa zy chhao hmaokha ta laiseih khoh aw ei ta, a zua theipa nata a chalei theipa ta ama dua lymâ thlâh aw. Azuatuhpa nata a chaleituhpa cha hmaokha ta amâ hma asie rairi aw.

Vaitlâh Hmasiena a Pakhâpa

Hmo zuana liata adona a pasô leipa kyh pakhona eima palâsa aw. Sôdaohpa pakha cha, dychhiepa chhônkhâ tawhta laiseih ta, byhnâ vaw to ta sôh a vaw dao thei. Dyhchhiena tawhta sôdaohpa a kaw châ nata hmo zua dâh liata siana, adona, ngiachhina â phahlâ kaw. A tao dâh do lei chaipa miakha cha, hmo yzie a pahno chyhpazy liata hmo mâ dopa ta zuah beih vei. Hmo pahnona a phahla viapa, viarâh kaorâh yzie pahno tu leipa chyhsazy hnohta hmô mâ a paru ngâsâ. Hmo mâ paru ta, ama chalei thei vei nata leibâh ta a chalei sa ei. Hmo yzie a pahno viapa, hmiamo a hnei viapazy liata â do viapa ta hmo a zuah heih. He hawhta hmotaona he vaihtlah hmasiena dopa pakha aw ta, *vaihtlah he haithaina ryu chhiepa a patosa aw ei*. He hawh ta â do leipa ta taopa he basai ta, Abeipa Khazohpa bie maniah chhopa, â dopa maih zy, a siapa maih zy, a pathaihpa maih zy a chadaipa ta eima pasyu.

Ato kyh liata adopa ta tao ta, pathluana hnei leipa ta a chakaopa cha chyhsa thlâh a palôh. ABeipa bie hawhta a chakao vâta ABeipa chhao â ly kaw aw. Athôhna a khohtupa vâta chyhsa nôpona mopa ta khonazie hawta hmo mâ pasâhpazy, riethei dychhiepazy leiba pa-aonazy he basai ta, adopa ta zuah, â byuhpa dei chalei tahpa hro a chhu awpa eima pasyu. Eima pahrana khizaw he sôhryna (business) khizaw châ haw ba ta, he vâta raona eima tlô lei nawpa ta hmo zuana nata chaleina liata kyhpachana a vaopa ta, â dopa pasôpa ta, ngiachhiena hneipa ta chakaopa ta tiama papua chyhu si. Â dopa ta sôh tluana, athôhna pathaihpâ beiseihpa ta hmo zuana nata hmo chaleina ta hmasiena dopa lâ hmaokha ta sie laih suh vy.

Reipahmaona

1. Mara râh liata hmô zua dâh nata chalei dâh ngiaryh chhih viapa, tao dâh pha viapa kyh zy reih pahmao teh.
2. Eima ku liata takâ a y pata nata khozzy thlai chaleina nata leibâh lana liata riahphana he a molei ma reipahmao suh u.
3. Marasawzy hmo chalei dâh eima thai ia ma? Khazohpa bie nata ahmiepa ta hmo chalei dâh reih pahmao teh.

 September 7

HMOTAOPAZY MOHÔH TEH

*Alei nata a chhôh liata a ypa zydua he
 ABeipa eih a châ, khizaw nata a chhôh
 liata a pahrâpa zydua chhao, Tilaipizy chô
 liata ano ta paysa tlô ta, chavahzy chô
 liata chhao pa-isa ta (Hlazy 24: 1-2)*

Ato zydua he Khazohpa bie ta taopa châ ta, Khazohpa bie nata ahmiepa ta taopa zydua he pha ta a ngia kaw hra. Khazohpa bie tawhta taopa chyhsapa nata hmotaopa zydua cha Khazohpa hmiakô liata amâ ngia kaw. Khazohpa taopa zydua cha mâ hnei chyu ei ta, chyhsapa châta sâh ama tlai chyu. Châhrasala tahmâhlâ daihti liata hmotaopa zy raona he a lai ngâsâ. Hmotaopazy ta raona amâ khôkhâh thei nawpata taopathina â ngiah. Hmotaopazy chôta chyhsa taozie pathlaina a y awpa âbyuh.

Hmotaopazy Angiahna

Khazohpa hmotaopa zy cha chyhsa châta ama phahnai khai. Khazohpa bie ta taopa noh nata thlapa, awsi nata awsicharu zy ta Khazohpa kuzô amâ palâsa. Amo cha chyhsa nata husona ahneipa zydua châta ama phahnai kaw. Noh a vaw chhipa he khizaw lâta khaihna a piepa deita ta a daih vei, scientistzy ta noh hmâpa ta solarzy maniah taopa ei ta, mei pakhaihna, solar electric hmâpa ta rai hluhpi a hria thei hrâ. Khazohpa ta ataopa noh he sâhtlaina hluhpi a hneipa hawhta ti pathaihpa nata thlih

pathaihpa chhao hrona a hneipa zydua châta amâ phahnai kaw.

Thlih, vâsua, chavâh nata ti zy he Khazohpa ta chyhsa nata husona ahneipa zydua phana châta a taopa hra. Husona ahneipa zydua thlih pathaihpa sy ei ta, ti pathaihpa do chyui ei ta, vâsua phapa ta chavah tizy a pabie heih. Khazohpa ta chavah liata apahrâpa ngâ, cha-ia, cha-u, iakah nata zaosy zy chhao a tao. Chyhsapa châta hmotaopazy he hmâpa pasaihpa châ taraw ta, aohraona ta hmâ pasaipa lâ châ tiarâh vei.

Hmotaopazy Mohôhna

Khazohpa ta chyhsapa he ano hrialahpa ta a tao. Zawpi ta eima hlypa hmotaopazy mohôh khâsia awpa ABeipa ta rai maniah a pie (Athaona 2:15). Khazohpa cha chyhsapa nata a hmotaopazy he kyh a pachâ kaw. Amo cha akaona phapa hnei awpa ta Khazohpa ta a tao ei. Chyhsapa ta hmotaopazy hu a pahieh khiah chyhsa chhao huhiehna a hmô aw. Akaona phapa vâta chyhsa nata hmotaopazy cha amâ ly rairi hra. Chyhsapa châta hmotaopazy he abyhna liata hmâ pasaipa châ ta, karâ ypa ta lâ hmâ pasaipa châ hlei vei (Athaona 2:16).

Chyhsa ta Lyurâh (ti nata tlâh) Ahmâna

Khazohpa ta maniah a piepa lyurâhpa he kyhpachâna hneina chôta hmâpa a châ. Chyhsapa ta lyurâh thiehpa, lyurâh kawh viapa, lyurâh pha viapazy tao thai khao vei. A y chiehpa a phapa ta hmâ awpa deita a tao thai. Chavâta eima hnei chhôhpa lyurâh kyhpachâ awpa ta Thlahpa Pathaihpa ta maniah a pachu. Hawti

machâ ta lyurâh pasô thaina he Thâtihpha hneina hro miakha a châ. Chyhsapa ta a pahrâna lyurâhpa (ti nata tlâh) mohôhna, pabohsana zô pha kawpa ta a pachâ khiah deita ano pôhpa hrona â paboh thei aw.

Ti nata tlâh mohôh pha leina vâta hmotaopazy amâ rao haw khiah sasyh hrona chhao eima parao hrapâ aw. Ti nata tlâhzy, thokô nata râh sazy, chavah liata a pahrâpa ngazy, cha-iazy, zaosy hpz mohôhna phapa a y khiah deita chyhsapa chhao huhiehna a to aw. Hmotaopazy mohona he keimo a mohona tlaô a châ hra.

Eima râh liata Taopathi Byuhpa Hrona

Eima râh liata taopathi byuhpa miathôh eima palâsa aw. Ti pathaihpa nata thlih pathaihpa eima hnei pazao thei nawpa ta lyurâh kyhpachâna hnei viapâ âbyuh. Lyurâh mei pakâ leipa, parao pakei chakhyh leipa ta a râpasua viana he taopathina mission miakha a châ. Cha cha Khazohpa âlyzie nata ano eima chakaona, eima hro a pabohna chhao a châ.

Khazohpa ta maniah a piepa chavah liata a pahrapa zy huhiehna eima pie thei nawpa ta, ngapata daihti liata nga patuna basaina, chavah liata dynamo hmâpa ta nga patuna basaina, thohna hmâpa ta chavah liata a pahrapa zydua paraonazy basaipa ta Thlahpa Pathaihpa ta bie maniah a pie haw. Reingiana hneipa abyuh.

Lyurâhpa liata sa nata pavaw hluhpi a ypazy he eima chhôhkha hawhta pachana hneipa ta kyh eima cha awpa âbyuh. Amo ta lyurâh liata pawpi papawsa heih aw

ei ta, thotheizy patlai heih aw ta, lyurâh cha â laisa sa heih aw.

Chyhsapa ta hmotaopazy he huhiehna pie sala, hmotaopa ta chyhsapa he huhiehna a pie hra aw. Chatanachata alei cha a thei pathei aw ta, râh cha niepa hluphi papua aw ta, ti nata thlih cha a pathai heih aw. Chyhsapa he ti pathaihpa nata thlih pathaipa tawhta hrona nata hnatlâhna a hneipa eima châ vâta ti nata tlâh mohôh phana he eima hrona nata hnatlana a mohô phana a châ. Thohna-o (hospital) pha kawpa hneipa hlâta ti nata thlih pathaihpa hneina he hrona nata hnatlâna châta a pha via aw.

Reipahmaona

1. Chyhsapa he hmotaopazy mohôhna châta Khazohpa kuphei châ pita, kheita e hmotaopazy nama mohôh?
2. Nama khih mozy ta Khazohpa hmotaopazy chôta nama tao dâh phapazy rei teh. Nama khih chheipâh, lyurâh thokô rikô, chavah liata a pahrâpa nga, cha-u, cha-ia, zao .. hpz chôta nama tao dâh a pha ma?

September 8
HROSOHPAZY BIE LIATA TAOPATHINA

Nâ tawhta a pua awpazy chata, su parohpa, pathaihparoh chipazy cha taopathi heih aw ei ta; chhâ hluhpi lôbôzy cha na paryh heih aw; nâ cha araopa a taopathituhpa, chyhsa pahrana awpa ta lâpizy a taopathituhpa, a cha tah aw ei (Isaih 58:12)

Khazohpa nata patlapasao lei, a biepiepa nata âhmie leipata biechhawhna tao ta, hmotaona zy vâta raona hlupi y ta, thina chhao chyhsa hry liata a y. Châhrasalâ Khazohpa he kyhpachâtuhpa a châ vâta araopa he a taopathi; raona lai chaipa thina chhao cha thyuheihna hmâpa ta a taopathi. Hrosopa hmâpa ta Izarel raona taopathi â chhuana kyh he hawhta eima chu papua.

Hrosohpa Châbu liata Paduana

Khazohpa ta âtlypa Izarel sawzy chhao ama taopasina y tyh ta, ama taopasina theilâpa cha, chakâhnazy, chariahpa vâta raonazy, chariahpa ku liata atahnazy nata sei atahna taih ama tlô. Khazohpa ta â tlypa chipho, Abeipa bie ta chhitha haipazy tlai Khazohpa bie nata ama hrozie âhmie leipa vâta riarina nata raona ama tyh tahpa hrosopazy bie liata â lâ hra. Hrosopa Isai châbu liata chhao â lâ. Châhrasala, Khazohpa ta Izarel he raona liata a lâpi pachhâsa leipa ta, a kyhpachâna ta a paduapathi ei.

Isaih hrosohpa bie liata raona châ he hawhta a chakhi; khih nata râh raona, chyhsa hrona-lyuri bâhkhâ raona (life order), zyhna nata phoryh phapa raona hpz., he a chakhi chai thlyu aw. A phapa ta ato a taopatuhpa ta, araopa he parao pathla leipa ta, a kyhpachâna nata a bie hmâpa ta a taopathi tyh tahpa eima palâsa haw. Ngiachhiena vâta taopathina he a y tahpa eima palâsa via aw.

Khazohpa Ngiachhiena

Isaih châbu liata raona he ryureina riarina nata azaona a hnei. Cha raona liata khihtla raona nata riahpaina chhao âhlao hra. Chyhsa khihsana liata vâsâh chhihpa hluhpi y tyh ta, chazy hry liata riahpaina vâta râh puasai ta, o lei, lyu lei ta yna he raona lai kawpa miakha a châ. Ngiachhietuh Khazohpa deikua la, o hnei lei, lyu hnei lei, raihria hneileipazy châta su paryh heih ta, a chyhsazy aoveihpa ta ama y nawpa ta rai a hria lymâ tahpa hrosohpa bie liata âlâ. He he taopathina cha y aw ta, a daihti chhao a hnia haw a tah.

Chyhsa liata hnabeiseihna a y theikhaoleipa chhao ta, ato a phapa ta tao ta, tlalanazy a taopathi tyhpa Khazohpa ta a vaw pary heih aw. Kô hluhpi seichâna liata a ypa Izarel sawzy liata puana daihti a y aw tahpa Khazohpa tawhta bie a vaw tlô. Cha cha hnabeiseihpa ta ama hâ tyh. Khazohpa cha arao hawpa chipho lâta a heih aw ta, o hneileipa cha kô hluhpi châta adaihpa o pie a chhuah ta, rai hneileipa zy cha raihria phapa pie ta, ama khih nata râh paryh âchhuah haw a tah. He he Isaih, hrosohpa liata ngiachhiena bie avaw tlôpa châ ta, keimo a Marasawzy châta chhao a châ hra.

Khazohpa he a sawzy raona liata siesai beih vei. Amo padua nawpa ta a thatlôleipa ta y hra vei. Ryureina riari vâta ato rao ta, sipasana, tlalana liata buakha a y hawpazy cha Khazohpa ta ama chariahpazy papai aw ta, ama khih nata râh, chyhsa cha a padua heih aw. He he keimo châta chhao a châ aw. Myanmar liata a pahrapazy chhao Abeipa ta maniah a paduapathi heih hra aw.

Covid-19 nata râh ryureina riari vâta raona raroh ypa a tyhpa Myanmar chyhsa, Marasawzy cha buakha eima hnabei â dy. He vâta khoh chhih lei kawpa adyuhna chhao râh chhôn liata thlai a laiseih. Hawtizy school chhao kia thai khao leipa ei ta, sawhkha raihriapa nata sôhpaliepazy chhao raona hluhpi eima tyh. Chyhsa hluhpi cha hrona ama pahlei, sahluhpi cha lô-o ama tah, odyh hluhpi cha mei ta ka haw ta, nie awpa dah dei phahlana eima tlô. Thlalôhna chhao maniah puasai ta chihuna ta khih eima sa. He he Khazoh hrosopa bie a vaw tlôpa a châ; hnatlana araopa, ryureina ariaripa zy cha ABeipa ta taopathi heih aw ta, chhâ hluhpi châta adaih awpa hmo rôhnapa cha Abeipa ta a tao heih aw.

Reipahmaona

1. Khi nata râh raopa a taopathi heih aw tahpa Khazohpa hrosopa bie he hnabei na seih thei ma?
2. Kô hluhpi châta adaih awpa khih nata râh paduana châta a patôhpatia dâhzy reipahmao chyuh suh vy.

September 9

PÔHPA NATA THLAHPA PASANA DOPA

*Nama pôhpa cha nama chhôh liata a ypa,
Khazohpa tawtahpa nama hmôpa.
Thlahpa Pathaihpa o achâ tahpa pahno
vei ei chi ma? Nâmo eih châteipa eichi ta;
mâ ta chaleipa nama châ haw mah tâh.
Chavâta nama pôhpa liata Khazohpa
palyupalih teh u (1 Kaw. 6:19-20)*

Chyhsa thlahpa he chhâzaw hrona tlymâ, chhâzaw thina tlymâ liata a ngia awpa a châ vâta a phapa ta pasapa abyuh ta, eima pôhpa deikua buakha liata alei lâ a kua awpa a châpa vâta eima pôhpa he thlah pa hawhta peimawh vei tahpa apyna he taopathipa âbyuh.

Pôhpa he Thlahpa Pahrâna Opi

Chyhsa sapa pôhpa he thlahpa o châ ta, pôhpa leipa ta thlahpa y bei vei. Vârâh eima tlô hlâ he khizaw liata eima charei chhôh ta, thlahpa cha eima pôhpa liata a pahrâ chy aw. Chavâta pôhpa mohôh pha awpa âbyuh. Pôhpa mohôh ti ta ABeipa bie nata âhmiepa ta mohôhna nata sapa pôhpa (biological point) kao tawhta mohôhna tahpa ta eima pachhai aw.

Ngiapâna kao tawhta pôhpa he thlahpa pahrâna nata thlahpa o, Khazohpa achhyna o achâ tahpa maniah a pachu. He khizaw liata eima y chhôh ta sapa, pôhpa nata

thlahpa he pachhaih thaipa chhao châ vei. Sapa, pôhpa eima pasapa (mohôh) he eima thlahpa pasapa hawhta a châ hra. Chavâta ABeipa Zisu, vârah tawhta za chôpa châ ta, thlahpa nata pôhpa pasa awpa ta biepiepazy maniah a pie. Thlahpa cha Zisu sapa nata thisaih ta pasa pi ta, pôhpa chhao cha ABeipa biepiepazy hmâpa ta chhitha âbyuh hra.

Thlahpa o achâpa sapa pôhpa he pachiahpa hluhpi hnei ta, cha pôhpa liata pachiahpa zydua ta Khazohpa kyhpachâna a palâsa. Chavâta pôhpa pachiapâ zydua he Khazohpa chakao nawpa ta mâ hnei kawpa a châ. Pôhpa y leipa ta Khazohpa a chakao thai beih vei. Sapa, pôhpa liata pachiahpa zydua khâpahmâ châ vei tah theipa châ leipa ta, pôhpa pachiahpa zydua thlahpa nata a chhaih thai beih vei. Sapa, pôhpa he Khazohpa pahrâna o châ ta, mâ a hnei ngâsâ. Chavâta Khazohpa bie nata âhmiepa ta pôhpa mohôhna dâh eima saohiah aw.

ABeipa Khozie hawhta Pôhpa Pasana

Pôhpa he thlah pa opi, Khazohpa pahrana su châ ta hnatlahpa ta a ypa âbyuh. Chatanachata pôhpa he hnatlahpa pôhpa, pahnona nata raihria theina liata a laiseihpa pôhpa a châ thei nawpa ta niedo pathaihpa ta pasapa âbyuh. Sapa pôhpa a laiseih lymâ nawpa ta niedo, abu afai, olyu, achuna hpz he alei thei lei ta hneipa âbyuh tahpa eima pahno chy. Hnatlana nata laiseihna kyh lâta athaipazy riezie ta cha, "niedo pathaihpa ta pôhpa he pasapa a cha khiah a laiseih pha," ama tah. ABeipa bie nata âhmiepa ta pôhpa pasana liata a vai awpa chhao âbyuh. Pôhpa he niedo pathai leipa niena tawhta a puasaipa âbyuh tahpa hi. Niedo pathai leipa; châhnâ meizy, karaozy, khainizy, sadâzy, kuvâzy, sahmâzy he

pôhpa châta niedo pualeipa zy hry liata amâ hlao. He zy he châ thlahpa opi, pôhpa pasana châta phahnai vei. ABeipa Zisu he pôhpa ta eima hry liata a ypa châ mawh sala he niedo pathaih leipazy he â hao ngâsâ aw. A rohria chhao a thei khoh nata a ngia vei.

Niedo Pathaihpa ta Pôhpa Pasana

Pôhpa pasa nawpa ta niedo pathaihpa a peimawh tahpa ABeipa Zisu maniah a pahno khei. Zisu pachuna nata hnatlana lâta dawty (doctor) zy chhao ta nochareih niedo theipa amâ pachu hra. Pôhpa hnatla laiseihna châta dawtyzy ta noh kha chhoh liata achy chai eithoh nie awpa abyuh ama tah hra. Pôhpa laiseih nawpata noh kha ei thoh nie awpa he Abeipa Zisu khozie a châ thlyu aw.

ABeipa Zisu chhao a paw Zawsi o chhoh liata a y chhoh cha a hriapasa hra. He he niedo hneina châta, khisana châta Zisu ta a hriapasapa a châ thei aw. ABeipa Zisu cha a chakaona daihti liata a hriapasa kawpa ngâpatu thaipazy nata amâ kao heih. ABeipa Zisu pôhpa ta khizaw liata a y chhoh ta nie pathaihpany nie hra aw ta, ngâsâzy nie hra ta, a no pôhpa tlahna châta a phahnaipa deita a nie thlyu aw. Chavâta ABeipa Zisu chhao a sapa pôhpa hnatla laiseihna châta âhnalasi deita châ leipa ta, sa, nga zy a nie tyh tahpa Thâtihipha liata ngiana hluphi a y hra. Niedo pathai leipa bâsai ta, niedo pathaihpa niena ta pôhpa mohôhpâpa he Khazohpa khozi nata âhmie kaw. ABeipa Zisu hro he thlahpa hro châ ta Zisu a zituhpazy ta ano hro eima chu lymâ.

Pôhpa Pasana Châta Niedo Thlalôhna

Thlahpa opi a châpa, pôhpa pasana châta nohkha eithôh niedo pathaihpa niepa âbyuhpa vâta niedo phahla leipa â byuh aw. ABeipa Zisu pahnona dâh liata pôhpa pasana châta nochareih niedo pathaihpa âbyuh tahpa a pahno vâta, "Nochareih châta nie maniah pie ma y," tahpa Khazohpa lâta byhnâ hiana dâh a pachu. He bie he *nohkha ta eithôh niepa maniah pie ma y tahpa ta chhopasiapa a pha ei tah. Niedo eima tahpa liata; sa, nga, âhnalasi, athlôhpa, sâhpiti zy âhlaopa he Zisu ta 'niedo' a tahpa a châ thlyu aw.* Niedo châta thlah eima chhâ ti ta, rai eima hria ti ta palôh liata eima my bei lei awpa châ; pôhpa pasana châta noh kha ta niedo phapa eithôh eima nie thei nawpa ta Khazohpa lâ byhnâ hiah ta, hria papuapa âbyuh. Cha cha Khazohpa khonazi châ awta, Marasaw zydua ta eima rapasua cheingei awpa chhao a pha. Thlahpa opipa "eima pôhpa pasana châta hriapasana he ABeipa ta maniah a pachuzie a châ," tahpa Thâtihpha eima phuana liata pahla lymâ âbyuh. Bie cha sapa lâ â liepa hawhta nohkha ta eithôh niedo pathaihpa nata a phapa niedo theina daihti eima tlô thlyu aw.

Zohna tawhta Khaihna Lâ

Pôhpa pasana Thâtihpha he Marawsaw ta eima byuh kaw. Pôhpa pasana kyh nata a zaopa ta niedo patopatiana kyh cheingei liata lâ, Mara râh thotlahsawzy pi he Thâtihpha eima chho hai penawh hlâta eima râhzo via thei aw. Thâtihpha eima chho hai penawh hluhpi cha noh kha ta ei thôh a nie theipa, ahmie pha viapa ta a nie theipazy ama hlüh kaw. Amo cha, "noh charei châta niepa maniah pie ma y," tahpa byhnâ ama to haw ta sila â do

thlâh aw. Thokhazy lâ Marasaw maniah a lyupa ama y hra aw. Kheita a châpa chhao ta, eima thlahpa opi a châpa, pôhpa he a hnatla sala, a laisei nawpa ta noh kha ta ei thôh nie hnei pazaona châta Abeipa lâ byhnâ hia lymâ suh u. Abeipa lâ eima hiapa hawhta hria papuana ta niedo tlua tiamapa eima pasyu chanei khoh hra. Nochareih ta ei thôh niedo thei awpa he vârah tawhta *mana* hawhta vaw tla leipa aw ta, hriapapuana tawhta *mana* pathaihpa tlo eima beiseih aw.

Eima thlahpa pasana châta Abeipa Zisu sapa nata thisai he ngiapâna ta eima niepa nata eima dopa a châ. Eima pôhpa nata thlahpa laiseihna nata hrona châta Zisu eima ngiah hmeiseih. Zisu pachunazy, biepiepazy he ta hroziezy, byhnâ tluana dâhzy, pôhpa châta hriapapuana kyhzy maniah pachu ta, cha cha ngiapâna nata tiamana ta zypa a châ. Pôhpa hnatla sala a laiseih pha nawpa ta noh kha ei thôh niedo phapa nie thei awpa ABeipa lâ byhnâ a hia pi ta, hriapapua dâh phapa tluapa ta hriapapua suh vy tahpa eima pahrua.

Reipahmaona

1. Nochareih niedo eima hnei nawpa ta hria papua dâh ABeipa lâ hia si la maniah a pie thei awpa ta hnabei na seih thei ma?
2. ABeipa Zisu he kuvâ tlymâ, châhnamei tlymâ a tao awpa na pangiasa ma reipahmao chhi teh u.
3. Pôhpa mohona liata niedo phapa hnei ta, a pathaih leipa, sahma, karao, châhnamei hpz bâh sai thei nawpa ta lâpi na pahnopazy rei pahmao teh.

September 10

**NIEDO THLALÔHNA RAIHRIA: KHAZOHPA
RAIHRIA**

*Viachhâ tlâ pangawh nata ngasa miano
cha la ta, avâ lâ uapa ta byhnâ aw ta,
pachhaih ta, zawpi hmiakô liata pie awpa
ta a pachupazy hnohna chata pie ta (Luka
9:16)*

*ABeipa ta Mawsi hnohta, " Pachâ teh, avâ
tawhta nama châta viachhâ ei pasuasa aw
na; zawpi zy ta nochareih nohkha châta
ama tovyuh adaihpa cha a huah tyh maw
sy, ei ryhpa ama zyh ma, zyh vei ma ei
pasia thei nawpa ta (Puasaina 16:4)*

Pati nie ta a hropa chyhsa zydua nochareih nie ama hnei awpa Khazohpa ta a pachhuapanoh khai haw. Chahrâsala chyhsa sâhluhpi nie hnei leipa ta eima y. Khapa vâta a châ aw tly? Eima râh he niedo chakâhna tawhta niedo thlalôhna a hneipa râh ta taopa ABeipa ta a khoh.

Niedo Thlalôhna Raihria: Khazohpa Raihria

Theology kao lâ tawhta niedo hnei thei nawpa ta patôhpatiana raihria he Khazohpa raihria liata â hlao. Niedo papuana nata Khazohpa raihria he azaona a hnei. Khazohpa ta zawpizy hnohta nochareih niepa (mana) a pie tahpa chhithatupa Mawsi chakaona nata ABeipa Zisu chakaona zy liata âlâ pasia. Chavâta zawpizy châta niedo

papuana rai a hria haipazy cha Khazohpa raihrialâhpazy tlaô ama châ. Pastor zy, evangelist zy cha Khazohpa bie pahnosana ta ABeipa chakao ei ta, niedo a papuatuhpazy cha chi cheina raihria tawhta niedo papuapa ta ABeipa hrialâhpa ama châ. Ngâchhihpa ta lyu nata sadô taotuhpazy he ngâchhihpa ta ABeipa hrialâh haipazy amâ châ hmeiseih.

Chyhsa to niedo âdaihpa ta hnei ei se tahpa ABeipa Zisu chakaona liata â lâ pasia; noh charei niedo hnei awpa ta thlachhâna chhao maniah a pachu. ABeipa Zisu pachunazy saipa ta nochareih châta niedo patôhpatiana he Khazohpa raihria chi hluhpi hry liata raihria peimawh kawpa miakha ta â lâ. Chhôhkha niedo hnei nawpa ta siana nata ngâchhihna chôta rai a hriapazy cha ABeipa châta raihria ei ta, ama raihriana ta Khazohpa kyhpachâna amâ palâsa. Amo cha Khazohpa kuphei châ ei ta, niedo papuana ta ABeipa ama hrialâh. Pastorzy, evangelistzy ta Thâtihpha phuana ta Khazohpa rai hrialâh ei ta, Khizaw liata niedo a papuatuhpazy ta viachhâ papôhsana ta Khazohpa rai ama hrialâh. Niedo papuana ta Khazohpa hrialâhpazy eima pôh lymâ khiah niedo thlalôhna eima hnei thlâhâ aw.

Niedo Thlalôhna

Niedo a papuatuhpazy he Khazohpa kuphei ama châ. Amo cha ABeipa châta ngâchhihpazy châ ei ta, ABeipa ta ama chakaona he â ly cheingei aw. Izarel sawzy chôta Khazohpa raihriana nata "mana" piena he akaona a hnei. Mana piena he Khazohpa raihria châ ta, Khazohpa ta Izarel sawzy cha nochareih niedo a pie ei. Kaokha lâ tawhta eima sai heih khiah; pôhpa hrona châta niedo

papuana nata piena he Khazohpa raihria dopa miakha a châ. Ahyrai chhôhkha/ vaitlâh kyhpachâpa ta niedo a tluatuhpa nata niedo hmôna châta a hriapasatuhpa zydua he Khazohpa kuphei châ ei ta, khizaw a tlaichhaipa la châ vei ei. Chavâta rai chi hluhpi a ypa hry liata niedo papuana raihria he khoh via pachai awpa ta eima pasyu.

Marasaw Châta Nochareih Niedo Hneina

Nochareih châta niedo hneina ta Khazohpa eima chakao thei via aw. Manô, mapaw zy hro liata niedo hneina he peimawh chaipa ta ama reih tyh. Niedo peimawhna kyh he hawhta ama reih, "Pazu a ri vâta pavaw a ri vâta a thi" ama tah. Chhâzaw hrona kyhzy reina ama pahno mah leina daihti liata manô mapaw zy ta chakaona peimawh chaipa ta ama vaw pahno hawpa cha, nochareih châta niedo hneina he a châ. Kaokha lâta eima rei khiah; niedo he hrona tlu ta â peimawh. Manô mapaw zy cha ku raihriazy tiama ei ta, niedo papua hluch ei ta, cha ama chakaona cha ABeipa khozi nata âhmie kaw. Krizyhna a y hlâ tawhta ABeipa he Marasawzy hrialâhpa achâ haw tahpa a lâ ta, niedo thlalôhna châta hriapasana he eima vaw thai chiehpa miakha châ ta, pahro lymâpa âbyuh.

Marasawzy ta Khazohpa raihria eima pahno dâh taopathipa âbyuh hmeiseih. Niedo thlalôhna eima hneina taih hriapapuapa he ABeipa ta maniah âhnawpa rai a châ hi. Cha cha Khazohpa kuphei eima châna chhao a châ hi. Niedo hnei vâna tahpa ta kudao lai awpa he Khazohpa ta maniah â chhuakhei chaipa la châ aw vei. Khazohpa khohpa raihria tahpa he reithaina hlâ ta ABeipa palyupalihna, Khazohpa bie phuahna nata thlachhâna liata

pachhâleipa ta, Khazohpa raihria cha, cha hlâta â kathu via tahpa pahno ti âdaih haw. Molei ngiathaina kyh, vârâh kyh zy eima chho lymâpa hawhta nochareih niedo hnei thei nawpa ta hria papuana kyh chhao eima Thâtihpha liata paluahsa viapa eima pasyu hmeiseih.

Reipahmaona

1. Kypachâna chôta niedo papuana châta raihriatuhpazy he Khazohpa kuphei ama châ tahpa nâ py dâh a châ ma?
2. Nochareih niedo thlalôhna eima hnei nawpa ta zawpi ta hriapazi dâh kheih ta eima tao khiah a pha chai aw?

September 11

KHAZOHPA BIE TA A BOHNA

Alei phapa liata chi a tlapa deikua cha ahyrai bie cha thei ta, pahnopasia ta, a thei pathei tlai ta, thokha a lie zakha ta, a hropa a lie sycharu ta, nata a hropa a lie sythôh ta a pathei tah ta (Mathai 13:23)

Khazohpa châ bie to, Khazohpa huso tlupa maih cha, pachuna kyh liata zy, thailei pachâsana kyh liata zy chhoreina kyh liata zy, siana pachuna kyh liata zy, a phahnai hra. Khazohpa chyhsa cha raihria phapa to hria awpa ta, a kipa ta a tobipa ta a paki thei nawpa ta (2 Tim 3:16-17)

Khazohpa bie pahno ta a zypha chipho cha ama nohhlaona amâ hmô aw. Khazohpa cha chi to, pho to, chanô-chapaw, hawti-machâ zydua thei thai awpa ta bie reih ta; ABeipa ao a nahthlie phapazy cha raona khôkhâh ei ta, abona ama to. Khazohpa bie liata hrona, tlâhna, khaihna, abona zy y ta, Zisu Krista biepiepa, ‘na vaih kyhpachâ ma y’ tahpa taovyuh eima hnei hra.

Khazohpa Kyh eima Pachâ

Khazohpa bie zyhna ta Khazohpa kyh pachâ pi ta, keimo kyh eima pachâpa hawhta viasa, khihsaw, chheipâh chyhsa kyhpachâ awpa ta taovyuh eima hnei hra. He he chyhsapa châta bie phachaipa a châ. Vaih kyhpachâna tahpa liata zyhna alyu leipa, rei nano acheipa, eima

khakhaipa zy taih kyhpachâpa a châ âtah. Eima lyuleina vâta ahaona, tâchhie reina, apathluana zy ta chyhsazy thlalôhna pie hlei vei; ahaona vyuhpa ta khakhaipa tlai cha kyhpachâna ta chyhsa phapa ta a tao thei. Ahaona, pachhiena, a chariahna zy cha Khazohpa kyhpachâ nawpa ta maniah a pakhâ.

ABeipa Ao Nahthliena

Khazohpa ao/bie nahthliena ta hmo dopa liata maniah a chhitha via tyh. Khazohpa ao a nahthliepa Abraham, Mawsi, Zawsua zy cha Khazohpa bie nahthlie ei ta, ama ngiapâ hra. ABeipa bie cha ama lâpi châta khaihna châ ta, ama chakaona liata hlaotlona byhnâ to ei ta, phopi rônahpa chhao ama padua thei haw. Zisu nô Mary cha ABeipa bie nahthlie ta pachhatuhpa nô a vaw châ haw hra. Khazohpa bie nahthlie ta, hmotao raihria a chhuahna tawhta hlaotlona nata thlalôhnazy eima to via cheingei aw. Zisu Nô Mary bie cha, "ABeipa bie he nahthlie ula, taopazi teh u," a tah.

Chahawhta, Kena khih liata kyh a chhipa chhôhkha cha Kresawhti ama pahla haw. Kychhituhpa châta noza a chhi aw ta, ama nôpo kaw aw. Châhrasala a pahla hawpa chhôkhazy cha Zisu bie chhopa he pakhata(liasah) ta nahthlie ei ta, a bie nata âhmiepa ta chôtlana rai ama hria tawhta kyhchhi ahlaopazy châta abyuhpa Kresawti pha kawpa a vaw pua lymâ thlâh haw. Chyhsapa pachâna nata ropadyna deita ta a pahnieleipa ta Khazohpa bie nahthliepa ta hro achuna, chakaona, pachuna hpz,.. ta hmo phapa hluhpi a papua. Zawpi eima byuhpa he ABeipa ta pahno ta, pie theina chhao a hnei thlâh hâ.

Mawsi cha ABeipa tawhta a hmôpa biezy he a pasia (Puasaina 3:6). Bie cha pasiapa achâ khai tawhta zawpi lâta a phuah tyh. Chatawh cha Khazohpa bie ta zawpi cha â chhitha ei. Chavâta chyhsa to hnohta Khazohpa ryhpa bie pahnosapa he pha ta, paduana a khohpazy châta Khazohpa bie he mâ a hnei kaw. Chhôngkha liata, vaihtlah liata, raihriana suzy liata ABeipa bie pahnosapa, ABeipa bie nata ahmiepa hrozi zy palâsapa ta, pakha nata pakha kyh a pachâpa ta a deichhy suh u.

ABeipa Bie Asaohiahna

Khazohpa bie eima nahthliepa deita a daih vei, lâpi dopa eima chhi nawpa ta ABeipa nata asaohiahpa âbyuh. Thlachhâna ta ABeipa ao/bie â nahthliena hi. Zisu Krista tlai cha Kesamani sadô liata phaohripa ta a yna daihti liata thlachhâna ta Paw Khazohpa â saohiah. Eima Beipa Zisu lâpi a chhihpa ta hmo eima taopa maih liata ngiapâna ta thlachhâpa ta, eima lâpizy pasiapanôpa abyuh (Chaphôhtuna 3:40). Elaiza hawhta ABeipa cha thlahchhâna ta eima saohiah thei. Elaiza cha ABeipa asaohiahpa ta avâ suah heih ta, a lei cha a thei avaw papua heih.

Khazohpa bie/ao nahthlie ta, ano nata asaohiah phana ta hrona lâpi dopa eima pahno thei aw. Tahmâhla social media (facebook, twinter hpz), bielôhawhpa reina zy liata eima lâpi pachhâpa he â do aw vei. Chazy hlâta Khazohpa bie hmaokha ta apakyh, ABeipa bie nata ahmiepa ta patlapasao, thlachhâna chôta hmialâ tôh lymâpa he a pha aw. ABeipa asaohiana chôta hmaokha ta laiseihna (growing together) luapa he a pha via chai. Eima khoh dâh hawhta ypa, reipa he byhnâ hnei aw vei.

ABeipa khoh dâh nahta âhmiepa hrona a chadaipa ta eima daihti hmâpa a pha chai aw. Khazohpa châ bie ta he hawhta maniah a chho, “ABeipa ao he pakhata ta nahthliepa ta eima lâpi zy he ABeipa khohzi nata âhmie/hmie lei mopasia ta hmialâ sie lymâ suh vy,” (Chaphôhtuna 3:40) a tah.

Reipahmaona:

1. Kheita e Khazohpa ao nahthlie nâ chhuah? Biehrâi na reipa tawhta Khazohpa ao na thei ma?
2. Thlachhâna tawhta ABeipa ta acha chhupa a y khiah Testimony reih teh.
3. Social media (facebook) na mopa tawhta thlahpa lâ alyna na hmôpazy reih pakawh teh.

September 12
KHAZOHPA ACHHYNA DAIHTI

*Pahânoh he pathaisapa ta, a ô awpa achâ
tahpa a thei thlâh hâ teh, Noh charu chhôn
ta na hria awpa châ ta, na raihria zydua
na hria awpa a châ; a noh sari noh deikua
cha, ABeipa na Khazohpa châta pahânoh
a châ ... (Puasaina 20:8-9)*

Khazohpa cha maniah ataotuhpa châta, eima daihti phapa piepa ta ano eima chhy. ABeipa châta daihti a piepazy ta ABeipa nahta akaona phapa hnei via ei ta, hâta eikha liata nohkha ABeipa nahta akaona daihti hmâpa deikua leilô y tua noh tawhta a vaw y haw. Awnanopa, Khazohpa sawzy pi ta Khazohpa noh (Sunday) he ABeipa nahta akaona, reithaina, achhyna, ngiapâtuhpazy akaona ta hmâpa he ABeipa bie nahta ahmiepa hro a châ.

ABeipa nahta Akaona Daihti

‘Hâta eikha liata nohkha Khazohpa châta daihti pie ma y’ tahpa he pachuna thabypa liata â hlao. He pachuna he pahânoh pathaisa tahpa nata azaona a hnei hra. Athaona chabu (2:1-3) tawhta lapapuapa ta; Khazohpa cha rai a hriapa châta a pahâna noh a hnei hra. Noh charu chhôn raihria ta, noh sarina nohkha he â pahâna noh ta rao ta, cha noh cha a hmotaopa zydua châta byhnâ a aw. Khazoh noh, ABeipa achhyna châta daihti eima hmâpa he ABeipa tawhta byhnâ eima lana, eima hro tha a pathiehna a châ tahpa â lâ pasia.

Pahânoh tahpa he reipasiasia dâh hluhpi a hnei. Khazohpa ta chyhsa hnohta noh hmâna dâh, daihti nata noh hmâna dâh a pachu. Pahânoh tahpa cha, "achalih, chalihsa," tahpa yzie a hnei hra. Pahânoh cha eima pôhpa châta raihria chalihsa ta, eima thlahpa lâta palôh pahiena tahpa yzi a hnei. Pahânoh tahpa he raihria leipa ta azia tahpa yzi hlâ ta, raihria haipazy bâh sai chy ta, Khazohpa lâ palôh pahiepa ta, achhyna châta daihti hmâh tahpa yzie a hnei. Chahleikhô ta Khazohpa reithai palyupalihna, ngiapâtuhpazy hmaohkha ta Khazohpa nahta akaona ta noh hmâ tahpa yzie a hnei hra. Keimo awnanopazy châta la pahânoh he Khazoh Noh (Sunday) ta pi ta, ABeipa bie hlâ ta Khazohpa nahta akaona ta eima hmâ.

Ngiapâtuhpazy Akaona

ABeipa Zisu tlai chhao nohkha he Khazohpa achhyna châta daihti a pie tyh hrâ (Luka 4:1). Hmotaopazy châbu (Ht. 20:7) tawhta pahânoh/thyuheihna noh he hmaohkha ta achhyna, ABeipa tlâhkhai chakaonazy ta hmâna kyh maniah a pachu. Zisu thi ta a thyuheihna kyhzy rei ei ta, ABeipa reithaipa ta, ngiapâtuhpazy hmaohkha ta akaona noh ta hmâpa a châ heih. He hawhta noh hmâna he Krizyhpazy châta athôhna a y. ABeipa eima chôta a taona, chhithana zy reipati ta, alyna bie reina daihti châ ta, ngiapâtuhpazy zawpi palôh miakha ta ABeipa reithaina châ heih ta, ngiapâlâhpazy nata akaona pathaihpa hneipa châ heih ta, eima pôhpa châta pahâna daihti ta eima hmâpa he ângiah kaw. Viasa a pakyhna châta lôhawhna châta, party taopa châta Khazohpa Noh hmâna deikua a do vei.

Khazohpa Noh he thlahpa lâ byhnâ a lana noh a châ. Khazohpa Noh cha hâta eikha noh charu chhôn ta eima tao hriapazy mopasiana daihti ta eima hmâ thei. Khazohpa reithaina, palyupalihna châta daihti hmâ pi ta, ngiapâna thazâ eima la thei. Hriatuanoh tawhta pachynoh taihta raihria lâ, Khazohpa Noh (Sunday) he ABeipa châta hmâna he thlahpa châta pha ta, sapa pôhpa châta chhao alyna nata tlâhna a châ.

Khazoh Noh Hmâ Phana

Khazohpa ta chyhsa to raihria tiamapa bie pie taraw ta, Taotuhpa Khazohpa châta daihti pie teh u a tah hra. Eima Beipa Zisu taozie cha; pahânoh he Khazohpa ryhpa bie nata pachuna, nahthliena, achuna ta a hmâ tyh. Cha cha keimo ngiapâtuhpazy lâpi a châ hra. Kyh eima pachâpa châta daihti â pie thei tyhpa hawhta Khazohpa kyh a pachâtuhpazy châ ABeipa reithaina nata palyupalihna, mopathaihpaazy akaona châta Khazohpa Noh he ama hmâ tyh. ABeipa nata a kaoleipa or ABeipa châta daihti a pie thei leipa zy cha thlah lâ pasana amâ hnei thei. Amo cha lyurâh chawkaraipa (Hlazy 63:1), ti ahnei leipa hawhta châ ei ta, ama hrona mâ a hneilei kaw. ABeipa châta daihti a piepazy cha hmô phapa a chu hlul ei ta, vaihzy nata akaona phapa hneipa ta, hmo paraona châta daihti hnei vei ei. Alyna, thlalôhna nata hmô phapa byhnâ chhao ama to. Khazohpa Noh paraona bâh sai sila, ABeipa châta daihti piepa ta thlahpa lâ byhnâ a la chyuh suh vy.

Reipahmaona

1. Khazohpa châta daihti na pie tyh ma? Khazoh Noh (Sunday) ta Achhyna o tlôpa a peimawh dâh reih pahmaoh teh.
2. Khazohpa noh liata ngiapâuhpazy hmaokha ta a chhyna eima hnei tyhpa he khihtlah a paraona a y ma? He noh liata nâ phahnai vâta na phahnao kheinazy rei teh.

September 13

DAIHTI HMÂ PHA MA Y

*Ato châta daihti raopa châ ta, avâ ry ta ato
châta daihti rypaohpa a y; pina daihti y ta,
thi daihti a y; lo daihti y ta, lo chiehpa
phiah daihti a y (Biechhotuhpa 3:1-2)*

Chyhsapa daihti he chy kaw ta, nochareih
ABeipa ngiapâna liata a duapa ta hmophapa miakha chhâ
taona ta daihti hmâpa a pha kaw.

Khazohpa khohzie nata ahmiepa hmopha taona ta
daihti na hmâ khiah, a mâ hnei ta, nâ ly kaw aw. Bie phapa
reina ta, chhôhkha nata opâh lyuhrizy palysana ta daihti
hmâh tyh sila ABeipa maniah aly kaw aw. Daihti he sôh
ta, a mâ hnei kawpa ta hmâpa he Khazohpa byhnâ a
pasôpa amâ châ.

Pôhpa Châta Daihti Piena

Khazohpa ta Ada hnohta hro chhôn ta niedo tluana
raihriapa bie a pie, "rie theipa ta raihriana ta nie na tlua
aw," a tah (Athaona 3:19). Raihriana châta daihti hluhpi
na piepa abyu tahna chhao a châ. Niedo tluana châta daihti
piepa he Khazohpa biepiepa pasôna miakha châ hra ta
daihti hmâna dopa chhao a châ. ABeipa bie pahnona deita
adaih leipa ta, hria papuana châta daihti hmâ sila, ABeipa
eima chakao thei aw.

Pôhkha niedo atluana châta daihti hmâpa hleikhô
ta, vaihzy nata akaona ta chakaona châta daihti hmâ

abyuh. He he nâ kyh nâ pachâpa hawhta na vaihzy kyhpachâ ma y tahpa a châpa vâta he bie he hawti, thyutlia nata nôpaw zydua châta yzie hluhpi a hnei. Hawti machâ zydua raihria phapa châta daihti pie teh tahpa yzie chhao hnei ta, chhôhkha/viasazy nata apalysana châta daihti hmâ ma y tahpa yzie chhao a hnei. Tlâhna daihti na hnei chhôn ta diathla kha, a phapa nata zachhihpa maih hria lâ, alyna daihti chhao hmâ âbyuh. Sôh a tluapa ta a daihti hmâ pha sala, sôh cha tlua se. Achu haipazy cha vaihzy deichhy theina taih tiama papua ei sala, a chu ei se. Ato châta daihti raopa a châpa hawhta; raihriana daihti hleikhô ta, apalysana daihti, nochareih ABeipa nata akaona daihti hneipa chhao âbyuh.

ABeipa châta Daihti Hmâna

Tahmâhla chyhsa hluhpi cha, "ei rai tly vei, ei bua kaw," tahpa bie ama rei tyhpa na thei aw. Châhrasala, chyhsa hluhpi cha Khazohpa biepiepa liata palôh pachôhna (meditation) nata my thlachhâna daihti ama hmâ. He he ABeipa nata daihti hmâna châ ta, he hawhta daihti ahmâpazy cha hnabeiseihna nata alyna zy ama to via lymâ. He hawhta daihti hmâ thaipa he taozie dopa châ ta, Zisu pheihnie pazi hualuana chhao a châ. Nohkha chhôn daihti eima hneipa liata mydi daihti he a pha chai. Viasazy, awnanopazy nata a kaopa ta thlachhâna ta daihti â hmâ thei hra. My daihti eima hnei chhônha liata daihti pha chaipa cha a châ. He he ABeipa pie ma y. He hawhta daihti pha chaipa liata ABeipa lâta thlachhâpa he Khazohpa âly hmeiseih. ABeipa Zisu chhao mydi ta thla a chhâ tyh. A daihti phapa he Paw Khazohpa hnohta pie ta, Paw Kahzohpa bie liata palôh a pachôh.

Ngiapâna ta A Phachaipa Piena

Abela châ ngiapâna ta apha chaipa he ABeipa lâta a pie (Hebrai 11:4). Chavâta Abela hmotaopa ta Khazohpa a palysa kaw. Abela hmotao zie ta he hawhta maniah a pachu, "ngiapâna ta ABeipa châta daihti phachaipa pie teh," tahpa hi. Khazohpa he pha ta, eima hneipa hry liata daihti phachaipa chhao pie tlâh a châ. Lyuchâpa Pawla cha ngiapâtuha zy daihti rypaohpa patu a chhuah teh u a tah. Ngiapâna pahlaopa ta amôna daihti, raihriana daihti, achhyna daihti, ngiapâtuhpazy akaona daihti tahpa ta daihti hmâ suh u. Abela cha ahnei chhôhpa liata a phachaipa he ngiapâna ta Khazohpa hnohta a pie khiah, keimo chhao mopathaihpa zy lâpi a chhihpa ta eima daihti phachaipa he ngiapâna ta ABeipa lâta pie suh u.

Chyhsa cha daihti achyhta dei a hnei. A daihti hnei chhôhpa he yzie hneipa; pôhpa châta hria papuana nata ABeipa chakaona châta daihti hmâ pha mawh sy. Chyhsa he ngiapâna ta a daihti hmâ sala, a daihtita ta raihria sala, nochareih hmophapa taopa pachâ se. Pôhpa châta raihriana daihti hmâpa hawhta my nata zâ he ABeipa nata akaona ta daihti hmâ sela a pha aw.

Reipahmaona

1. ABeipa ryhpa bie pachâna nata ABeipa reithai palyupalihna, thlachhâna zy châta daihti eima pie chyhna chhâpazy reipahmao teh.
2. Sapa pôhpa a palysana châta chhôhkha daihti hmâ awpa âbyuh ta kheï ta e nama hmâ tyh? Chhôhkha/viasa a palysana châta daihti hmâ dâh phapa reipahmao ma y.

September 14

OCHHÔH TAWHTA TAOPATHINA

*Chyhsa sopa chho lâ, a soh pachai aw;
chyhsa sohpa pachu lâ, thaina liata avaw
pôh aw. ABeipa china he sohna thabya
châ ta, Mopathaihpa (Khazoh Pathaihpa)
pahnona he pahno thaina a châ (Biesozy
9:9-10)*

A sohpa ta a padua tyh; ahrupa deikua a parao tyh. A sohpa ta hmo parao rarua vei, araopa he a phapa lâta a taopathi tyh. Ahrupa châ Khazohpa ryhpa papeisa vei; a chahraochatôh. A sohpa ta chahraochatôhpazy hmotaopa liata a pahlaio thei hra vei. Châhrasala ABeipa ryhpa ta chyhsa a ngâpazy a pasô tahpa vâta chyhsa to ABeipa ryhpa a chupa ta amâ vaw so aw. Â dopa vaw pasô aw ei ta, paraonazy avaw chyh via lai aw. Achuna he hmosôhpa a châ vâta achuna su phapa miathôh kyh eima rei aw.

Chhôhkha Achuna Su

Chhôhkha he eima laiseihna su nata achuna su peimawh kawpa a châ. Chhôhkha he ABeipa ryhpa achuna su phapa ta tao cheingeipa âbyuh. Chhôhkha liata tao awpa nata taolei awpa eima pachu. Khazohpa bie thabya; *Biehrav Piepa* he ngiapâna ta, a pha kawpa ta eima pachu thei. He ABeipa ryhpa miahrawhpa he chhôhkha member zydua a vao awpa châ ta, my nata zâ ta ngiapâna avaopa ta pathieh tyhpa a pha. He ABeipa ryhpa bie ta chhôhkhyzy hrozie pachu aw ta, chyhsa ta a tao awpa pahno thai via aw ta, tao lei awpazy cha â chalih sai

thei aw. ABeipa ryhpa bie ta chhôhkha hrozie pachu aw ta, â dopa pasô aw ei ta, lâpi dopa, padua thaina lâpi liata amâ chhitha aw.

Awnanopa liata Achuna

Awnanopa a hmaohpakhyna su liata ABeipa ryhpa biezy nathlie ta eima chu thei hra. Eima sawzy nata chhôhkha he Khazohpa achhyna su tlôkheipa âbyuh. A saw nata a chhôhkha achhyna o a tlôkheipazy cha tlahna nata hrona o lâ amâ pangai. Cha liata Khazohpa bie a chuna nata Thâtihpa nathliena a y. Achhyna su nata ABeipa bie a chuna su tlôpa ta eima ngiapâna laiseihna chhao a tao. Awnanopa liata palôh hmeiseihpa ta a pahlaopazy cha thlahpa lâ sona hmô ei ta, a phapa maih a chu kho ei ta, hrozie chhiepa cha amâ râsai aw. Awnanopa chakaona, pachunazy he pahâna/thapawhnazy pie ta chyhsazy hnohta hro ryhraothainazy, pathaihnaazy a pie hra.

Awnanopa tawhta Achuna Pachiahpa

Abaraha pathla tawhta Zisu pathla achâpa awnanopa ta pachuna he ochhôn nata "synakaw" (Zuyu ryhpa apachuna su) liata ama vaw tao lymâ. Synakaw he Biehraw Piepa nata ABeipa ryhpazy a chuna su ta hmâ ei ta, hnôh lâ tawhta châ achuna su ta ama hmâ hra. Synakaw liata achuna châ tao awpa nata tao leipa zy amâ chu. Pahnona nata thaina zy â vaw sâh via lai nata synakaw liata Science (maths, physics, biology hpz) nata a zaopa a chuna chhao âvaw pahlao. Science ta âchhuhpa miakha cha, â do viapa pahnopa nata â do viapa apypazy he a châ. Cha cha Khazohpa bie, hrosopazy biezy nata âhmie kaw.

School liata achuna he Awnanopa pachuna nata azao laihna a hnei hra.

School liata Achuna

Awnanopa nata chhôhkha hleikhô ta school he a chuna su peimawh kawpa avaw châ. Sawzy ta sona pathaihpa he school tawhta zy amâ chu papua. School liata hmophapa kyhzy, chyhsa phapa kyhzy, taozie dopa kyhzy, hmotaopazy kyhpachâna kyh hpz., amâ chu. Chavâta school nata awnanopa cha chyhsazy sona pie ta, a phapa pasô ta reingianazy amâ pachu. Achu phapa hawti nata thyutlia hluhpi cha hmotao dâh dopa pasô ei ta, a phapa chhao amâ padua thai. Achuna su phapazy papipa he chakaona dopa châ ta, hmo a phapa ta taona lâpi a pahyuhpa ama châ hra. School liata pachuna phapazy ta Thâtihipha nata âhmiepa hroziezy tao papua ta, school he pahnona kawhpa a hneipa chyhsa nata hmophapa hluhpi a papua thei hra.

Achu Phapa Pahruana

Hmophapa achu thaina hro he ABeipa khohzie châ ta he he thlahpa hrozie ta eima ngia thei. Ochhoh, awnanopa nata school liata a chuna zydua he laiseihna dopa châta a pahnai. Achuna zy ta thlahpa hrozie maniah a pachu. Achuna tawhta sona pathaihpa nata pikheipa sona hmâpa ta hrona lâpi dopazy lâta maniah a chhitha vâta hawti machâ a chuna liata thathyuna hnei suh u. Marasaw ta a chuna miathôhpa he pasô kawpa a pha. Chyhsa ta hmopha viapa âchu ti ta, hmialâ atôh thei aw. Achuna pasô ei sila, awnanopa liata pachuna he hrozie laiseihna châta pasô via pachaipa a pha. ABeipa khohzie

nata âhmiepa ta a chuna to rai tha patlô pi ta, sapa nata thlahpa lâ hrozie eima chuna tawhta waitlâh nata awnanopa thla eima palôh thei aw.

Reipahmaona

1. Nôpawzy ngiapâ daithlana he ochhôn liata a chuna su phapa ta eima hmâ thei nawpa ta a pakhâ ma reipahmao teh?
2. Eima MEC awnanopa liata pachuna nata achuna phapa eima hnei thei nawpa ta na khokheipa zy rei pahmao teh.

September 15

PARU KHÂ!

He ryhpa châbu he ta na pakah cha puasai chachei kha se, châ bie ropa zydua cha khâchâ na zyh thei nawpa ta, chhô nata zâ ta na pachâ awpa a châ; chatanachata na lâpi cha patlâ lymâ aw ta, thlaochhipa ta na y aw (Zawsua 1:18).

Kô tato ta nama lyu liata a veihpa zydua suhrawh liata sukha nama panano thlyu awpa a châ (Ryhpachaneina 14:22)

ABeipa pachuna liata aypazy cha lâpi dopa liata ama siepa vâta chileipa ei ta, thlalôhpa ta amâ duah thei aw. ABeipa bie he abohna lôpinô a châ. Khazohpa bie he thei ta, a taopa cha riarina, rairuna zy y hrasala paoleipa eita, ama duah thei thlâh aw tahpa ABeipa Zisu ta maniah a chho haw (Mathai 7:24).

Na Paru Awpa Châ Vei

ABeipa ta tao awpa nata taolei awpa maniah a pachupa hry liata, "Na paru awpa châ vei," tahpa he hrozie nata azaopa Khazohpa bie, chyhsa ta a taolei awpa pachuna a châ. Paru leina tahpa cha, "na tovyuh a châleipa cha la kha," tahpa ta â reipasias thei. "Paru khâ" tahpa bie he tahmâhla khizaw ta eima ngiah kawpa bie achâ hra. He pachuna he chyhsazy lâpi dopa lâta âchhitha. Paruna a yleina liata chyhsazy thlalôhna ama hnei. He pachuna bie

a taopazipazy cha ngâchhihna nata zachhina byhnâ chhao ama to.

Biehneituhpa nata chhituhpa zy liata a ythaipa paruna miano eima palâsa. Tovyuh a châleipa takâ avyuhna nata bieheina avyuhna zy he paruna tahpa liata eima pahlaho thei. Paruna chi hluphi y ta, he liata rei pazao hlei khao aw mapi. He paruna hmo mianopa he râh luhpazy, vaitlâh chhituhpazy, department to liata chhituhpazy, sahlaozy liata chhao a y thei. Châhrasala Khazohpa bie papeisana hneipa ta, eima tovyuh liata alyna, eima taovyuh liata ngâchhihpa ta taonazy vâta paruna tawhta eima pathaih.

Paruna he Raona

Pasaina yleipa ta, eima eih a châleipa hmâna ta “na parupa châ vei” tahpa bie eima parao. Ahyrai a tovyuh a châleipa, tovyuh ama pieleipa chhu/ a la khiah Khazohpa biepiepa parao ta, paruna liata pao heih ta, ano sasyh chhao âparao. Paruna vâta Khazohpa nata akaona chhao a parao. ABeipa Zisu a zituhpa, Zuda Iskri he phupy eih takâ âvyuh tahpa a lâ. Zuda Iskari cha paruna vâta ABeipa Zisu hnôh zi khao vei. Khazohpa nata amâ kaona rao ta, ano cha leidiana liata alâpi a chhâ. Paruna he raona; pôhpa nata thlahpa raona a tlôkhei. Takâ nata bieheina avyuhna ta raona a tlôkheizie pakhona miakha palâsa tua suh vy.

Khieh khikha liata sawhkhâ school o asapa company miakha cha concret school o sa ta, a patlô haw tlai. Biehneituhpazy nata ama chhônia thaipa vâta school o building cha ama pypa haw. Anodeikua, kôkha chhao ama hmâ hlâta school bulding cha a cho pathao. Hmâ

phakhao vei tahpa ta amâ phuah. Athaipazy ta he school building kyh ama chu papuapa cha, o sana chhaichhi dopa hmâ vei ama tah. Bie chyupa ta eima rei khiah, o a satuha ta ano tovyuh leipa takâ a nieparu hluhtu vâta he raona he y ta, biehneituhpazy ta a doleipa ta biehneina ama hmâh tahpa hi. Chyhsa pakha avyuhna vâta school hawti hluhpi cha riethei tao ei ta, cha khiih liata hawti hluhpi achuna chhao ama riari kaw. Chyhsapa ta ano tovyuh âdopa ta a la sala, mohropa nata Khazohpa tovyuh chhao âdopa ta a pie khiah thlalôhna nata hmophapa hluhpi a papua aw.

Khazohpa eih Piena

ABeipa ta ano eih he âdopa ta pie awpa âhaw. ABeipa eih âdopa ta piena ta ano nata âdopa ta eima zao ngâ hra tahpa a palâsa. Suhrawh liata sukha piena he hmôtheipa liata ABeipa nata eima zaona phachaipa miakha a châ hra (Ryhpachaneina 14:22). Chyhsa ta ABeipa eih âdopa ta a pie khiah ano cha "paruna" tawhta a pathaih. ABeipa eih avyuhna ta thlahpa liata sipasana, diathlana, thazeina a tlôkhei. Thlahpa lâ alyna chhao a padiah. Khazohpa tovyuh piena liata sialeina he thlahpa lâ kyh liata paruna miakha a châ. Zisu pachupa Zuda Iskri chhao paruna abâh sai khaoleipa vâta takâ sythôh ta Zisu a zua (Mathai 26:14-15) heih. Chyhsa eih paruna he raona tlôkhei ta, Khazohpa eih pieleipa ta yna he paruna châ hra ta leidiana a tlôkhei.

Paruleipa ta Pasyuna

Pôhpa nata thlahpa liata abohna nata alyna eima hnei nawpa ta paruleipa eima pasyu. He he ABeipa ta bie maniah a piepa cha châ ta, eima zyh cheingei awpa bie

chhao a châ. Eima viasa eih tlymâ, eima vaih eih tlymâ, sawhkhâ eih tlymâ, Khazohpa eih tlymâ paru pasaipa châ vei. Paruna he chyhsapa lâpi châ vei. Eima lâpi a châteipa eima chhih khiah pavia aw pita, eima leidia aw. Eima tovyuh a phapa ta hmâna chôta ABeipa lâpi eima chhi aw. ABeipa eih chhao âdopa ta eima pie aw. Ahyrai "paru kha y" tahpa bie thei ta, a taopa cha raona hluhpi nata leidiana a khôkhâh aw. ABeipa bie papeisa ta paru a râsaipa vaitlâh nata râh cha thlalôhna râh, pakiana râh ta a vaw châ aw.

Reipahmao awpa

1. "Paru khâ" tahpa biepiepa paraona vâta a tlôtheipa raona kyh reipahmao ula, biepiepa eima zyh thei nawpa ta taobyuhpazy rei teh.
2. Khazohpa eih na paru beih ma? Suhrawh-sukha na pie dâh âdo thei ma?

September 16
SIANA PASÔ LA NA LAISEIH AW

He o liana he ta kei hlâta a lai viapa ahyhmâ y leipa ei ta; ei lapinô na châpa vâta nâma dei tah'leipa ta cha, kei liata khâpahmâ a pasaih'leipa hnei hra vei; kheita e, he moleina lai ngaitapa he taopa ta Khazohpa chô liata hmo ei parao thei aw? (Athaona 39:9)

Zisu ta ama hnohta, "Nama chô liata thlalôhna y mawh sy. Paw ta Kei eina tuapa hawh hra ta, ei cha tua ei hih," tah heih ta (Zawhana 20:21)

Khizaw siekheina hawhta thotlâh Marasaw nata awnanopazy chhao eima chhôhkha, pahrâna thotlâh khih, eima laiseihna awnanopa zy puasaipa ta, khipi, râhpipa lâta a siepa ama pôh via lymâ. Khihipipa cha a hneirôhpazy yna su, raihria a hneipazy yna, raihria atlua haipazy a pahmaona nata o hneilei, lyu hneilei, rai hneileipa zy yna su achâ hra. Khihi a tlôpa thotlâh Mara sawzy chhaota khihipipa hrona dâh; takâ hmâpa ta ato chaleipa he hmo thiehpa hawhta eima vaw chu ngâ. Khihi a tlôpa thotlâh sawzy cha khisana châta takâ hneina nata eima thaina zy chyh kaw hrasala; ngâchhina, tiamana nata adeichhy thaina hro he eima peimawh. He miathôhpa he Khazohpa chyhsazy ta amâ chhi. Zakaw sawchawpawpa, Zawsi chhao thotlâh su tawhta Izi râh supipa (*Mempis*), Pawtipha o avaw tlô daihti liana kha ta takâ nata sôh hnei

hlel vei, Khazohpa liata a ngâchhina ta chysa rônahpa a vaw châ thlâh haw.

Rietheipazy Khipipa Tlôna

Khazohpa ta Khipi nata râh pipa tlâawpa ta Mara sawzy a tua hra. Khipi, râh pipa lâta ama tlôna dâh deikua alyu khai aw vei. Châhrasala Khazohpa ta thotlâh tawhta khipi lâta a tlôkheipazy châta âchhuana a y cheingei aw. Zawsî duahmo tawhta khipipa tlôna dâh eima chu aw. Zawsî cha a uhtazy ta Izi lâta sôh a paliepa Kaldia mo liata ama zuah. Zawsî he mietakuzy apasapa Kana râh khipi chyhpa tawhta Izi râh khipi chaipa *Memphis* lâ avaw tlô. Khazohpa ta a pachhana palâsa awpa achhuahna hneipa ta Zawsî he khipipa lâ avaw tuah. Izi râh *Memphis* khipi a tlôpa Zawsî ta a palâsa thei chhônha miakha cha a raihriana ochhôn liata âdopa nata a siapa ta a taopa hi. Cha cha Khazohpa liata ngâ a chhina chhao a châ. Zawsî a hrona he siana ta a vaih.

Khipi a pangaipa thotlâh sawzy ta Zawsî lâpi a mopâ awpa eima hnei. Siana ta hrona a vaihpa chana he Khazohpa sawzy châta lâpi hlôpa a châ. Ngiapâna, ngâchhina, tiamana a hneipa thotlâh sawzy chhao châta Khazohpa hmophapa âchhuahdy thlâhâ aw. Zawsî tawhta hmo eima chu via aw. Thotlâh tawhta khipi a tlôpa Zawsî cha a chô liata adoleipa ta a tao hawpazy châta thlah a chhâ. Pawtipha lapinô chô liata sialeina hmo tao a khohleipa vâta, he chanô ta Zawsî cha lô-o liata a patâh. Siana vâta pasa tao ta, a chheipâh liata chyhsazy baokhâ lymâpa ta a chakao. Khazohpa ta Zawsî he my rai rai vei. Lô-o chhôn liata mâ paliethaina sohna avaw tobi. Khazohpa tawhta thaina rônahpa avaw hnei vâta, Phiraoh

ta Zawsi he ano hrialâhpa, Izi râh Prime Minister ta a tao haw. A dopa khoh ta, a siapa ta hmotao a khohpa Zawsi he *Memphis* khihpa awhsi hawhta avaw châ. He he Bei pakha hawhta a taopa thotlâh saw, Zawsi châta Khazohpa hmo pachhuapanopa miakha a châ thlyu aw.

Khazohpa ta maniah Tuah

Awnanopa kao lâ tawhta saipa ta, khihpi nata râh thiehpa a pangaipazy ta ama thei thlâh awpa ABeipa Zisu bie miakha cha, "tuapa amâ châ" tahpa hi. Tuana chhâpa hluhpi a y aw, cha liata asia chaipa cha Thâtihpha (siana) pahnokheituhpa châna hi. Apôstôl Pity cha Basaida khih puapa châ ta Rome khihpi liata awnanopa a padua. Rome khihpi liata Bishop châ ta ABeipa a chakao. Khazohpa ta khihpi lâta Pity âchhina chhâpa he cha Thâtihpha chakaona rai vâta achâ chai. Bie chyupa ta eima rei khiah, 'khih bohpi puasai ta, khihpi nata râhpipa taih atlôpa zydua sai u, ABeipa tuapa na châna a pahno lymâpa a pha. A thaipazy, ahneirôhpazy, biehneituhpazy kiahpâh liata Thâtihpha pahnokheituhpa cha awpa ta Khazohpa ta maniah a tuah tahpa â sia'.

Khihpi a tlôpazy cha Khazohpa a paphasaileipa Zawsi hro amopâ awpa eima hnei. Krizyhpazy pahrâna râh, Buddhist zy pahrâna râh, Muslimzy pahrâna râh a tlôpa eima y aw. Khataih râh eima tlôpa chhao ta siana thâtihpha ta eima hro vaihpa ta, âdopa tlaichhaipa ta, ABeipa bie nata âhmiepa ta chakao ta, ngiapâna liata y thlâhpa he byhnâ a hnei. Khihpi cha chito photo ama yna su a châpa vâta pathluana hlâta a viasana, hmopha taona, hmothiehpa papina hpz., hneipa ta, awnanopa nata

chheipâh châta byhnâ châna taih ABeipa ta maniah a padua thei thlâh haw.

Ngiapâna hleikhô ta "hmotaothaina (skills)" chhao eima byuh. Zawsî cha Khazohpa tawhta mâ paliethaina byhnâ to ta, cha cha a chakaona châta hmâh ta, Khazohpa a parônahsa. Zisu ta maniah a tuapa rai eima hria thaithei nawpa ta khihpi nata râh hro a tlôpazy chhao hmotaothaina (skills) hnei nawpa ta Khazohpa lâta a hiana chôta, tiama kawpa ta thaina zydua papuapa ta hmo thiehpa a chu ta, chyhsa phana châta chakao pha a chhuah chyuh suh u.

Reipahmaona

1. Marasaw hluhpi ta thotlâh Mara râh he siesaipa ta khihpi nata râhpi lâ pua via lymâ awpa he Khazohpa khozie a châ chai thlyuna tahpa na pangiasa ma? Reipahmao teh.
2. Zawsî cha mâ palie thaina byhnâ a to vâta Izi râh nata chheipâh zy pachhana ta a hmâ. Mara sawzy pi ta, eima pahrâna nata chheipâh châta byhnâ eima châthei nawpa ta Khâpa thaina/ pahnona e Khazohpa eima hia aw?

September 17

RAIHRIA PASÔ TEH: KHAZOHPA NA CHAKAO

*Nama taopa maih cha chyhsapa châ
hawhta taoleipa ta, ABeipa châta hawhta
tlaô taopa ta, khoh ngaitapa ta tao teh u;
ABeipa Krista nama chakao hi (Kaolaosa
3:24)*

Raihriana cha Khazohpa ta maniah a piepa talent hmâna châta, raihriana ta ABeipa a parônahsa kaw. Khazohpa Thlahpa Pathaihpa a hneipazy ta raihriana he ABeipa biepiepa achâ tahpa ama ngiapâ. Khazohpa cha noh charu chhòh rai a hriapa châ ta, a sawzy chhao ano hawhta rai amah ria awpa ta bie a pie ei. *Raihriana deikua chi hluhpi y ta, rai pathaihpa a hriapa maih ABeipa liata ama ly kaw.* Rai hrialeina deikua Khazohpa biepiepa ama parao. Ngiapâna kao tawhta eima rei khiah raihriana he vâduana châ vei; ngiapâna hneipa ta raihria tiamapazy cha ABeipa biepiepa tlaô ama paki. Rai hneileina deikua pôhpa nata thlahpa he moleina lâta â chhi ei. Chavâta rai hrialeipa ta y khohna hrozie he taopathipa âbyuh.

Raihriana ABeipa Palysana

Raihriana he moleileipa ta, rai hneileipa ta ypa deikua moleina lâta maniah âchhina anao kaw. ABeipa David hmotaopa liata rai hrialeina vâta hmo paraona kyh âlâ pasia kaw (2 Sam 11:2-27). Mohropa zy râh pabohsana rai ama hria hai nota David cha o liata ypa ta, rai hrialeipa ta a ypa vâta reipasaona atyh ta, reipasaona a pahnie khaoleipa vâta Uria lapinô, Basheba chô liata hmo

parao ta, a molei haw. Rai hneileina ta yruna tao ta, moleina lâta a sie khei. Chavâta chhôhkha, awnanopa, vaitlâh nata râh chhôh liata chyhsazy châta rai phapa papithaina byhnâ chhao eima ngiah. Rai hrialeipa ta ypa hlâta, a y chhôhpa raizy pasô ta hriana ta Khazohpa eima palysa via aw.

ABeipa Zisu ta “nohchhô achâ chhôh ta rai ei hria aw” a tah (Zawhana 9:4). Tlâhna daihti eima hnei chhôh he nohchhô hawhta châ ta rai eima hriapa a châ. Rai hriapa he Khazohpa eima lyuna miakha châ ta, raihria a pahâhpazy he khizaw a tlaichhaipa châ vei ei, Khazoh khohta a taopa tloa châ ei ta, ABeipa ta âly ei. Anodeikua, rai he sasyh athôhna châ deita hria’pa chi châ vei, chhôhkha, eima chheipâh zydua phana châta hriapa tloa a châ. Chavâta vaihzy kyhpachâna hnôhchhyleipa ta rai a hriapa he za a chhieh ta, ABeipa lâpi a chhiehpa tloa ama châ.

ABeipa Chakaona chôta Raihriapa

ABeipa nata akaona châta daihti patlyna chôta raihriapa he Khazohpa ta aly. Zisu viasa phapa Martha nata Mari chhao rai phapa hriana liata ama tiama kaw. Mari châ raihria tiama ta, Khazohpa achhyna, ABeipa bie nahthliena, thlahchhâna châta a daihti patly tyh ta ABei Zisu kiapâh liata a y tyh. Mari chhao aly ta, ABeipa Zisu chhao Mari chôta aly kaw. Martha deikua la, raihria liata a palôh tlokhui khai ta, achhyna, thlahchhâna, ABeipa bie nahthliena châta daihti a pietheileina a hluhpa vâta â palôh bua ta, aly kaw vei. Thlah achhâ hmâleina taihta rai a hriapa Martha raihria dâh he Zisu chhao a pha tah khei tu vei.

Raihria tiamana chôta Khazohpa liata palôh pachôhpa he taozie dopa châ ta, palôh alyna, thlalôhna zy ama hnei. Rai liata palôh pachhâleipa ta, keimo, Khazohpa nata raihriana tahpa zy he hmaokha ta a sie khohpa abyuh. Hla taotuhpa ta “Hria lymâ teh, rietheina taih, Paw khohpa tao, na ly nawpa” a tah. Khazohpa alynazie hawhta chakaopa ta hria chyuh u.

Chavâta rai a hriapazy cha Khazohpa byhnâ a topa zy châ ei ta, chyhsa to raileipa ta yleipa ta, eima hria thaipa rai miakha chhâ hriana chôta ABeipa lâpi a chhih suh u. Chatanachata thathina viachhâ nie leipa ta, moleina, paruna, haina, avyuhna hpz., sei châna eima khôkhâh thei nawpa ta tiama ta hria suh vy. Chahawhta hriatuhpa zydua ABeipa ta âly ei.

Reipahmaona

1. Raihriana he byhnâ tona châ ta chhiesana châ vei tahpa nâ py thei ma? Chyhsa to raihria thapawhna ama hneithei nawpa ta a tao dâh rei pahmao teh.
2. Raihria tiama kaw ta, ABeipa châta daihti a pietheileipazy nama awnanopa liata ama y ma? Ama y khiah, Mari hawhta raihria tiamapa ta ABeipa ama chakao thei nawpa ta a chhitha dâh reipahmao teh.

September 18
SÔH TLUANA TAWHTA ABEIPA CHAKAONA

Khâpa hraoleipa ta sôh (takâ) a hmôpa cha papaipa châ aw ta, hriapasapa ta (sôh) pachôpa deikua cha a pôh aw (Biesohzy 13:11).

Ngiapâtuha Marasaw thokha zy tawhta, “takâ tlaichhai khâ, nâ ngiapâna a cha parao aw,” tahpa bie eima thei hluh kaw tyh. He he a py tlâhpa bie a châ ma? He hawh tlai ta a pypa châ mawh sala, Marasaw he takâ sôh eima hneithai tlai aw ma? Takâ sôh hmâleipa ta eima ythei tlai aw ma tahpa hiahrina hluhpi akaw pua tyh. Takâ nata ngiapâna âchakhia tahpa apyna, ngiapâna zy cha ado vei. Takâ he Khazohpa byhnâ miakha achâ tahpa apyna pahneisapa nata takâ sôh tluana nata hneina dâh dopa deikua rei papua viapa â byuh aw.

Takâ Soh he ABeipa Byhnâ

ABeipa bie nata âhmiepa ta sôh (takâ) tlua thaina he moleina châ vei, byhnâ tlao a châ. Thokha zy cha takâ sôh he moleina thabypa a châ tahpa bie ngiapâna miakha vâta takâ sôh tluana he rai peimawhpa ta a pachâleipa ama ythei aw. He he apyna dâh doleipa tlao châ ta, a tao thei, a hriathei thlâh awpa nata sôh a tluathei thlâh awpa zy takâ sôh tlualeipa ta dychhiena liata palôtlâh apaohpa ta pachuna alyu. Châhrasala, ABeipa bie tawhta a chu papuapa ta, takâ sôh tluana nata hneina dâh do viapa châ, ‘hriapasapa ta sôh tlua ta, sôh pachôna hro hneipa ta, abyuhna lâta lopa papuapa he tlao a châ’. Takâ sôh tluana

châta daihti hluhpi pie ta, palôh hmeiseihpa ta takâ tluana he molei vei, he hawhta taopa ABeipa bie ta tiao maniah a pachu.

Sôh tluana kyh liata John Westley (Methodist Pastor) cha he hawhta a pachu, "na theina zydua papuapa ta takâ sôh a hlâ la, na theina chhoh ta pachoh la, na theina chhoh ta lo papua (pie) hra ma y," a tah. (Earn all you can, save all you can, give all you can). Medodist awnanopa liata pawhrâhpa ta awnanopazy he tiama ta takâ sôh tluapa a pachu ei. Takâ sôh tlua tiamapa ta, chyhsa nata Khazohpa châta a hluhpi pie thei awpa he Khazohpa paloh phao/theology do viapa châ ta, takâ sôh a tlua tiamapazy moleipa hawhta hmôna deikua taopathipa abyuh aw. Takâ sôh he moleileipa ta, tluana dâh nata hmâna dâh, hneina dâh dopa deikua a pachupa eima byuh. Bie hawrawh hropa ta eima rei khiah, ngiapâtuhsa cha takâ sôh tha ta tlua sala, Khazohpa nata chyhsazy phana châta tha ta hmâ mawh sy tahpa hi.

Hria papuana ta takâ tlua ta, hmôtheipa takâ sôh cha pachoh ta, papôhsapa hleikhoh ta, Khazohpa khihnârâh paduana liata piena he chakaona dopa ta âlâ. Chyhsazy paraopakei ta, takâ sôh hluhpi tluana deikua ABeipa a ly vei. He hleikhoh ta takâ sôh tluathei ta, byhnâ chhao to taraw ta baongiahpazy lâta lo papua thaileina deikua, "pie teh u, piepa ta nama y aw," tahpa Zisu pachuna bie nata â hla haw. Ato zydua ABeipa eih a châ tahpa hawhta takâ sôh byhnâ eima hmôpa chhao he ABeipa tawhta byhnâ eima hmôpa châ hra ta, ABeipa nata a chyhsazy lâta pie pasaih cheingeipa âbyu.

Zisu pina daihti liata ano atluapa nochhi chyhsa sopazy cha, takâ sôh a chhy vei ei; ama hneina hmâpa ta ABeipa Zisu anaoh ei ta, ama hneina sôh (ngôh) cha Zisu anaohna ta tlaoh ama hmâ. He he takâ sôh ta ABeipa chakaona rai âhria thei tahpa ngiana miakha a châ. He he ABeipa châta lo papuana dâh dopa tlaoh achâ hra.

Zisu ta sôh a tluathaipa, takâ a hneipa Samari chyhsa phapa pakha kyh a pachu hra. He Samari chyhsa ta Zerusalem tawhta Zerikô lâ siena liata phihmâpa zy ta tu ei ta, he hmaphaopa chyhsapa mohôhna châta a hneina takâ sôh a pie. Abyuhpazy piethaina he sôh hneina dâh nata hmâna dâh dopa châ ta, ABeipa Zisu chhao aly kaw. Zisu ta Samari chyhsa phapa kyh a reina chhâpa cha; takâ sôh a hneipazy ku riaphana ama hnei lymâ awpa ta a pachuna a châ hra. Takâ sôh he Khazohpa chakaona nata vaihzy kyhpachâna châta chhaichhi peimawhpa a châpa vâta âdopa ta sopa ta, tiama kawpa ta takâ tluathaina, tluatheina byhnâ Marasawzy chôta vaw tlô mawh sy.

Reipahmaopa

1. Takâ sôh tlua ta takâ hneithaina byhnâ to awpa he na thlahchhâna liata âhlao tyh ma?
2. Marasawzy takâ sôh tha ta tluapa ta chyhsa châta lopapua thei nawpa ta lâpi a y thei aw ma reipahmao teh.

September 19

**AVYUHNA VYUHPA TA KYHPACHÂNA KU
PAZAWHNA**

*Zakia cha aduah ta, ABeipa hnohna chata,
"ABeipa y, ei sôh khophi dyhcheipazy liata
pie aw nahta chatawhcha ahy liata rai
hmo kheirohpa ei vyuh hawpa maih a lie
palih ta ei thô aw," tah ta (Luka 19:8)*

Khazohpa nata akaona chôta âdopa ta taona he chyhsa phao pahua ta, vaitlâh hro pathaihpâ a pahneisa. Avyuhna deikua vaitlâh nata râh chhoh liata chyhsazy hrozie a parao thei kaw. Avyuhna he aohraohna, karâ yna, khohlei khohna, sasyh deita kyh apachâna zy tawhta a vaw pua. Chyhsa ta ano tovyuh achâleipa a la khiah, cha cha avyuhna taopa châ ta, chyhsa hluhpi phaohrina a pie. Avyuhna hro nata raihria he Khazohpa khohna nata a chakhia ta, avyuhna taotuhpa hluhpi cha haihina, hro sipasana, thlazona nata china ama hnei. Avyuhna hro thailei pachâ ta pathaihna hro chadai aw he awnanopa chhaota taovyuh a hnei.

Avyuhna Chi Hluhpi

Tahmâhlâ eima chareina khizaw liata avyuhna chi hluhpi y ta; takâ sôh avyuhna nata bieheina avyuhna he su to liata y ta, eima Myanmar lia chhao avyuhna hluhpi a y hra. Vâdua chhih kawpa ta, Myanmar râh he khizaw liata avyuhna a taochaipa râhrawh liata pahlaopa a châ. Myanmar râh liata chyhsazy he âdopa pasôna a chy kaw. Chahraochatôna, aohraohna, karâ yna haiphiana zy ta a

disao haw. Chavâta bieheina nata takâ sôh avyuhna âsâh kaw. Marasaw chhao avyuhna hriiah chhiepa eima phao tahpa, ngia theipa hluhpi a y. Eima râh sawhkhâ buakha a pha chhoh liata Marasaw company rai a hriapazy chhao avyuhna tao ei ta, ama ku raihraizy a chhie kaw hra. Avyuhna ta eima râh chyhsa phao a pahri hmeiseih. Avyuhna tawhta âdopa ta a tao hawpa Zakia kyh eima saohia aw.

Avyuhna tawhta Pathaihna

Zerikô khieh liata chhiekheituhpa Zakia he Zu chyhsa châ taraw ta, Rawma beizy nata a pakypa ta aohraoh ngâsâpa ta chhiekhei tyh ta sôh hluhpi avyuhna a tao. Zakia cha chhiekheina liata avyuhna hluhpi a tao tyh vâta Zuzy phao pahri kaw ta, takâ sôh avyuhna tha ta tao tyh ta, a hneirôh kaw hra. Thâtihpha Luka reizie ta cha Zakia he avyuhna vâta chyhsa a hneirôhpa châ ta, alyna hneileipa ta pachârôhna ta âkhu a tah. Kheita a châpa chhaota, takâ sôh avyuhna he Abraha pathla a châpa Zuzy hry liata a y tahpa Zakia hmotaopa tawhta a lâ pasia kaw. Avyuhna he chyhsapa hry liata a y thai kaw. Chyhsa hrozie parao ta, zawpi phaohrina a piepa avyuhna he lyurâhripa raihria miakha a châ.

Zakia he avyuhna tawhta vaw hneirôh kaw taraw ta hro alyna hnei chy kaw ta, hro rietheipa achâ thlyu aw. Zakia hro liata eima ngia theipa miakha cha, avyuhna tawhta a vaw hneirôhpazy he hro alyna ama chakâh tahpa hi. Chavâta takâ sôh hneirôh kaw ta, a hro sipasa kawpa Zakia cha Zisu âtyh awpa a khoh kaw. Zakia ta Zisu âtyh khohpa he achhâna hluhpi y thei aw ta, châhrasala

avyuhna a tao hluh kawpa vâta hro rietheina tawhta pu a awpa khohna he âhlao cheingei aw.

Zakia châ Zerikô lâta a vaw pangai haipa Zisu hmô a chhuah ta, theiku kô dâhdei kiapa ta Zisu avaw mokhâh. Zisu ta ano a tyh khoh kawpa Zakia, chhiekheipa hyutuhpa cha, aw ta Zisu cha Zakia o liata a tlô tahpa Luka ta maniah a chho. Zakia cha Zisu nata âtyh tawhta a hrona âpathlai haw. Avyuhna a tao tyhpa taokhao v'na tahpa ano sasyh ta rona bie a reih. Rona avaw hneipa Zakia cha a hneina âkhophi chhao dyhchhiepany hnohta pie awpa bie a phuah thlâh. Zakia hro âpathlaina tawhta eima chupa a y; Khazohpa (Zisu) a hniana ta avyuhna hri chhiepa patlâh ta, kyhpachâna ta âdopa ta taopa hi. Khazohpa hmia moh la, avyuhna hmotaopa nâ hao aw. Chatanachata avyuhna ta takâ sôh hluhpi a hneipa chhao uava aw va chi. Zisu a zituhpany ta avyuhna he ahao ei ta, âdopa ta taona he ama pasô.

Marasaw chhao avyuhna a taothaipa ama y thei aw. Takâ nata bieheina avyuh thaipazy he hro alyna hnei hlei vei ei tahpa Zakia tawhta eima chu haw. Zakia hawhta Khazohpa hmia moh sila, avyuhna hmo pathaihleipa he ahao sila, Khazohpa nata akaopa ta âdopa pasôna chôta hria hualuapa ta eima pasyu. Keimo cha Khazohpa sawzy châ pi ta, maniah awtuhpa he pathaih ta, keimo chhao pathaihna hro eima chadai aw. Awanopa châ pi ta, Zisu Krista eima chakao. Zisu lâ mopa ta, âdopa pasô sila, avyuhna bâh sai suh u. Avyuhna tao vyuhpa ta âdopa ta tao sila, baongiahpany lâta ku pazawh suh vy. Chatanachata chhôkhka, vaitlâh nata râh chhoh liata alyna nata thlalôhna a charei via aw.

Reipahmaona

1. Chin State liata a pahrâpa chyhsa 95% he Krizyha châ pi ta, chahrasala 2019-2020 liata Chin State liata raihriapazy ta avyuhna ama tao chai tahpa bie a y. Khâpa vâta e, cha tlu ta avyuhna âsâh? Avyuhna a paithei nawpa ta kheita eima tao aw tahpa reipahmao teh.
2. Avyuhna phaleizi nama Local Church liata pachuna, sermon zy a hluh ma?

September 20

BIEHNEINA PARINA TAWHTA PUANA

*ABeipa nama Khazohpa ta a cha piepa r h
cha nama to thei nawpa nata nama hroh
thei nawpa ta a sia ngaitapa dei cha, nama
zyh awpa a ch  (Ryhpachaneina 16:20)*

*"N ma kyh na pach pa hawhta na vaihzy
kyh na pach  awpa a ch " (Maka 12:31)*

Chyhsa hluhpi cha hmophaleipa tao ai vei ei, cha hmophaleipa ama taopa theil pa ta amo a parao lilaw heih ei. Biehneina nata hneir hna tha ta tlaichhaina he hmophaleipazy hry liata  hlao. Kaokha l ta eima rei khiah tlaichhaituna he "parina" tahpa ta hawrawh eima hm  thei. Biehneina parina he ta r h chyhsa nata awnanopa zy taihta a parao thei kaw. Parina ta chyhsa pal hru dopa parao ta, a noleipa ta hmo a tao. Sahma a paripa cha, sahma ta a pal h panano ta, a noleipa ta bie rei ta, a noleipa ta hmo a tao. Parina he hmophaleipa ch  ta; tao chhiena hluhpi a hnei. Chyhsa to parina tawhta puapa  byuh. Parina kyh reipa hluhpi a ypa hry liata Biehneina Parina kyh eima eima rei chhi aw.

Biehneina A Paripa Chhituhpa

Izi r h liata Zawsi a pahnoleipa abei thiehpa vaw y ta, Izarelzy maluh hluh ei sala r h biehn ina ama topa a khohleipa v ta Izarel chapawzy pamuapa (thie khai awpa)  chhuah (Puasaina 1:8-16). He Izi abei thiehpa he biehn ina aparipa a ch  tah sila eima rei pado thl h aw.

Biehneina a tlaichhaitupa vâta chyhsa hluhpi hrona pahlei padia awpa a phaohri rai vei. Kaokha lâta eima rei khiah cha, ano ku tawhta bieheina pathlie khohkhao vei tahna a châ. He Izi abeipa ta ano bieheina âboh thei nawpa ta order miakha a taopa cha, Izarel chapaw avaw pih awpa zydua hrona pahleipadia awpa ta Izarel chanôzy hnohta bie a pie. Khazohpa a chipa chanôzy cha bieheina a paripa Izi beipa rei a ngia khohleipa ei ta, chyhsa hro tlaô ama pabohsa.

Biehneina a paripa chhituhpazy liata Khazohpa china yleipa ta, chyhsapa hrona hu pahieh awpa hlâ ta ama bieheina pabohsapa ama khoh via thlâh. Chyhsazy hu pahieh khohpa vâta bieheina khohpa he moleileipa ta, bieheina paripa deikua chyhsa hrona hluhpi pahleipadia thei ta, râh riarina nata raona taih a tlô kheitheipa vâta chi âchhih kaw. Chhituhpazy ta bieheina he chyhsa chakaona châta hmâ awpa hlâ ta bieheina pabohsana châta ama hmâ haw khiah hrozie araopa bieheintuhpa ama châ aw.

Politik Parina tawhta Kuphei Pathyuna

Lyuchâpa Pawla reizie ta, "chyhsazy ama yzie arao khai ta, lâpi dopa pahno khao vei ei (Rawma 3:12)" a tah. Khizaw bei hluhpi cha bieheina paripa ta lâpi pavia ei ta, âmo lâpi paviapa dei a daihleipa ta chyhsa hluhpi chhao lâpi ama pavia khei hra. He hawhta ama pavia; âdo, dolei pachâ vei ei, ama bie a zyha deita ta su ama pie. Âdopa tluapa hlâ ta ama dyuchhai a pabohsa theipa viasa dei ama tlua via. Pachâna a lyuleipazy cha thleipachhâ ei ta, ama thy pathla. Hnabeiseih a chhileipa liata chyhsazy hnabeiseih awpa pachu ei ta, haipa ta achaluana bie he bie

dopa hawhta reipa ta chyhsa amâ sydei. Politik nata ryureina liata biehneina a paripazy cha chyhsa hrona paboh awpa hlâ ta âmo biehneina paboh awpa ama tly via thlâh. Kao hluhpi liata biehneina a paripa ama y. Phu nata py to liata biehneina (power) tahpa y ta, cha biehneina cha molei vei; biehneina paripa deikua molei ta, chahraochatôhna, pasaipa-ina, kuphei pathyuna lâta a chhi ta, a chhâna liata adyuhna nata thina taihta a tlôkhei. Parina he pha vei, cha vâta parina tawhta puapa âbyuh.

Zisu Pachuna tawhta Biehneina

Biehneina parina tawhta puana lâpi he ABeipa Zisu pachuna nata hro liata y ta, cha kyh cha eima rei pazao via aw. Zisu Krista chakaona kao tawhta "biehneina" kyh eima chu nata deikuala, biehneina to awpa hlâ ta areisina chôta chakaona atlypa tlaô a pachu. Kaokha lâta eima rei khiah; biehneina ta âchhuahpa cha vaihzy parao ta pahleipadia awpa châteipa ta, vaih, awnanopa nata râh chyhsazy huhiehna châte chakaopa he tlaô a châte. Zisu deikua cha chakaotuhpa châte awpa ta maniah pachu ta, avyuh nawpa ta biehneina hmâpazy he thailei pachâte ta, biehneina pathaih leipa to awpa hlâ ta, chyhsa chakaona rai a tlypa tlaô maniah a pachu (Mathai 20:26).

Chavâta biehneina paripa he ABeipa Zisu pachuna nata âchakhia kaw. Khazohpa bie nata ahmielei kawpa ta a lâ hra. Biehneina a paripazy ta biehneina ama chhuna su liata la Khazohpa nata vaihzy thlalôhna nata alyna pie beih vei. A eichhiana, a hryuhna, a khakhaina, a dyuhna dei tlaô a papua hluh. ABeipa Zisu pachuna a ngiapâpazy deikuala pari theina ta hria thei vei. ABeipa

Zisu pachuna, "nâ kyh na pachâpa hawhta na vaih kyh pachâ teh" tahpa bie cha 'chakaona pasô ula, bieheina tlaichhai kha u, chyhsa hrona hu pahie ula, thla palôh teh u a tah. Zawsa a pahnoleipa Izi abeipa lâpi he bieheina a paripa lâpi châ ta zi lei awpa ta eima pasyu. Zisu pachuna he chyhsa to pha nawpa ta chakaona châ ta, chhituhpazy ta chyhsa chakaona a tlypa he a pha via syulyu.

Bieheina he Chakaona châta Sy

Chakaona pasô ta, bieheina pathaihpa a hmâpa, ABeipa Zisu cha zawpi phana châta ano cha rietheina âtly. Paw Khazohpa ta bieheina zydua a piepa, Zisu Krista ta a bieheina cha chakaona châta tlokhua a hmâ papua. ABeipa Zisu lâpi ta bieheina dyuchhai tlua beih vei, mohropazy ama pha nawpa ta baotuhpa rai hriana tlaô âtly. Bieheina (power) tahpa he molei leipa ta, bieheina pathaih leipa, a chô liata eima rei chiehpazy deikua chyhsa nata vaitlâh zydua a parao hleikhô ta Khazohpa châta su pie hra vei. Zu phoryhpa a châkheina liata a pari hawpa Sawla chhao Zisu nata ama tyh rakha tawhta, bieheina pathaih leipazy thyu sai ta, pathluana hneileipa ta chakaona lâpi avaw tly. ABeipa Zisu lâpi a chhipa he Sawla/Pawla châta thlalôhna nata alyna a châ tahpa a pahnopasia vâta chakaona lâpi âtlypa a châ cheingei aw. Eima pahrâna Myanmar liata sawhkhâ a tahpa miano zy cha bieheina ama chhu daihti châ ta; zawpi châta la riethei âchhih kaw. ABeipa Zisu hawhta bieheina hmâ thai ei sala, eima râh he a hu âhie aw tahpa hnabeiseihna eima hneipa vâta thlahchhâ eima bao. Eima râh liata bieheina parina zy âpai thei nawpa ta Myanmar râh tawhta a puapa chyhsa zydua Zisu pachuna lia hropa a

ngiah pi ta, Thlahpa Pathaihpa chhithana chhao eima ngiah hmeiseih.

Reipahmaona

1. Eima r h nata awnanopa liata bieheina parina a y ma? A y khiah, patl hna d hzy reipahmao teh.
2. Myanmar r h liata chyhsa huhiehna a piepa ryureina a y thei nawpa ta na taothaipa a y ma?
3. Zisu ta chakaona ch ta a bieheina a hm pa he politik a taopazy ch ta achupa a pha na ta ma?

September 21
NGIAPÂNA TA EIMA PAHNIE

Chatanachata Zisu ta a hnohta, "Hy chanô y, nâ ngiapâna cha a lai kaw'na! Na khohpa hawta na chôta y se," tah ta achhy ta, cha rakha tawna chata a sawchanônôcha tlâh ha ta. (Mathai 15:28)

Khazohpa liata eima ngiapâna a diah vei khiakta la ABeipa ta eima chhuahna chô liata hlao maniah a patlo thlâh aw. Rietheina, china, thlazona, hnabeidyna, thina zy hry liata Khazohpa liata ngiapâna hneipa ta hmopha viapa hnabeiseih ta, ngiapâna ta hmialâ tôh lymâ suh u.

Ngiapâna tawhta Pahniena

Zisu Krista lâ mopa ta ngiapâna ta biezy rei ta, eima reipa hawhta hmo eima tao tita hlaotlohna pha viapa a y. Biehrai liata chyhsa rônahpa; Abela cha ngiapâna ta a theina hlâ ta, Khazohpa ta â pyh (Hebrai 11:4). Ngiapâna ta Abela hmotaopa cha tanoh taih bie a rei ngâ thlâh. Khazohpa bie liata a ngiapâpa ta chakaona he hmotao theina hnei ta, hlaotlohna chhao maniah a pie. Abaraha chhao Khazohpa bie liata ngiapâna hnei ta pahnoleipa râh taihpa lâ sie ta, a pathlazy cha Kana râh liata ama pahrâ haw. Khazohpa bie liata ngiapâna hneipa ta saduthliena tlôna taihta hmialâ sie hualuana he mopathaihpaзы siena lâthlôh chhao châ ta, amo cha Khazohpa tawhta râh taipa phana byhnâ ama to haw hra.

Ngiapâna ta Hmialâ Tôhna

Ngiapâna he chyhsazy hnohta Khazohpa hmosaipiepa châ ta, Khazohpa bie liata ângiapâna a pahniepa cha ABeipa ta chhitha ta saduthliepa tlô thei

nawpa ta a chhitha ei. Zisu Krista bie nata hmotaona liata ângiapâna a pahnieh ngâh hawpa Kana chanô cha Zisu Krista reithaina hlao ta âhiapa; a sawchanô tlâhna byhnâ chhao avaw to. Ngiapâna ta chyhsa hnohta hmotao riahphana a pie tah sila âdo chai thlyu aw. Kana chanô Zisu liata ângiapâ riahphana he ta a sawchanô hrona cha chiehleina tawhta thatlôpa lâta a pathlai (transform) haw. Chiehleina vâta panaopa cha ngiapâna ta hiapa vâta thatlôpa lâta avaw châ thlâh haw.

Zisu pachuna liata a ngiapâna ta hmophapa hnabeisei ngâhna byhnâ a pie. Pasaipa-inazy, pachhiparynazy, tlananazy, raonazy âtyh haina daihti liata Zisu lâ mo leipa tala hnabeiseih a chhihpa a chyh kaw. Anodeikua reithaina hla eima sa tyhpa liata, " a ngâtuhpazy ta a ngâchhihna amâ hmô," a tahpa he ta tha maniah a patlô heih tyh. Izarel sawzy siena lâpi liata ABeipa ngâchhihna kyh hluhpi eima rei tyhpazy kha keimo liata testimony phapa rei awpa eima hnei chy aw. Keima chhao ngiapâna tawhta ei tyhpa testimony reipa a y hra.

June 13-14, 2022 liata Pakkoku tawhta Lialaip lâ, Saya Vakhaitha motor ta eima zydua mo pasari ta eima kaw siena daihti liata ABeipa chhithana kyh rei awpa ei hnei hra. Eima siena lâpi he adyuh ngâna su achapiapa a châpa vâta eima chihuh kaw. Eima hmia lâta a siepa Gankaw Alingthan Mini Bus cha bom tly ta ei sari tlai pa ta, ama motor hmia zydua zao khai ta chyhsa deikua thipa y vei ei. He vâta motor hropa zydua siekhaoleipa ta ama chalih. Keimo chhao cha su eima tlô nata buakha pi eima chalih hra. Lâveih (shortcut) lâ tawhta âsie thei thlyu'na tahpa bie eima daoh tawhta ABeipa liata a ngiapâna chôta nata thlahchhâna chôta siebeihleina lâpi, khitlypa motorzy

sie tyhna a châteipa lâpi cha eima chhi pathao. Khazohpa ta lâkyh maniah chho thei awpa chyhsa peimawh kawpa maniah patyhsa ta, ano reizieta hawhta my 11:30am tawhta siepa ta khih chyhpa hluhpi siepahlie pi ta, adyuhna a y leina motor lâpi laipa liata zâlâ 3pm ta eima vaw pua. Zâlâ 6:00pm ta a riena su eima tlô. Khazohpa liata ngiapâna ta hmophapa hnabei eima seihpa cha eima hmô haw hra tahpa rei awpa ei hnei hra. ABeipa liata a ngiapâna pahnieh ta asie haipa zy chhao testimony rei awpa ama hnei chy aw.

Tahmâhlâ chhoh râh rietheina vâta khohchhi lei kawpa hmo hluhpi a tyh hra ei sila, ABeipa cha maniah a vaituhpa châ ta hmophapa a phahla aw mapi. "Ei chabao aw ei," tahpa ABeipa bietaihpa he âvaw ki lai aw. Hnabeidy leipa ta khih nata râh, awnanopa nata vaitlâhzy puasai leipa ta, a pachaopa ta, a ypa zydua ABeipa ta maniah a vaih thlâh aw. Râh khôtho tawhta eima râh phana nata thlalôhna châta thlahchhâpazy chhao ABeipa ta ama thlahchhâna a chyh-ei aw ei. Eima hro khiah ta ABeipa eih châ pi ta, eima thi hawpa chhao ano eih eima châpa a ngiapâna chôta tha a patlô chyupa suh vy.

Reipahmaona

1. Daihti rairuna liata hnabeisiehna hneipa ta eima râh liata na pahrâ thlâhpa he, râh nata awnanopa kyh a pachâpa pakha na châ tahpa nâ pahno ma?
2. Zisu Krista liata ngiapâna he ta abohna eima hmô aw tahpa riahphana a cha pie ei ma?

September 22

CHHÔHKHA PATHAONA DOPA

*Paru hmâpazy tlyma, khohleikhopazy
tlyma, chyhsa ra hmâpazy tlyma,
phihmâpazy tlyma ta Khazohpa khihnarâh
to aw veih ei (1Kaw. 6:10)*

Paruna ta Khazohpa khihnarâh byhnâ a khaw. Lapinô châta chanô parupa/ arâkheipa he pha vei. Paruna ta Khazohpa khihnarâh nata âhmiepa byhnâzy; reingiana, areisina, siana pasôna, alyna, thlalôhna byhnâzy a khaw lymâ. Lapinô châta chanô paruna/arâkheina he bâhsaipa ta eima pasyu.

Paruna he Chhiesana

Paruna ta reingiana, areisina, siana pasôna, alyna, thlalôhna byhnâzy a khaw. Paruna hro he Khazohpa khinarâh hro nata a chakhia hawpa vâta “Paru’pa châ vei (Pua 21;20)” tahpa Khazohpa ta chyhsa hnohta bie maniah a pie. Paruleipa tahpa he Khazohpa bie thabypa miakha a châ ta Khazohpa khihnarâh byhnâ tona lâpi pachuna bie a châ. Kaokha lâta eima rei khiah paruna ta Khazohpa eima lyuna parao ta, byhnâ tona ochhi chhao a khaw. Chavâta lyuchâpaw Pawla ta Khazohpa nata a chakhiapa cha Khazohpa khihnarâh byhnâ ama ky aw a tah. Khazohpa byhnâ tona tawhta a hlâ awpa he alei liata chhiesana miakha hawh ta a châ hra. Paruna chi hluhpi a y aw. Lapinô châta chanô paruna he bâh sai âdaih haw tahpa eima rei aw.

Lapinô Châta Paruna

Paruna nata Khazohpa khihnarâh byhnâ he hmaokha ta siekhoh thei vei. Chavâta paruleipa ta Khazohpa bie hmâpa ta eima pasyu. Paruna he Khazohpa khohleipa, chyhsa châta byhnâ ochhi a khaw theipa a châ vâta hmo chyhpa/ laipa paruna he bâh sai a daih haw. Marasaw liata paruna lai kawpa miakha cha lapi/ vahpa paruna he a châ. Nôvah dyhchâna kyh liata lapi/vahpa paruna he eima râh liata a hluh kaw. Paruna vâta thlai avaw tlô awpa hmo miakha a y; Lapi/ vahpa châta a parupazy châ Thlahpa Pathaipa liata alynazy ama ky aw. Chavâta Khazohpa nata nôpawzy pasaina latualeipa ta chhôhkha paduapa he byhnâ hluhpi ama ky aw. Lapinô/vahpa parupa ta chhôhkha paduapa he, Khazohpa khohzie nata âhmieipa vâta Khazohpa khihnarâh byhnâ ama chakâh aw.

Biehrai liata Chhôhkha Paduana

Paruna a hlao leipa ta nôvah ahnei ta chhôhkha paduana dâh he nôvah hmiatuapa Ada nata Ivy tawhta a chupa a pha. Chapaw châta chanô âbyuh haw tahpa Khazohpa ta a pahno. Mara hawrawh ta eima rei khiah, " Satlia Ada he dyhchâ tôtu a daih haw," tahpa Khazohpa ta a pahno. Dyhchâna he buakha liata bie pathlupa chi châlêipa ta, dyhchâ awpa âdaih nahta daih vei he Khazohpa asaohia cheingeipa a pha. Lapi châta, vahpa châta Khazohpa lâta a hia ta, nôpaw nata awnanopa khohkheina pathaihpa ryh liata dyhchâ tôhtuipa he Abeipa bie nata âhmiepa ta chhôhkha paduana a châ. Dyhchâna liata Khazohpa asaohia, nôpaw khohkheina nata awnanopa khokheina latua awpa he awnanopa taozie

chhao a châ. Dyhchâna kyh liata awnanopa taozie ta a pakhâpa thokha a y thei aw. Chazy cha taopathipa a pha.

Khihsalâhpa zydua hrua ta alyna kyhchhi patôhpatiana liata rairuna a y vâta lapi/vahpa paruna a y tahpa ama rei tyh. He he âdo tlai khiah ta la, kyhchhi taona he pakhâ ta, chanô nata chapaw, nôpaw nata awnanopa paryhsana ta kupatuna pathaihpa taopa ta nôvah châna phuahpa a pha. Ada nata Ivy nôvahna nata chhôhkha paduana kyh liata kyhchhi rônahpa taona kyhzy alâ hlei vei. Mâ ahawna kyh chhao alâ hra vei. Khazohpa ryhraona nata pahnokheina deikua a y. Lapi hiana liata kyhchhina nata mâ apie phana kyhzy hlâ ta paruleipa ta nôvah a pakiana nata chhôhkha paduana he Khazohpa khohzie a châ via tahpa âlâ. Aparuna ta nôvah châna dâh phaleipa he Mara sawzy châta taopathi âdaih haw.

Ada nata Ivy cha Khazohpa ta a pazaopa châ ei ta, Ida sadô liata pahrâ ei ta, alypa nata thlalôh kawpa ta khieh ama sa. Khazohpa hmiakô liata hmo ama paraopa chhao ta ABeipa ta a ngiathai ei ta, nôvah a chhaihleipa ta khieh ama sa. Amo chhao ama ngiathai rairi thlyu aw. He nôvah azaona kyh liata a biepi chaipa cha, Khazohpa pahnokheina liata nôvah ama châna he a châ. Amo pano nôvahna kyh liata kyhchhina nata mâ a pie tahpa yleipa ta, Ivy mâ hawna kyh chhao Biehrai liata y hlei vei. Kyhchhina nata mâ apiena hpz., phaohri vâta Khazohpa bie paraopa he chichhieh viapa châ vei ma? Khazohpa pasaina, nôpaw pasaina hmiapasaleipa ta lapi/vahpa paruna bâhsaipa a pha. Mâ a piena, thyukhei a piena, kyhchhi taona nata kyhchhi niedo taona zy he a taotheipazy châ deita pha ta, chyhsa hluhpi châta la

phaohri âchhi tu thlyu aw. Chyhsa phao pahrina laipa pie ta, thyutliazy hnohta lapi/vahpa paruna tha a patlôpa ryhpazy cha taopathi cheingei âbyuh. Kahzohpa hmia mo sila, dyhchâ tôtuna liata paruna tha a patlôpa taoziezy he panano suh u.

Siana pasô ta Khazohpa hmia mo, nôpaw hmia mo, vaitlâh hmia mo ta chhôhkha paduapa he pha ta ABeipa âly aw. ABeipa ryhpa papeisapa ta dyhchâ tôtupa ta chhôhkha paduana he Khazohpa khihnarâh byhnâ a lana chhao a châ aw. Lapi châta parupa ta chhôhkha paduana pathao thlâhpa he ngiaryh a chhih marua vei. Krizyhpazy ta ABeipa bie thabya pahno ei sala, kyh to liata âdopa ta tao a chhuah suh u. Khazohpa chyhsazy cha paruleipa ta, âdopa ta tao ei ta, Khazohpa khihnarâh byhnâ ama to. Chavâta paruna ahao ta, siana tlaichhaipa ta dyhchâ pathaihpa a chadaipa eima pasyu. Chyhsa ta a taolei awpa cha ABeipa eih tlyma/ mohropa tovyuh tlyma paruleipa sala, ABeipa reingiana ta a hropa he a châ.

Reipahmao Awpa

1. Biehrav Piepa tawhta aduapa ta, lapi/vahpa a râkheina he paruna a châ tahpa na pyh ma?
2. Nôvah paruna a ylei nawpa ta kyhchhina laipa pahlaoleipa ta kumatuna pathaihpa deita taopa ta dyhchâna he âryh na tah ma reipahmao teh.

September 23

PATLAPASAONA HROZIE

ABeipa Khazohpa chata chapaw châta nata a lapinô châna chata savo viapakao pasipa taopa ta pakysa ta (Athaona 3:21)

Chavâta ahyrai Krista liata aypa chata hmotao thiehpa vaw châ ta; hmo parahpazy cha lei haw ta, pachâ teh u, a thiehpa a vaw châ haw (2 Kaw 5:17)

Patlapasaopa ta hmaokha ta biechhawhna hro ta laiseih suh vy. Khazohpa ta a phapa maih a tao; chyhsapa he chapaw nata chanô ta a tao. Hrona lyuri-bâhkhâ (human order) he Khazohpa ta chyhsapa châta a tao. Cha lyuri-bâhkhâ miakha cha; chapaw nata chanô hmaokha ta a chakaolâhna he a châ. Kyh to liata a chakaolâhna he Khazohpa bie nata âhmie kaw. Chapaw nata chanô cha a nahthlie, patlapasao, hmaokha ta hro, hmaokha ta laiseih, hmaokha ta biechhawhna hnei tyhpa ta Khazohpa cha lyuri-bâhkhâ a tao.

A Nahthlie Rairina

Lâpi dopa a chhieh nawpa ta a nahthlie rairina he o chhôn nata vaitlâh liata eima peimawh. He vâta ochhôn paduana, awnanopa chhithana, vaitlâh avaona nata a chhithana liata chanôzy, hawtizy ao, ama khohna dâh âhlao ma tahpa Khazohpa ta a ngia tyh. Biechhawhna (decision) taona liata chanô zy khohna, pachâna, ala thaipa chhônkhka/phupy he Khazohpa khohzie pahno thai

via ei ta, ama hmotaopa zy Khazohpa parônahsa ta, chyhsa nata hmotaopa zy huhiehna a pie thei via hra aw. A deichhy rairipa ta, hmaokha ta biechhawhna hneina hro he Khazohpa bie nata a hmie ta, hmo parao vei. Chanô deita/ chapaw deita ta biechhawhna deikuala hmotao dâh phapa châ hlei leipa ta, phahlana a tlô khei via.

Pakha Deita ta Biechhawhna

Ada nata Ivy ta nielei awpa thothei ama nie hawpa he asaohiahna yleipa ta chanô ano deita ta biechawh ta a nie haw. Ivy cha Ada nahta patlapasaoleipa ta nieleipa thothei a nie haw. Chakhaitawhta chapaw chhao thothei cha nie ta ama rao rairi. Khazohpa bie hawhta a deichhy rairina chôta hmaokha ta biechhawhna ama tao leipa vâta thlaruapa ama vaw châ thlâh haw. Ama rao haw tahna a châ. A pha kawpa nata a ngia kawpa chyhsa cha, a deichhyna ta hmaokha ta biechhawhna taopa, chyhsa ta a hro awpa lyuri-bâhkhâ ama zileipa vâta ama rao.

Châhrasala Khazohpa ta chyhsapa he parao lalaw leipa ta a paduapathi heih ei. Ada nata Ivy thlaruana (raona) cha Khazohpa ta a chahruh ei. Khazohpa ta ama hnohta mietakupa savo pie ta, ama thlaruana cha a chahru (Athaona 3: 21). Khazohpa ta araopazy cha kyhpachâna ta padua pathi ta, a taopathi ei. Khazohpa he taotuhpa deita châ vei, araopazy taopathina raihria liata âpahlah tyh. Awnanopa hnota “araopa taopathina” raihria chhao a pie. A deichhy rairipa ta, hmaokha ta a patlapasaopa ta, Khazohpa bie nata âhmiepa ta, ato biechhawhna tao tyhpa ta raona hluhpi cha âkhôkhâh thei aw.

Thlahpa Pathaihpa nata Patlapasaona

Eima lâpizy âdo thei nawpa ta awnanopa ta Thlahpa Pathaihpa nata âsaohia tyh aw. Zisu Krista nata patlapasaona hneileipa ta awnanopa chôta ku a pathlapa Sawla he, thlahpa lâ kyh liata ârao. Sawla cha ABeipa Zisu Krista nata asaohiana yleipa ta a chakaopa vâta Awnanopa taola ta lianycheina liata âhlao (Hmotaopa 8:1-3). Châhrasala, Zisu Krista nata avaw tyh ta, Thlapa Pathaihpa nata patlapasaona hneipa ta a vaw chakao tawhta deikuala Khazohpa ta a hmâpa “Pawla” lâta a vaw lie haw. Khazohpa ta maniah a chhopa lyuri-bâhkhâ a chhiihpana ta chyhsa a taopathi.

Thlahpa Pathaihpa nata a patlapasaopa Sawla cha chyhsa thiehpa a châ tawhta chyhsa to thlupalôh kaw ta, ano vâta chyhsa hluhpi chhao a taopathi. Khazohpa ta chyhsa châta hrona lyuri-bâhkhâ dopa a taopa cha; keimo khohpa deita pachâleipa ta, eima khoziezy he ABeipa bie nata âhmie ma tahpa patlapasao tuapa a pha. Thlahpa Pathaihpa nata patlapasaona hroziezy, viasa, vaih zy nata patlapasaona hneipa ta biechhawhna hnei tyhpa hrozie he hmaokha ta laiseihna pie ta, raona tawhta khôkhâhna a tao. Kaokha lâ tawhta eima rei khiah; ochhoh liata, awnanopa liata, vaitlâh department to liata chakaona eima hnei ti ta, chanô, hawti, machâ zy pathlualeipa ta, amo nata patlapasaopa ta, Khazohpa bie nata âhmiepa ta hmaokha biechhawh tyh awpa he taozie dopa a châ.

Reipahmao awpa

1. Chhohkha liata patlapasao khai tawhta biechhawhna nama hnei tyh ma reipahmao teh.
2. Ada nata Ivy hmoparaona he patlapasaona ama hneilei vâta a châ tahpa kyh biehraia nama hmôna kao tawhta reipahmao teh.

September 24

REINGIANA TAWHTA HRONA BYHNÂ

*Chyhsa pakha chhorupa vâta chyhsa
hluhpi cha moleipa vaw châ haw ei ta,
chahawhna hra chata chyhsa pakha
reingiana vâta chyhsa hluhpi cha a siapa
ama vaw châ haw (Rawma Mozy 5:19)*

Khazohpa reingiahna a hneipa chyhsa he khizaw ta a peimawh. Biehraï theolozy siezie liata "reingiahna" tahpa cha ABeipa bie ta tao teh a tahpa hawhta taopazihna nata tao khâ a tahpa hawhta a chalihna he a châ chai aw. Achyu chaina ta cha, Khazohpa bie pahlyna lymana he reingiahna tahpa ta eima chhopasia thei. Zisu Krista reingiahna vâta Khazohpa hiehâhna tawhta pua pi ta, hrona lâpi liata eima sie hai. Reingiahna ta hrona lâpi lâ maniah chhitha ta hmophapa chhao a padua thei.

Reingiahna ta Phopi Apadua

Abaraha cha tlokhuh ta Khazohpa rei a ngiah ta, a sawchapawpa Aisika chhao tlokhuh ta a paw Abaraha rei ângiah. Khazohpa tawhta Abaraha hnohta bie a vaw tlôpa cha, "sawchapaw pakha deipa, Aisikha cha raona hlâna châta hlâ awpa ahawna a châ (Athaona 22:1-14). Abaraha cha Khazohpa bie he a sawchapawpa hrona hlâ ta a peimawhsa via vâta Aisikha hlâ awpa ta â mâ haw. Aisaika cha a paw Abraha bie he ano hrona hlâ ta peimawh via ta pachâ ta, thi awpa â mâ hra. Abaraha nata Aisikha cha Khazohpa lâ kyh liata tlokhuh reingiahna ama hnei. He pawsaw penawh ta Khazohpa rei amâ ngiahpa he

tlokhu reingiahna a châ. Tlokhu reingiahna liata ryhraona nata rypaohna a y hra. Abaraha tlokhu reingiahna cha ABeipa ta pahno ta, raona hlâna châta mietakupa pie ta, Aisika tlokhu reingiahna vâta thina tawhta khotalaina a hmô heih hra.

Tlokhu reingiahna liata ryhraona nata khotalaina a ypa Khazohpa chyhsazy tawhta eima chu. Khazohpa bie vâta Abaraha zy, Aisikhazy cha reingiahna ta vaw chakao ei ta, a ryhthaileina liata rypaohna vaw to ei ta, thina chichhihna tawhta khotalaina ama vaw to. Khazohpa bie nata âhmiepa kyh liata tlokhu reingiahna hneipa ta ryhraona ta khotalaina byhnâ to awpa ta hruapa eima châ hra. A rypaohthaileina, hnabeiseih awpa a y thai leina daihti liata paphô ta a pachhienazy hlâ ta, tlokhu reingiahna hneipa he pha via ta, ABeipa tawhta âryhnazy, rypaohnazy, khotalainazy tlaao eima hmô thei.

Khazohpa khohzie nata âhmiepa liata la nôpawzy, chhituhpazy, vaitlâh a chhithanazy reipa he tlokhu a ngiahpa a pha tyh. Reingiahna vâta raonazy, thinazy, rietheinazy tawhta khôkhâhna rypaohpazy tlaao a y hri aw. ABeipa rei eima ngiahna liata ABeipa ryhraona chhao a y. Reingiahna he ABeipa hmotaotheina âlâ nawpa ta ochhi pahyna miakha hawhta a châ tahpa ngiapâna hneipa a pha. Reingiahna he Khazohpa nata azaopa thlahpa lâ hmobaoh miakha châ ta, a phana kyh liata la reingiahna hnei lymâ awpa ta eima pasyu. Reingiahna vâta arao hawpa he pahno hluh mapi. Reingiahleina vâta raona deikua nochareih eima hmô tyh. Chavâta reingiahleina vâta a leidiapa he reitiah lei ama châ. Khazohpa reingiahna, nôpaw reingiahna, uhtheizy reingiahna,

chhituhpazy reingiahna he phana hluhpi pie ta, akaoraohna phapa byhnâzy a vaw tlôkhei aw.

Tahmâhlâ Myanmar râh liata a pahrâpazy châta la rypaohleina lai ngâsâ ta, ahy rei e eima ngiah aw tahpa chhao pahno thai a ru kaw. Abraha hawhta eima daihty kawpa chhao ta Khazohpa lâ kyh liata lâ tlokhû reingiahna hnei ei sila, a pha ei tah kaw. ABeipa reingiahpa ta khakhaipazy châta thlahchhâ awpazy, kyh a pachâ rairi awpazy, chiehlei viapazy bao awpazy, ABeipa liata alyna hnei thlâh awpazy he eima taovyuh châ ta, ngâchhihna nata reingiahna hneipa ta hmialâ tôh lymâ suh vy.

Reipahmaona

1. Nama khisaw nata awnanopa he nôpawzy, chhituhpazy, vaitlâh chhithanazy reingiahna liata ama tao pha kaw ma?
2. Reingiahna ta hmo hluhpi a taothei tahpa na hrona tawhta na pahnop a y khiah rei pakawh teh. Abaraha tlokhû reingiahna kyh na pachâ dâh reipahmao chhi ma y.

September 25

KUPHEI PATHYUNA(VIOLENCE) CHALIHSAPA

Hy chyhsapa, phapa cha acha pamosa haw,
ABeipa ta acha hnawpa cha khâpa e a châ?
Ado ngaitapa ta taopa nata Khazohpa nata
reisi ngaitapa ta hmaokha ta chareipa he
châ vei ma? (Mika 6:8).

Â doleipa a haona, siana, pasôna zy a y khiah
hmialâ eima tôh thei aw. Siana pasô sila, â doleipa ta tao
tyhpa phoryhpazy, dâhzy he taopathipa ta a pasyu pha sila,
â doleipa liata ngiaryhna sei tawhta pua suh u.

Vaitlâh Taopathina

Â dopa a pasôpa ryureina ta adyh-aryhpa vaitlâh
phapa a tao. Adopa pasôna ta adyhna (peace), azona
(trust) nata kyh a pachâ rairinazy tao ta, âdopa ta taona ta
ryureina dopa, vaitlâh phapa nata râh phapa chhao a padua
thai. Dom Helder Camera ta cha âdona a pasôleipa
hmotaona nata ryureina zy deikua a chhâthaileipa kuphei-
pathyuna (violence), thisaih palona a tlôkhei thai kaw a
tah. Adona a chakâhpa vaitlâh nata râh liata kuphei-
pathyuna y ta, raona hluphi chhao a y. Adona pasôna he
vaitlâh adyh-aryhna, chyhsazy huhiehna byhnâ a hnei.

Hrosophazy chakaona kao tawhta vaitlâh phapa
ama tahpa cha; vaitlâh liata âdopa ta taona y aw ta, a
chalihpa a chhithana y aw ta, pakha nata pakha a zana
(respect) y aw ta, a zona (trust) y aw ta, kyhpachâna nata
ngiachhiena zy a y aw. Âdopa ta taona ta vaitlâh liata

chahraochatôhna, kuphei-pathyuna, paraona, thisaih palona hpz., a chalihsa thei aw.

Âdopa ta ryurei tlâhtlana cha chyhsa hnabeiseina dopa pie ta, pakha nata pakha a zona tao heih ta, a zana zy a palaiseihsa. A zana ta chahraochatôhna, a pachhiena, adyuhna nata thisaih palona hpz., a chalihsa. He vâta âdo ngaitapa ta taopa, ryurei-tlâhtlapa he chyhsapa taozie awpa a châ tahpa Khazohpa bie ta maniah a pachu. Khazohpa ta chyhsa to hnohta âhnawpa miakha cha, ‘adona’ pasô’pa hi. Cha cha ta vaitlâh nata chheipâh liata laiseihna phapa a paysa. Âdopa ta a tao tyhpazy phana kyh Bamar phôhpa miakha tawhta eima chu tua aw.

Nohkha cha nôkha pawkha tawta apuapa Aki (lyu chhâmie a nie tyhpa pavaw) sano cha amâ bu liata ama y. Ama nô y vei chhôn ta thlih hrâhpa vaw pathlie ta, cha Aki sanopa cha thlih ta a phao haw. Aki sakha cha âdopa a pasôpa chyhsa siapa zy yna su liata tla ta, patu ei ta, ama o lâ amâ chhi. He Aki he âdopa pasô ta ngiachhiena a hneipa, chyhsa siapazy vaitlâh liata a laiseih. Ama hnohta y ta, chyhsa siapazy palôhphao dâh, bie rei dâh, hmotao dâh a chu ta, kyhpachâna hnei ta, phana a tao lymâ. Aki sakhapa deikuacha chyhsa aohraohpazy yna su liata tla ta, chyhsa chhiepazy palôhphao dâh, bie rei dâh nata hmotao dâh âchu haw. Nohkha cha theithaipa pakha khi vaw tly ta, nohchhôn avaw tlô nahta a riethei kaw ta, thokô ry liata avaw pahâ bao cha; bie a rei ngâpa Aki cha akaw hmô. A phapa ta a nahthlie bao cha, he chyhsa he patu ula, thie teh u, a hmodâh zydua chhu teh u a tah ngâthlâhpa vâta cha theithaipa cha chi kaw ta, thlai thyu ta riethei kawpa ta ârâ syulyu haw. A râ lymâ ta, a riethei kaw bâ vâta thokô

nodipa miakha lâ ngai heih ta, thokô ry liata âtyuh thlâh nota, “ei zi beipa y, khataih lâ e navaw aw? Na dâh a phi kaw aw, ti dopa ei cha pie aw, thlalôhpa ta a pahâ ma y” tahpa ao a thei. Theithaipa cha noâh kaw ta bie phapa a reipa Aki cha alyna bie a hlâ. Adona a pasôpa vaitlâh chyhsazy ta chyhsazy alyna, thlalôhna piepa amâ hnei. Châhrasala âdopa a pasôleipa vaitlâh liata chahraochatôhnazy, kuphei-pathyunazy, parunazy nata paraonazy a y. Pôhkha hro, vaitlâh hro, râh hro, awnanopa hro zy arao lei nawpa ta âdopa he pasôh cheingeipa abyuh.

“Hla taotuhpa ta, ‘siana nata ngâchhihpa ta noh to chakao lymâ suh vy” a tahpa he âdopa ta tao awpa ahawna nata siana vâta adâh phina a palâsa. Kaokha lâta eima rei khiah, he hla âchhuana miakha cha, ‘âdopa pasô ei sila, riethiena a pai bâ sala, eima hry liata adyhna nata thlalôhna vaw charei bâ se,” tahpa arôhna aoreih a châ chai aw. Chavâta âdoleipa ahao ta, âdopa pasôpa ta, bie hmeiseihpa pasôpa ta, ryureina dopa pasô ta, âdopa ta ryureinazy, âdopa ta sôh tluanazy ta vaitlâh ngiaryh chhihpa nata thlalôh chhihpa vaitlâh paduana châta hria papua suh u. Âdopa pasôna ta eima vaitlâh nata râh chô liata kuphei-pathyunazy, thisaih lonazy a chalihsa aw. Thlalôhna nata huhiehnazy a charei thei nawpa ta âdopa ta taopa he ABeipa ta awnanopa he âhnaw. Siana Thâtihpa tlâh’aw khei via lymâ awpa daihti eima tlô hai. ABeipa ta siana kyh tlâh’aw kheipa chyhsa to hnohta âhaw hra. Eima chhôhkha, vaitlâh nata râh liata kuphei-pathyunazy âchalih thei nawpa ta, thlahchhâpa ta, Khazohpa lâ mona chôta âdopa he, sôh nata piah, ryureina nata bieheina zy hlâ ta pasô viapa ta eima pasyu. Cha cha eima chakaona liata zi awpa rai a châ.

Reipahmaopa

1. Âdopa pasôna ta Khazohpa byhnâ; alyna, thlalôhna, sidiáhna tona a y tahpa Thâtihpá he nâma pachu hluh ma? Âdopa ta taona he aryhna thabyhpa miakha a châ tahpa nâ pyh ma?
2. Âdopa eima pasô thai thei nawpa ta khei ta eima pachu khiah a pha aw?
3. Nama kkih liata âdoleikawpa ta a tao tyhpazy awnanopa tawhta chhoreina a y thai ma?

Thâtihpha Tlô Noh
(September 26, 2022; Khazohpa Achhyna Mysupi)

EIMA HNOHTA TLÔ MA Y

Châhrasala thlyu ei ta, "Eima Hnohta tlô ma y, Zâlâ daima ha ta, noh chhao a tla daihmâ ha ta, noh chhao a tla daihmâ ha hih," tah ei ta. Ama hnohta tlô awpa ta a ngia ha ta. Chatawhcha ama hnohta pati dôhpa ta a tyuh nahta viachhâ la ta, byhnâ aw ta, pachhah ta, ama hohta pie ta, "Ama mo vaw pavâ ha ta, pahno haw ei ta; ama mohmô tawhta ano cha lei ha ta (Luka 24:29-31)

"Zisu eima hnohta sie lâ, o liata maniah tlô ma y. Hy ABeipa eima hnohta nie tyh ma y." Zisu he eima o chhôn luhchaipa châ ta, chhônkha pati niena maih liata ano he hmiapasa awpa a châ. Pati nie a hruapa maih hnohta Zisu cha pati nie aw ta, ano a hruatuhpazy hnohta thlahpa mo pavâna byhnâ a pie hleikhô ta, nochareih a phahlaleina byhnâ chhao a pie. Rev. Dr. Zodau reizie ta, "Zisu châta pati pahâh chaipa Beipari sôh," a châ a tahpa hawhta, my nata zâ beipari sôh piena ta Zisu cha pati nie hrua pi ta, he he eima ngiapâna a hmasie nawpa ta ano nata eima kaona, eima chakaona pha kawpa a châ.

Zisu Otlô Hruana nata Byhnâ Tona

Thâtihpha Luka reizie hawta, "Kliopa nata a visapa cha Zerusalem tawhta Emasa khieh lâ sie ei ta, ama khitlyna liata Zisu vaw sie hra ta, zâlâ ta Zisu cha ama hnohta tlô ta, zâ pati chhao hmaokha ta amâ nie," a tah. He unawh pano penawh he Zisu pati nie ama hrua tawhta a yzie ama pahno thaileipa, "Zerusalem liata Zisu khai pâna, thina nata thyuheihna kyh," he Zisu ta novâhna a pahneisa ei. He he amo châta pachhana a châ tahpa ama vaw pahno pasia haw. Zisu pati nie hruana tawhta Thâtihpha liata mo pavâna byhnâ ama to. He unawh panoh penawh Thâtihpha byhnâ ama tona dâh tlâhpi-pazy eima palâsa via aw.

"Immanuel," Khazohpa eima hnohta a y. Khazohpa ta Zisu Krista cha eima pachhatuhpa ta maniah pie ta, ano cha maniah ypâ ta, maniah sielâh ta, bie maniah chhò ta, eima hnohta maniah a nielâh hra. Zisu ypâna he Khazohpa ypâna (Immanuel) châ ta, pachhana hmôna chhao a châ. Eima pachhana Thâtihpha pahno pasia nawpa ta Thlahpa Pathaihpa hmâpa ta Zisu cha bie maniah a chho tyh. Kliopa nata a viasa cha Zisu bie ama thei nawpa ta, Zisu ta ama hnohta a sielâh ei. He viasa pano penawh he ta Zisu ama hnohta o tlôpâ, niepâ nata ariepâ awpa ta ama hrua. He viasa pano pemawh hnohta Zisu cha sielâh ta, amâ byuhpa Thâtihpha a chho ei. Zisu he Mesia, pachhatuhpa a châ tahpa chho ei ta ama ngiapâ haw. Eima chhòkhka hnohta Zisu maniah sielâh sala, eima hnohta pati maniah a dôlâh awpa he Biehrai Thiehpa liata Zisu nata akaolâh dâh siano kawpa miakha ta âlâ.

Pati Hmaokha eima Nielâhpa Zisu

Thâtihipha he a ly kawpa pi ta, cha Thâtihipha cha eima chho. ABeipa Zisu nata akaopa ta Thâtihipha eima phuah. Zisu Krista nata akaona dâh hropazy a ypa chhaota keimo la Zisu nata 'my, zâ' pati hmaokha niena, beipari sôh piena ta eima kao lymâ. He he Thâtihipha byhnâ eima to viana, eima chho pakawh via lymâna chhao a châ. Biepari sôh piena ta Zisu nata hmaokha niepa ta eima kao. Marasaw hro liata chhôhkha nôpaw chaipazy hrualeipa ta pati nie sai awpa he ngiaryh tah mapi. Eima hrozie chhao châ vei. He eima hrozie he ngiapâna kao tawhta eima vaw pazao nata ABeipa Zisu eima hnohta maniah sielâh tlôlâh ta, eima hnohta maniah ypâpa pati nie sai awpa he Mara awnanopa ta pachâ thei vei. Chavâta beipari sôh piena ta Zisu nata hmaokha ta eima nie.

He hleikhô ta September 26, Thâtihipha Tlô Noh liata Zisu eima hnohta zâ pati eih râhpa (special dinner) maniah nielâh sala, Thâtihipha byhnâ maniah a pie awpa chhao ngiatialeipa ta eima hâ tyh. September 26 he Thâtihipha eima vaw pahno vâta alyna nata cha Thâtihipha avaw tlôkheituhpa Missionary R. A. Lorrain chôta eima lypa palâsana ta mission châta 'awh' pôhkha piena ta eima vaw hmâ tyh. He he kôkha liata eikha ABeipa Zisu nahta akaona zâ pati eih râhpa (special dinner) eima tao tyhpa châ ta, Zisu nata hmotaona ahlaopa ta awnanopa zydua eima kaona chhao a châ. He taozie he Emasa lâpi liata viasa pano penawh Zisu nata ama kaona nata ahmie kaw hra.

Thâtihipha Lôpapuana

Kliopa nata a viasapa he Zisu ta bie hmeiseihpa a pahnosâ tawh ei ta, thlalôhna nata alyna ta ama bie. Ama palôh liata a tymâna zy chhao a thlâ khai ta,

ama pahnopa nata ama theipa he reileipa ta ama y thei khaoleipa vâta Zerusalem liata a ypa pachupa pahrawhleikha hnohta Zisu cha a thyu haw tlai tahpa ama vaw chho. Zisu thina nata thyuheina vâta a vaw ypa pachhana kyh cha Zerusalem liata ama vaw phuah. Thâtihpha he lohpuana a châ tahpa chhao a palâsa. Nochareih beipari sôh thyuna nata kôkha liata eikha zâ pati eihrahpa Zisu nata niekhohna he eima mission chakaona phapa eima hnei chhohpa a châ. Thâtihpha Tlô Noh ta he hawhta taopa he Mara awnanopa ta Zisu Thâtihpha a phuana chhao a châ.

Thâtihpha eima hmôpa vâta alyna chôta biechhona, thazâh nata hneina ta lohpuana liata ABeipa Zisu maniah a pahlao ta, Khazohpa palôh chhao a tlâh aw. Thâtihpha he chyhsa hnohta chhâzaw hrona, sona, thlalôhna, alyna nata byhnâ hluhpi a piepa vâta phua cheingeipa ta biepiepa eima châ. Zisu tawhta Thlahpa Pathaihpa he eima hnohta y vei sala Thâtihpha he pahnopasia ru aw ta, phuah theipa chhao châ aw vei. Thâtihpha eima phua thei nawpa ta Zisu eima hnohta vaw sie lymâ sala, eima o liata tlô mawh sy. Zisu nata zâ pati eihrahpa kôkha ta eikha nielâhna he la, a phachaipa ta tao suh vy. He hawhta chakaona tawhta Thâtihpha byhnâzy eima to via lymâ aw.

Reipahmaona

1. Thâtihpha tlôkheituhpa Zisu lâ mopa ta missionary châta kôkha ta awh pôhkha mission châta nama pie vâta nama phahnai kheina/ a pahnaileina a y ma reihpahmao teh.
2. Zisu na hnohta ârie awpa, anie awpa, bie arei awpa nama pahy thei ma?

September 26

ZAWPI PHANA CHÂTA LO PAPUANA

"He zawpi sahlao hmiakô liata angiapa nata puapa ta ei y thei nawpa ta sona nata novâhna na pie ma y, na chyhsa he zie zydua he ahy e ryureipa thei aw tly?" tah ta (2 Thâtihzy Rona 1:10).

Khîsatôtu nata zawpi a chhithanazy châta sona pathaihpa hnei âbyuh kaw. Sohna ama tahpa chi hluhpi y aw ta, Khazohpa tawhta a vaw puapa sohna cha pathaih ta, kyhpachâna hnei ta, zawpi phana nata Khazohpa rônahna a pachâ. Cha sohna cha eima byuh kaw.

Khazohpa hnohta Sohna Ahiana

Vaihzy eima chakao pha thei nawpa ta Khazohpa hnohta sohna a hiapa ta apôstôl Zami ta maniah a pachu (Zami 1:5) hra. ABeipa tawhta sohna cha ano sasyh phana deita pachâleipa ta, zawpi pha viana a pachâpa vâta Izarel beipa Sawlawmaw chhao ABeipa lâta sohna ahia ta, a hiana cha Khazohpa ta hlao a patlosa.

Paduana raihria liata sohna he peimawh ta, hneina chhao a peimawh. Sohna he hmia asa aw ta, sôh nata piah ta akaw pazi khiah chakaona a hlaotloh viapa vâta Zawpi chakaona châta peimawhpa sôh nata pia chhao Khazohpa lâ hia a byuh. ABeipa tawhta sohna a topazy ta sôh nata pia hnoh pazileipa ei ta, sôh nata piah cha paduana chhaichhi miakha châta ama hmâ. Sohna nata sôh ama kao tita paduana châta hmotaotheina a hnei. Sohna deita hnei ta sôh a chakâhpa cha taobyuhpazy khohna hawhta tao thei hra vei.

Sohna nata sôh hneirôhna he ABeipa byhnâ a châ. Sohnata hneina hmâthaina dâh deikua taopapuana (practice) tawhta avaw y tyh. Khazohpa tawhta sohna byhnâ a topazy ta, zawpi he pachuna, chhithana zy tao tyh ei sala, hneirôhna he hmophapa tlô nawpa ta hmâ papuapa chhaichhi deita a châ tyh. ABeipa byhnâ, sôh/hneina, he sohna a hlaopa ta hmâ dâh a y.

Âdopa ta Sohnata Sôh Hmâna

Zakia cha Zisu tawhta sohna dopa vaw hnei ta, chatawhta a hneina he chyhsa paduana châta hmâpa a pasaih kaw (Luka 19:1-10). Sohnata dopa ta âdopa ta sôh hmâna a pachu hra. Bie hawrawh hropa ta eima rei khiah, Zakia liata sohna pathaihleipa a ypa châ ta, zawpi y avyuhna rai pahriasa haw ta apei kaw. Ano pôhkha athôhna deita a pachâ vâta vaitlâh phahrina, china nata hupona a tlôkhei. Châhrasala Zisu nata a tyhpa Zakia cha; sohna pathaihpa vaw to ta, zawpi phana, âdopa ta raihria khohna he hmia a vaw pasa haw.

Zisu ta a sohna a hneipa chyhsa, sôh âdopa ta a hmâthaipa Samari chyhsa phapa kyh he hawhta a rei; "Zusy a chhithana nata zyhna kyh liata bieheina (power) tovyuh lai kawpa a topa; ryhpa pachutuhpa nata pharisai zy ta baongiahpa lâta mo ama padeileipa he sohna pathaihpa ama phahla a tah. Zisu ta amo cha thailei pachâ ta, sohna pathaihpa hneipa ta zawpi châta ama hriapa a khohna a reih. He hawhta pakhona a reih, "Samari chyhsa pakha deikua Zerikô nata Zerusalem likawh ta phihmâhpazy ta tu ei ta, hma a phaopa ta, Samari chyhsa phapa ta hmaphaopa, baotuh hneileipa chô liata kyhpachâna nata ngiachhiena hnei ta, a sôh hneipa hmâ papuapa ta a deichhy hawh a tah." ABeipa Zisu pachuna kao tawhta saipa ta sohna nata sôh hmâna dopa cha

kyhpachâna ta mo hropazy paduana liata sôh hmâna he hmâna dâh dopa a châ. Sona, hneirôhna nata bieheina zy he hmotaotheina a hnei chy. Cha miathôhpa hry liata bieheina chhao he kyhpachâna chôta âdopa ta hmâpa âbyuh. Izarelzy hry liata ryhpa pachutuhpazy he bie a hnei kawpa châ ei ta, ama bieheina he baongiahpazy padua nawpa ta ama hmâlêipa he ABeipa Zisu ta pei atah kaw.

Âdopa ta Taona

Tahmâhlâ khizaw chyhsa, Marasaw hluhpi zy cha pahnona nata sohna liata amâ sâh kaw. Hneina liata ama hneirôh kaw bâ hra. ABeipa bie nata âhmiepa ta sohna nata hneina a hmâthaipa he eima râh nata khizaw ta eima peimawh kaw. Chyhsa nata hmotaopa zydua hnohta thlalôhna a piepa sohna he eima peimawh via pachai heih. Cha cha zawpi chhaota ama vâ kawpa a châ. He tlu ta hneirôhna a pôhpa khizaw liata nodidâhphipa hluhpi ama y thlâhpa he hneirôhna he âdopa ta hmâ vei ei tahpa âlâ pasia. A hneirôhpazy ta nodidâhphipa chyhsazy thlah palôh nawpa ta ama hneina sôh zy ama hmâ papua thei nawpa ta chhopasia theina sohna he khizaw ta eima byuh kaw. Sohna a pietuhpa Khazohpa lâta sohna pathaihpa nata hneirôhna he hia pazao lymâ awpa eima pahrua.

Reipahmaona

1. Eima Mara râh liata sohna pathaihpa byhnâ a topa na pahnopazy paziah teh. Cha chyhsazy cha ngiapâna liata ama pha hnai ma?
2. Zawpi phana châta a hneina a hmâ thai kawpa nama kih nata râh liata ama hluh kaw ma? Cha hawhpa chyhsa amâ vaw pôh via lymâ thei nawpa ta kheita eima tao aw?

September 27

PARITHEIPA SAHMA ADYUHNA

*Kresawti paripa ta y khah u, cha liana
chata a sohsi leina y tlôh ta; Thlahpa biepa
ta tlaow y teh u (Ephesi 5:18)*

Thâtihipha hro a laiseih khiah sahma niedona hro châta su achy kaw aw. Sahma he chyhsazy raona nata thina tlôkhei ta, Marasaw châta la sahma he vaitlâh (social) chariahpa miakha tlai châ ta, adyuh awpa âbyuh. Thâtihipha bie hmâpa ta sahma adyuhna he Khazohpa khihnarâh paduana liata chakaona chikha hawhta a py tlâh a châ. Sahma dona a diah via thei nawpa ta awnanopa cha Thâtihipha ta chakaona taovyuh a hnei. Chakaona dâh miathôh eima palâsa chhi aw.

1. Thâtihipha Pachuna

Thâtihipha he Khazoh kyhpachâna âphualuahna bie châ ta, chyhsazy tao awpa nata taolei awpa maniah a chho. Sahma do ta parileipa Thâtihipa bie ta maniah a chho. Sahma dona ta sipasana, tlâhleina, nohzaona, hupona, chhôhkha raona zy a tlôkhei hluh kawpa vâta Biesohzy châbu ta sahma do kha u a tah (Biesohzy 23:21). Biesohzy liata Kresawti a saih nota mo kha u a tahpa cha he hawhta eima chhopsia thei; sahma a haopazy he viasa ta atao ula, sahma azuapa nata sahma do a pahâpazy he akao kha u., a tah.

Sapa pôhpa tlâhna nata laiseihna châta a phahnai leipa niedozy cha padi (test) awpa chhao pha vei. Sahma nata parithei hropazy chhao padi awpa pha vei. Sahmâ nata paritheipa hropazy cha dyhchhiena, palôh sipasana zy tlôkhei ta, ngiapâna lâpi paviapa ta pôhpa nata thlahpa

chhao thina a tlôkhei thei. Sahma parina liata Thlahpa Pathaihpa chhao raihrialeipa ta, paritheipa ataopazy chôta ABeipa Zisu chhao a lyleipa ta, chhôhkha chhao aly hra vei ei.

2. Chhôhkha ta Paritheipa Adyuhna

Sahma parina ta chhôhkha patypamâ ta, hro sipasana nata khihsa tlalana a tlôkhei. Chavâta Krizypha chhohkhazy ta paritheipa cha eima dyuh. Khazohpa tawhta eima topa byhnâ, takâ sôhzy he paritheipa chaleina liata hmâpa châ vei. Sahma dona ta viasa atluapazy a pahlapa, parina ta palôh alyna atluapazy uava leipa he avaihna dâh phapa a châ hra. Chhohkha liata nôpawzy ta paritheipa rai taoleipa he paritheipa sahma adyuhna dâh pha via chaipa a châ thlyu aw. He hawhta taopa he Thâtihpha bie nata a hmie ta, pasô awpa hrozie a châ. "Châ awtuha cha a pathaihpa hawhta nâmo chhao nama yzie zydua liata a pathaihpa ta tlao y teh u (1 Pity 1:15). Sahma tawhta chhohkhazy eima pathaih nawpa ta eima palâsapa hawhta a râpasua suh u. Khazohpa baona ta sahma nienna nata parina tawhta âpua thei thlâh aw.

3. Ngiapâna ta Paritheipa Adyuhna

ABeipa tawhta kyhpachâna bie cha, "sahma do kha, a râ sai teh (Biesohzy 23:30)." tahpa hi. Ngiapâtuha thlahpa lâ sawzy tlai he hmo phaleipa ta maniah âvaw hnia tyh. Hupona a tlôkheipa sahma chhao maniah âvaw hnia thei aw, Kresawti a khohpazy cha arâ sai thlâh ma y ABeipa ta a tah. Eima hro liata ABeipa bie papeisana ei sala, pathaihna a chadai lymâ suh vy.

Biehraï parohpa reikah(Hebraireih) liata pathaihna tahpa he a chupa a pha. Pathaihna tahpa cha *qadash* ta ei ta, apuapa tawhta pathaihsa, a hlâ, khizaw taozie tawhta panano tahpa yzie a hnei. Khizaw viasazy

khohnazie tawhta a panano ta, Khazohpa khohnazie nata âhmiepa ta hropa he a pathaihpa ta yna, ABeipa châta a hlâna a châ. Chyhšapa ta Khazohpa bie a zyh khiah pathaih ta, sahma parina hmo pualeipa tawhta a pathaih hra aw. Khazohpa bie pasô ta sahma dona, parina zy a chalihsa thei aw. Davi ta moleina ei taolei nawpa ta ABeipa ryhpa bie he palôh liata a pachô tyh a tah (Hlazy 119:11). Eima khohzie hawhta taopa hlâ ta Thlahpa Pathaihpa baona ta ABeipa bie khohzie a chadaipa a pha.

Thlahpa Pathaihpa ao nahthliepa ta, bie hmeiseihpa theipa ta, "Bie hmeiseihpa ta khota maniah palaisa aw ta (Zh 8:3), sahma parina sei ta y beih aw mapi. Pawla bie eima hly khiah Thlahpa pabiepa ta yna ta parina eima pahnie a tah. Eima hro liata Khazohpa bie pasôna he thlahpa ta eima hrona pabiena châ ta, Khazohpa bie ta pôhkha nata chhôhkha a pasapazy ta parina charia tawhta khota ama laih thei thlâh aw.

Sahma cha hmo pathaihleipa, hria awpa a phaleipa, chahrih awpa hmo a châ. Thlahpa Pathaihpa ta Biehraih tawhta châ se, chhôkha tawhta châ se, vaitlâh uhthei, nôpawzy tawhta châ se, viasa phapazy tawhta châ se sahma sei liata a tah leipa nochareih maniah a chho. Thlahpa Pathaihpa awna ao, "sahma do khâ, pari khâ, zua hra khâ" tahpa bie he ngiapâna palôhru ta nahthlie suh vy. Vaitlâh liata aru lâta paritheipa hmo zuapa he Khazohpa khohzie adyuhpa a châpa vâta bâh sai awpa ta eima pasyu hra.

Reipahmaona

1. Marasaw liata sahma zuah ta ama chhôhkha aly kawpa nata ama khisaw a pha kawpa na pahnopâ ama y ma?
2. Nôpawzy ta sahma dona kyh liata sawzy ama chhorei theileina chhâpazy rei pasia teh.

September 28

HRIAPAKAOHNA TA PADUANA

Cha biezy cha ei thei nahta, thlai atyuh nahta, cha nahta, noh khazie tlyma cha pachârôhpa ta y nahta, nie leipa ta y nahta, avâ Khazohpa hmiakô liata thlachhâ nahta (Nehemia 1: 4).

Thlachhâna, patlapasaona nata palôh akaoraohna ta araopa ama paduapathi. Zerusalem raona padua heihna liata Nehemia reizie châ, "Izarel cha arao haw a tah. A rao chhâna deikua cha, Khazohpa bie hnôhchhy ei ta, ryureina, hmotaona zy liata Khazohpa biepiepa nata âhmie lei kawpa ta ama taopa (Nehemia 1:7)" vâta achâ a tah. Khazohpa bie nata a hmieleina he Izarel raona hawhta âlâ. Zerusalem khihpi cha chariahpazy ta parao ei ta, ryureina, zyhna, o nata lyu zy a rao. Chyhsa hluhpi chhao râh tawhta ama pai. Nehemia siepahliepa ta Khazohpa ta taopathina rai hria ta; thlachhâna, pathlapasaona, araokhahna zy hmâpa ta Nahemiah cha taopathina rai a hria.

Taopathina châta Thlahchhâna

Taopathina châta hmotaotheina (power) abyuh ta cha cha ABeipa ta chyhsa hnohta a pie thei. Nahemiah cha Khazohpa lâta thlachhâpa ta hmotaotheina âhia. Ngiapâna kao lâ tawhta saipa achâ khiah; Khazohpa liata taopathi theina hmotaotheina a y. ABeipa lâta thlah a chhâ tawhta Nehemia cha novâhna, palôh araohna byhnâzy avaw to. Nehemia chhithapa ta Zerusalem cha ama padua heih.

Zerusalem padua heihna liata mothlih chhao ta thlahchhâna he chakaona peimawh kawpa ta âlâ hra. Thlahchhâna ta taopathina dopa lâpi a pahmôsa ei.

Vâsua byhnâ a y khaoleipa vâta râh chhôn chakâhna atlôna daihti liata Elaiza cha Khazohpa lâta thlahchhâ ta vâsua byhnâ a vaw tlôkhei. Ryureina nata achhithana dopa he pahnona nata achuna pahnona ta adaih vei, Khazohpa lâta sohna a hia tyhpa abyuh. Sawlamaw nata Nehemia he thlahchhâna ta ryurei thaina sohna (political wisdom) cha ABeipa tawhta ama to. Khazohpa ta ama thlahchhâna byhnâ pie ta, râh chhithana, amohôhna nata râh paduana chhao ama tao.

ABeipa Ryhpa Bie ta Paduapa Khihpi

Khazohpa ryhpa bie he ku (wall) hawhta hmâpa ta khihpi nata râh cha dôhkhâ âbyuh. Khihpi paduana liata ku dôhpazy, ku ochhi phapazy peimawh tlai aw ta, cha hlâ chhaota a peimawh via heihpa cha Khazohpa ryhpa ta dôhkhâpa nata vaihpa khihpa paduapa he ABeipa khohzie a châ chai aw. Zerusalem raona liata ahlaopazy cha; Adyuhna vâta o nata lyu rao ta, thlalôhna pahlei ei ta, riapaihpa ta ama châ. Ama dyuhna he raona a tlôkhei ei. Raona tawhta paduana ama tlô heih nawpa ta ABeipa nata a paryhna ama hnei. *Adyuhna he paduana châteipa ta aparyhna he paduana châte hmotaotheina tiao a vaw châ.*

Taopathina liata Ezara Raihriana.

Ezara cha Khazohpa biepiepazy tlâh'aw kheina ta Zerusalem paduana raihria liata âpahlah. Khazohpa reingiahna a hlaoleipa ta chyhsapa nata khih nata râh zy a

padua thei vei tahpa chhao maniah a pachu. Nehemia he sawhkhâ (Abei nyu piena liata raihriapa) raihriapa deita châ ta, paduana raihria châta Ezara âpahrua. Ezara, theithaipa cha ABeipa ryhpa pachu ta, thlah a chhâ. Siana nata adona ryhpa zy pachu ta, hnabeidyna hneilei awpazy, ABeipa liata alyna chôta hmotao raihriapazy a pahrua (Nehemia 8:10) lymâ. Paduana raihria liata awnanopa chhao thlahchhâna, hmophapa pachuna taovyuh a hnei hra. Kyh apachâ chyupa ta ryhraona lâpi tluakheipa he awnanopa ta pachu sala, cha cha âchhah hra aw.

Nehemiah daihti liata Zerusalem a raopa nata keimo râh chhao âlyuna a hluh kaw. Khihtlâh ryureina siano khao vei, takâ hmôna y khao vei, maniah a pachhiparypa ama hluh kaw, thlalôhna a diah haw. Sawhkhâ office hluhpi âkhaw; hawtizy achuna su, tlâleipa mohâna thohna o zy a khaw vâta rôryh âhrana râh liata eima y. He he eima raopa tlâhpiya cha a châ. Aparyhparina lâpizy tluapa ta adyuhnazy diah sala, ryureina thiehpazy âdua nawpa ta mothlih chhao ta thlah eima chhâ. Ryureina liata haihinazy, sia leinazy bâh sai ei sala, râh liata âdopa pasôna byhnâ a vaw tlô hlâlei zawpizy ama hnabeiseihna alei lei nawpa ta Khazohpa bie ta zikyu a râpa ta, pathlâtuhpa Khazopa lâta thlachhâ pazao lymâ suh vy.

Reipahmaona

1. Âdopa pasôna byhnâ eima to thei nawpata kheita taopa a pha chai na tah?
2. Ryureina pha viapa eima hnei thei nawpa ta awnanopa thlahchhâna he byhnâ a hnei awma tahpa reipahmao teh.

September 29
AZAONA NATA AZONA: THLAHPA HROZIE

*Nâmo eih dei mo leipa ta mo hropa eih chhao tlaoh
moh chyuh teh u (Philipi 2:4)*

*Achhâ chaina ta cha, nama palôhrupa sukha ta y
ula, tha a pasa rairi teh u, unawh hawhta kyh a
pachâ ula; ngiachhiena hnei ula, reisipa ta y teh u
(1Pity 3:8)*

Lâsôh hawhta na dua ma? Khazohpa nata akaopa ta, bie a reilâhna na hnei tyh ma? Eima vaihzy nata kheihtha eima zao tahpa chyhsa to sasyh a hiahri tyhpa âpeimawh kaw. Chyhsa to azaona phapa eima khoh. Azaokhina pathaihpa cha hmotaothei ta, thâtlôna zy pie ta, vaih nata azaona phapa hneipa he Khazohpa byhnâ eima lana hnawh miakha a châ hra.

Khazohpa Pathaopa Azaona

"Azaona" he Khazohpa ta a pathao. Azaona phapa tao lymâ suh vy. Khazohpa, chyhsa nata hmotaopa zydua azaona ama hnei hra. Khazohpa ta a taopa hmo to zydua he Khazohpa nata azaona amâ hnei khai. Hmotaopazy chhao azaona ama hnei chyuh; pamosana - pavaw châta niedo phapa cha thotheipa a châ khiah, pavaw, thokô, thothei cha azaona ama hnei. Chahawhta, Khazohpa hmotaopa hry liata chavah/ avâsua ti nata thokô rihkô zy azaona ama hnei chyuh. Thokôpa he ti nata âzao khao vei khiah raoh aw ta, a thi thlâh aw. Chahawh tlai chata, ti zy akua lei nawpa ta thokô ta a vaih heih. Hmotaopa zydua

azaona hnei eita, he hawhta azaona phapa ama hnei vâta hmo phapa ama papua hra. Azaona phapa ta hmo phapa a papua thei.

Bie chakhiapa ta miakha eima rei khiah cha, azaona pachiena deikua Khazohpa Thlâh pa Pathaihpa raihria châ leipa ta, parao nawpa ta sâta raihria âthaona a châpa ta tiao â lâ. He hawhta azaona taopa âbyuh; chyhsapa nata hmotaopa – hmo to zydua azaona hneipa Khazohpa ta a tao. Khazohpa ta kyhpachana, pathaihna, zachhina (respect) piana zy he azaona phapa chhaichhi ta a tao. He he ta hnatlahpa (healthy relation) azaona a tao aw.

Biehai Kao tawhta Azaona Tlâhpa

Khazohpa nata chyhsa azaona, chyhsapa nata chyhsapa azaona nata chyhsapa nata hmotaopazy azaona tahpa ta azaona kyh tlâhpa Biehai liata a palâsa. Khazohpa tawhta apuapa azaona cha a pathaih. Pôhkha athohna khopa vâta azaona châ vei. Pôhkha phana vâta azaona cha athohna a y vei khiah azaonazy thlai a parao thlâh. Khopa hmô nawpa rakha ta azaona deita châ leipa sala Khazohpa khozie nata ahmiepa azaona, mo hropa châta phahnai khohna vâta azaona he a pathaih. Chyhsapa he kyhpachâna ta azaona taopa a châ. Azaona pathaihpa a pahneisa theipa cha kyhpachana, azaona (trust), azana (resect), ngâchhina, daotheina zy he a lei thei leipa ta âbyuh.

Khazohpa ta azaona pathaihpa a pathao. Khazohpa nata chyhsa likawh azaona he Biehai liata chyhsa hmiatuhpazy; Ada nata Ivy thâti h tawhta eima

chu, "Khazohpa cha chyhsapa yna sadô lâ a vaw heih ta, sadô liata chyhsapa chapaw nata chanô cha a vaw charei tyh ei." Khazohpa ta chyhsa nata azaona pathaihpa a pathao. Châhrasala reipasaotuhpa bie vâta chyhsapa cha a palôh a pathlai ta, Khazohpa bie he zo khao vei. Chatawhcha Khazohpa nata chyhsapa ama zaona arao haw. Chyhsapa ta Khazohpa a zo khao lei tawhta azona (trust) avaw rao. Satâ bie he ta a zo leina tao ta, a zo leina he azaona pathaihpa a parao haw. Chyhsapa cha Khazohpa nata azao arao tawhta hmo pha tao theina a diah haw. Moleina deikua a taona a nao kaw ba.

Azona (Trust) nata Azaona

Azaona pathaihpa hneina châta azona âbyuh. Chyhsapa ta Khazohpa chôta zôna, ngâna (trust) a y daihti liata azaona cha a hnatlah ta, a thatlô ta, hmo pha chhao a tao thei. Châhrasala pari ta chyhsapa â do vei nata chyhsapa ta Khazohpa chô liata zo leina a vaw hnei. He zo leina he ta Khazohpa nata chyhsapa azona (trust) a parao. He rakha tawhta Ada nata Ivy cha Khazohpa a tyh ngah khao vei ei. Azaona a hnatlah khao vei rakha tawhta moleina a pôh lymâ. Ada nata Ivy cha Khazohpa chizana (respect), pachônosana ama pahlei vâta ama zaona pathaihpa rao ta, thlalôhna nata alyna zy pahlei ei ta, phaorina ta a vi ei. Azaona phapa ta alyna a pie.

Khazohpa nata eima zao phana vâta reipasaona chi hluphi eima pahnie aw. Abeipa nata eima zao pha lymâ thei nawpa ta Khazohpa bie a ngiapâna (zona), zana (respect) zy hneipa eima peimawh. Khazohpa sawzy cha chhôhkha nata visa, awnanopa nata vaitlâh zy he azaona ama hnei. Kypachâna nata a palyupalih chyupa ta akaona

hneipa ta amâ zao thei. Abeipa eima chizapa hawhta eima vaihzy chhao za ei sila, pachônôsana chôta azaona phapa eima tao thei. Azaona phapa ta alyna, thlalôhna, byuhpa liata a deichhyna zy tao ta byhnâ hluhpi a hnei. Khazohpa nata chyhsapa azaona pathaihpa a y lymâ khiah vaihtlah liata hrozie araopazy padua pathi aw ta, chhôhkha nata vaitlâh châ a thla a lôh aw. Khazohpa nata azaona phapa hneina he â peimawh pachai heih.

Reipahmaona

1. Vaih nata azaona phapa a pakhâpa hmozy paziah la, azaona pathaihpa byhnâ na pahnopazy reih papua teh u.
2. Mara râh liata chyhsapa nata hmotaopa azaona he ahna a tlâh ma? Hmotaopa nata chyhsa azaona pathaihpa hneitheina zy reih pahmao teh.

September 30

PARYHNA TA TLAO ACHÂ SE!

*Âryhna taotuhpazy ama nohlao na,
Khazohpa saw biepa ta ama cha awpa
vâta (Mathai 5:9)*

Pachhiena bie, pachhiparyna bie, ahaona bie a rei hluh kawpazy he chyhsa so viapa, khih kyh, râh kyh a pachâ viapazy châ hlei vei ei. Kyhpachâna bie, thi a piethaina bie, âryhna biezy, phaohuana biezy he chyhsa ta ama vâ. A padyh thaipa nata thlalôhna a piepa biezy reina nata châzy rohna ta Khazohpa saw, Thâtihpha sawzy eima châna palâsapa a pha chai aw.

Thlachhâna nata Bie Phapa Hmotaotheina

Khazohpa sawchanô, Esthy tawhta aparyhna bie abei Ahasurâ lâta a reipa nata hmotaopa ta a chariahna a padiah. Cha cha ta Zuzy leidiana tawhta khôkhâhna tao ta, chyhsa sâhluhpi hrona a pabohsa tahpa eima pahno chy. Hama pakha Zuzy ahaona vâta Zuzy pahlei padiana order papuana taihta châ haw hrasala Thlachhâna hro a hneipa Esthy cha Abeipa Ahasuara office lâ a ngiapa ta, Zuzy a bohna châta ahawna (reipahmaona) hnei ta, â hawna cha hlao patlohpa ta a châ (Esthy 7:1-10). Thlachhâna chôta ahawna phapa taopa he Khazohpa chyhsazy hmotaô dâh châ ta, Esthy ta a chariahpa a pahniena dâh chhao a châ. Thachahra ta adyuna leipa ta pahniena chhao a y tahpa Khazohpa sawzy taozie liata â lâ. Râh zawpi thlachhâna nata biehnituh chaipa liata reikah pha kawpa ta ahawna

ta hmo hluhpi a taopathi tahpa ABeipa bie ta maniah a chho chanei.

Biephapa ta Pahniena Lâpi

Hmophapa a pua thei nawpa ta hmo phaleipa he adyuh awpa tlai a châ. Hmo chhiepa adyuhna dâh a y hôlô aw. Awnanopa cha thlachhâna nata reipahmaona lâpi achhihpa ta paduana rai liata âhlao thei. Bie dopa liata paduana he awnanopa a saduthilena châ lymâ sala, bie dopa he a hmie phapa ta reina (bie phapa reina) ta pahniena lâpi he ABeipa Zisu siena lâpi nahta âhmie chai hra. Khazohpa bie nata âhmiepa ta pachâ, thlachhâ, bie reipahmao tahpa lâpi he awnanopa siena lâthlôh chaipa châ ta, political phu/py zy deikuala awnanopa nata amâ lyu leina a y thei ngyu aw. Lyuchâpa Pawla ta "nama biezy he achhi alôh miapâpa hawhta châ mawh sy," a tah hra. Hmo phaleipa adyuh ti ta, ngiapâna ta bie dopa a duakhei ngâhna nata bie dopa he ahmie phapa ta rei papuana ta pahniena lâpi a y tahpa awnanopa ta a my awpa pha vei.

Awnanopa phupy a châleipa, thâtih rotuhpa (Journalist) zy, taopathina a khaihpa (activist) zy cha amâ khohkhei viana kao lâ tawhta bie reina nata hla sanazy a hluh. Thâtih dopazy ama reipa y ta, thokha thâtih ama reipazy cha saisona ta pasipasawhna biezy, chakhiana biezy, pachhiparyna biezy, pahlawna biezy ta ama khohpa tlô nawpa ta a khaihna a y tyh. Ama biezy zawpi pahno thei nawpa ta thâtihbu nata online page zy liata tlâhzawna zy ama tao via tyh. A phahnainazy a ypa hawhta thokha cha chyhsa hluhpi pathipalôh a pathupahnynazy a y hra. Awnanopa deikuala, political

phu/py a chaleipa vâta a chado kawpa ta Khazohpa bienata âhmiepa ta thâtihzzy palâsana tlaô a tao. Awnanopa lâ â dopa ta reinazy, a pasyu phana zy hneipa ta â dopa hawhta taona zy ta tha a pathyupa he a siena lâpi dopa cha a châ.

Awnanopa châta Biezy

Awnanopa ta â ngiapâna nata bie dopa he biereina ta tlymâ, chârôpa ta tlymâ, online siepahleipa ta tlymâ palâsana a tao tyh. Awnanopa he ABeipa Zisu a ngiapâtuhpazy a hmao pakhyupa zawpi cha châ ta; taozie a hnei. Thâtihbuzzy ta apahaona nata chhiesana biezy rei hrasala awnanopa cha zawpi adyhna nata a paryhna a tlôkhei theipa biezy, chyhsa zachhigna a piepa biezy, siana a khohpa biezy a rei aw. He he eima Beipa ryhpa ta maniah a pachupa lâpi cha a châ.

Mara Awnanopa Saduthliepa

Taopathina a khohpazy châta Esthy taozie a châpa, "taopathina châta thlachhâna nata areiparyhna," tahpa a mopâ awpa eima hnei hra. Awnnaopazy ta Esthy taozie he âmopâ kaw. Awnanopa cha a reiparyhna ta saduthliepa tlôna taih sie hualuapa thlah a chhâ. Awnanopa cha reiparaohna/reipahmaohnazy, ngiathainazy hmâpa ta saduthliepa tlô awpa ta tha patlô kaw ta; thlah a chhâ chaina chhao a châ hra. Chyhsapa hrona a pasôpa vâta awnanopa cha kupheipathyupa ta râh ryureinazy a diah thei nawpa ta thla a chhâ lymâ hra. Adyhna a yleina râh liata raona chi hluhpi y ta, cha raona khôkhâ thei nawpa ta thlachhânazy cha ABeipa ta byhnâ a pie lymâ aw. Catholic awnanopa he adyuhna liata hmia âsapa history hnei ta, a tao chhei haw tahpa âpahno tawhta lâ, awnano

hluhpi cha aparyhna lyuchâpa châ awpa he Thâtihipha nata âhmie via tahpa a ngiapâ haw. Mara awnanopa chhao cha hawhta a ngiapâna cha pasô ta, kaokhata lia chhâ a paryh thaina byhnâ topa a saduthliena chhao a châ.

Reipahmaona

1. Vaitlâh nata online page liata kyhpachâna bie, aryhna bie, zachhihpa biezy tlâhzaw thei nawpa na na khohkhei chhâpazy rei pahmao teh.
2. Zuzy chôta Hama hmotao a doleipa pahnie nawpa ta Esthy taozie he a tanoh keimo Myanmar awnanopazy amopâ awpa a pha na tah ma reipahmao teh.